

বাংলাপিডিএফ

৭৯-৮০ দুই খণ্ড একত্রে

নাচের পুতুল-৪

রোমেনা আফাজ

স্বর্ণগুহা



রুনি

দস্যু বনহর সিরিজ
দুই খণ্ড একত্রে

নাচের পুতুল (৪)-৭৯ স্বর্ণগুহা-৮০

রোমেনা আফাজ



সালমা বুক ডিপো

৩৮/২ বাংলাবাজার, ঢাকা-১১০০



প্রকাশক :

মোঃ মোকসেদ আলী

সালমা বুক ডিপো

৩৮/২ বাংলাবাজার,

ঢাকা-১১০০

গ্রন্থবন্ধু সংরক্ষণে প্রকাশক

প্রচ্ছদ : সুখেন দাস

নতুন সংস্করণ : আগস্ট ১৯৯৮ ইং

পরিবেশনায় :

বাদল ব্রাদার্স

৩৮/২ বাংলাবাজার

ঢাকা-১১০০

কম্পিউটার কম্পোজ :

বিশ্বাস কম্পিউটার্স

৩৮/২-খ, বাংলাবাজার,

ঢাকা-১১০০

মুদ্রণে :

সালমা আর্ট প্রেস

৭১/১ বি. কে. দাস রোড

ফরাশগঞ্জ, ঢাকা-১১০০

দাম : ত্রিশ টাকা মাত্র

উৎসর্গ

আমার প্রাণ প্রিয় স্বামী, যিনি আমার লেখনীর উৎসাহ ও
প্রেরণা জুগিয়েছেন আব্দুল্লাহ রাব্বিল আলামিনের কাছে
তার রুহের মাগফেরাৎ কামনা করছি।

রোমেনা আফাজ
জলেশ্বরী তলা
বগুড়া

সত্য ও ন্যায়ের প্রতীক
দস্যু বনহর



এই গভীর রাতে কোথায় যাচ্ছে হর?

কোমরের বেন্টখানা মজবুতভাবে এঁটে পরতে পরতে ঘাড় ফিরিয়ে
তাকায় বনহর—রিলিফ প্রধানকে কিছু পুরস্কার দিয়ে আসি।

পুরস্কার।

হাঁ, পুরস্কারই বটে।

নূরী বললো, তুমি নাকি কাল অনেকগুলো মানুষ হত্যা করেছো?

বিস্ময়ভরা কণ্ঠে বলে বনহর—মানুষ! মানুষ হত্যা করেছি আমি!

কিছু যেন জানো না তুমি। কাল হাজলা অঞ্চলে এক পোড়োবাড়িতে
নাকি রক্তের বন্যা বইয়ে দিয়েছো?

বনহর নিশ্চুপ হয়ে হাত দু'খানা হাতের মধ্যে রগড়ে নিচ্ছিলো, নূরীর
কথাগুলো যেন তার কানেই প্রবেশ করছে না।

বললো নূরী—হাজলার কোনো এক পোড়োবাড়িতে তুমি হত্যালীলা
চালাওনি?

এবার বনহর অট্টহাসিতে ফেটে পড়লো, তারপর হাসি থামিয়ে
বললো—হাজলার পশুহত্যার সংবাদ তোমার কানেও পৌঁছেছে দেখছি?

অবাক কণ্ঠে বললো নূরী—পশুহত্যা!

হাঁ, আমি কাল কয়েকটি পশু হত্যা করেছি, কারণ বড় বেয়ারা পশু
ছিলো ওরা।

তুমি কি বলছো, তবে যে গুনলাম.....

দু'পা বিশিষ্ট পশু কিনা তাই তুমি ঠিকই শুনেছো। জানো নূরী, ঐ
পশুগুলো দেশ ও দেশের মুখের গ্রাস কেড়ে নিয়ে নিজেরা উদর পূর্ণ করতো,
তাই..... ও গুলোকে খতম করে দিয়েছি।

হর, তোমার রক্তের নেশা আজও মিটলো না? জানি না কবে তুমি এ
নেশা থেকে মুক্তি পাবে।

নূরী, এ আমার নেশা নয়, রক্তের তৃষ্ণা বলতে পারো। জানো, দেশের সর্বত্র আজ হাহাকার... ক্ষুধার জ্বালায় মানুষ আজ দিশেহারা উন্মাদ হয়ে উঠেছে। একদিন, দু'দিন, তিনদিন এক সপ্তাহ, দু'সপ্তাহ, তিন সপ্তাহ মানুষ কতদিন ধরে অনাহারে অর্ধাহারে কাটাতে পারে বলো? নূরী, যদি দেখতে অসহায় দুঃস্থ মানুষ আজ বস্ত্রহীন উলঙ্গ অবস্থায় ডাষ্টবীনের পাশে ময়লা আবর্জনা হাতড়াচ্ছে এক টুকরো শুকনো রুটির আশায়—পারতে না, পারতে না নূরী, নিশুপ থাকতে তুমিও পারতে না। এই সুন্দর পৃথিবীর বুকে এক শ্রেণীর মানুষ আবর্জনার মত বেঁচে আছে আর এক শ্রেণীর মানুষ যাদের আমি পশু বা জানোয়ার বলি তারা ঐশ্বর্যের ইমারতে বসে ঐসব দুঃস্থ মানুষের মুখের আহার রাজখাদ্য হিসেবে ব্যবহার করছে। তুমি বুঝবে না কেন আমি ঐ পশুগুলোকে হত্যা করেছি। পশুগুলো এক নম্বর চোরাচালানী.....না, ভুল বললাম, যাদের আমি শায়েস্তা করেছি ওরা ছিলো দু'নম্বর—এক নম্বর কারা জানো নূরী?

তা আমি কেমন করে জানবো?

তারা হলেন মহান ব্যক্তি, নাম ধরার কোনো উপায় নেই। যেই নাম উচ্চারণ করেছে—গেছো। কারণ দেয়ালেরও কান আছে। যদি ভুল করে কেউ সেই এক নম্বর মহানেতাদের নাম উচ্চারণ করে বসে তাহলেই হয়েছে। পরদিন তার অস্তিত্ব থাকবে না এ পৃথিবীর বুকে। তাই কার কাঁধে ক'টা মাথা যে সেই স্বনামধন্য ব্যক্তিদের নাম মুখে আনবে। তুমিও না জানাই ভাল।

সত্যি তুমি আমাকে বড্ডা বোকা মনে করেছে। আমি সব জানি—সব বুঝি।

সেই এক নম্বর মহান ব্যক্তিদের টেপা চোখের ইংগিতে দু'নম্বরগুলো কাজ করে। হঠাৎ ধরা পড়ে গেলে দু'দশ দিনের জন্য হাজত কিংবা জেল ভোগ করে, তারপর ফোন পেলেই ছাড়া পায়। হঠাৎ কেউ কেউ গুলী খেয়ে মরে। কিন্তু ঐ মহান ব্যক্তির যারা এক নম্বর তাঁরা থাকেন স্বর্গের সুউচ্চ আসনে উপবিষ্ট—সেখানে বসেই তারা অতি কৌশলে কাজ করে যাচ্ছেন, কোনো ব্যাটার সাধ্য নেই তাঁদের নাগাল পায়—কেশাগ্র স্পর্শ করার উপায় নেই কারও। নূরী, পাপ কোনোদিন স্থায়ী নয়, স্বর্গের সোপানে দাঁড়িয়েও

কেউ পাপের প্রায়শ্চিত্ত থেকে রেহাই পাবে না—পায় না কোনোদিন। হাঁ, কি বলছিলে রক্তের নেশায় আমি উন্মত্ত? না না, আমি নই, আমি নই এ পৃথিবীর শুকনো মাটি রক্তের তৃষ্ণায় হাহাকার করছে, ক্ষুধাতুর মানুষের বুকে ফাটা আর্তনাদ ঝরে পড়ছে শুষ্ক মাটির কণ্ঠ দিয়ে—অন্ন চাই, এক মুঠো অন্ন চাই.....

নূরী বনহরের জামার আস্তিন চেপে ধরে বলে—আজ তোমার কি হয়েছে বলোতো, তোমাকে স্বাভাবিক মনে হচ্ছে না কেন?

হাসলো বনহর, তারপর তুলে নিলো টেবিল থেকে রিভলভারখানা।

কোথায় যাচ্ছে বললে না তো?

শহরে, মানে রাজধানীতে।

কেন?

এক নম্বর চোরাচালানীকে শায়েস্তা করতে।

জানি না কোনো বিপদ আসবে কিনা।

নূরী, উদ্দেশ্য আমার অসং নয়—তুমি নির্ভয়ে থেকো। চলি, খোদা হাফেজ।

এসো। নূরী অক্ষুট কণ্ঠে কথাটা উচ্চারণ করে।



ছোট জানালায় এসে দাঁড়ালো দিপালী। সে শুনতে পেয়েছে একটি পরিচিত পদশব্দ। বিপুল আগ্রহ নিয়ে ছুটে এলো সে জানালার পাশে। জানালা দিয়ে দৃষ্টি নিষ্ক্ষেপ করতেই দেখতে পেলো দিপালী তার রাজকুমার জমকালো ড্রেসে পাশের কক্ষে প্রবেশ করলো। অদম্য আশা নিয়ে অপেক্ষা করতে লাগলো দিপালী কখন কক্ষ থেকে বের হবে তার রাজকুমার। কিছুক্ষণ পরে ঐ কক্ষ থেকে বেরিয়ে গেলো এক ভদ্রলোক, দিপালীর সম্পূর্ণ অপরিচিত। দিপালী কিন্তু তখনও দাঁড়িয়ে আছে কিন্তু কই তার রাজকুমার তো বের হলো না। পা ধরে এলো, ঘূমে দু'চোখ ঢুলু ঢুলু করছে কিন্তু কোথায় সে!

দিপালী জানালার পাশে হেলান দিয়ে ঘুমিয়ে পড়লো।

ভদ্রলোক গাড়িতে গিয়ে বসলো।

তখন পূর্বাকাশ ফর্সা হয়ে এসেছে।

গাড়িখানা শহরের পথ ধরে ছুটে চললো। ভোরে রাজপথে তেমন ভিড় নেই তাই গাড়িখানা নিশ্চিন্ত মনে এগিয়ে যাচ্ছে।

দু'একখানা বাড়ি পাশ কেটে চলে যাচ্ছে গাড়িখানার।

পিছন আসনে বসে আছেন, সেই ভদ্রলোক।

ড্রাইভার গাড়ি চালিয়ে চলেছে।

পিছন আসনে ভদ্রলোক বসে সিগারেট পান করে যাচ্ছেন, রাশি রাশি ধোঁয়া ছড়িয়ে পড়ছে গাড়ির মধ্যে।

গাড়িখানা এসে থামলো হিমসা অঞ্চলের কোনো এক গুদামের সম্মুখে। কান্দাইয়ের হিমসা অঞ্চল হলো সবচেয়ে বড় এবং নামকরা ব্যবসায়ী কেন্দ্র। ভদ্রলোক নেমে গেলেন গাড়ি থেকে, একটি কোম্পানীর অফিসে প্রবেশ করতেই দারোয়ান সেলুট করলো।

ভদ্রলোক চেয়ারে বসে রিসিভার তুলে নিলেন হাতে ফোন করলেন কেন্দ্রে রিলিফ প্রধানের কাছে জানালেন, আমি এফুগি আসছি, আপনার সঙ্গে বেরুবো। পাল্টা জবাব এলো—আসুন আমি আপনার অপেক্ষা করছি।

ভদ্রলোক চশমা চোখে ছড়ি হাতে বেরিয়ে এলেন কোম্পানীর অফিসরুম থেকে। গাড়িখানা অফিসরুমের সম্মুখে প্রতীক্ষা করছিলো। ভদ্রলোক এসে গাড়িতে চেপে বসলেন।

গাড়ি বেরিয়ে এলো রাজপথে।

রাজধানীর কেন্দ্রস্থলে স্বনামধন্য ব্যক্তিদের ইমারত। গাড়িখানা মসৃণ জমকালো পিচঢালা পথ ধরে এগিয়ে একটি বিরাট হোয়াইট বিল্ডিংয়ের সম্মুখে এসে থামলো।

গেটের পাশে দারোয়ান দাঁড়িয়ে ছিলো। গাড়িখানাকে দেখতে পেয়ে সোজা হয়ে সেলুট জানালো। ভদ্রলোক হাত বাড়িয়ে দারোয়ানের হাতে একটি কার্ড দিলেন।

নেম কার্ডখানা নিয়ে চলে গেলো দারোয়ান। একটু পরে ফিরে গেটখানা সম্পূর্ণ খুলে দিলো সে। গাড়িখানা গেটের মধ্যে প্রবেশ করলো।

ভদ্রলোক গাড়ি থেকে নেমে দাঁড়াতেই তাঁকে অভ্যর্থনা জানিয়ে ড্রাইংরুমে নিয়ে যাওয়া হলো।

সোফায় হেলান দিয়ে সেদিনের সংবাদপত্র পড়ছিলেন রিলিফ প্রধান। সম্মুখে টেবিলে মূল্যবান ট্রের উপরে ধূমায়িত চায়ের কাপ। একটা প্রেটে নানাবিধ ফলমূল। নানা রকম নাস্তাও সাজানো রয়েছে থরে থরে। ভদ্রলোক আসবেন তাই রিলিফ প্রধান সম্মুখে সকালের নাস্তা সহ অপেক্ষা করছিলেন আগন্তুকের।

আগন্তুক এলেন।

রিলিফ প্রধান উঠে দাঁড়িয়ে তাঁকে অভ্যর্থনা জানিয়ে বসালেন।

উভয়ের মধ্যে কিছুক্ষণ গোপন আলাপ চললো। চা-নাস্তা আগন্তুক খেলেন না। কারণ তিনি নাকি কোথাও কিছু খান না। তাই বিশেষ করে রিলিফ প্রধান তাঁকে পীড়াপিড়ি না করে নিজে কিছু গলধংকরণ করলেন।

কোন গোপন চুক্তি স্বাক্ষরিত হলো উভয়ের মধ্যে। বিদেশ থেকে এবার যে সাহায্যদ্রব্য আসছে তা জাহাজ থেকে খালাসের পূর্বেই হস্তান্তরের এই চুক্তিপত্র সমাধা হলো।

কয়েক কোটি টাকার পণ্যদ্রব্য কাজেই গোপনতার প্রয়োজন আছে বই কি!

এক সময় রিলিফ প্রধান সহ আগন্তুক ভদ্রলোক তাঁর গাড়িতে উঠে বসলেন। হয়তো বা কিছু অর্থ আজই রিলিফ প্রধান গ্রহণ করবেন বলেই তিনি গমন করলেন আগন্তুকের সঙ্গে।

গাড়িতে পাশাপাশি বসে আছেন দু'জন মহৎ ব্যক্তি। এঁরা দেশের স্বনামধন্য লোক। প্রথম তাঁরা গেলেন জাহাজঘাটিতে সেখানে জাহাজ থেকে মাল খালাস অফিসে কিছু আলাপ হলো সেখানের অফিসারের সঙ্গে। তারপর ফিরে চললেন তাঁরা।

রিলিফ প্রধান বললেন—দেখুন জনাব, একদল লোক হয়েছে যারা পরের ভাল দেখতে পারে না। কেউ বড় হোক এ তারা চায় না। আমাদের জাতটাই বড় হিংসুটে।

তা আর বলতে! সেই কারণে আমি আজও বাড়ি ঘর তেমন করিনি মানে ইমারত গড়িনি আর কি। থাকি অত্যন্ত সঙ্কীর্ণভাবে, কোনোরকমে যেন কেউ বুঝতে না পারে আমার অবস্থার কথা। আজ স্বচক্ষে দেখলেই বুঝতে পারবেন।

আজই আপনার ওখানে না গেলেই কি নয়?

এলেন যখন তখন চলুন দেখেই যান আমার অবস্থাটা। যদি কোনদিন প্রয়োজন মনে করেন সোজা চলে আসবেন গরিব খানায়।

কি যে বলেন গরিব আপনি! কোটি কোটি টাকার মালিক হয়ে.....

চুপ, জোরে বলবেন না, যদি কেউ শুনে ফেলে তাহলে বুঝতেই পারছেন.....আমাদের জাতটা বড় হিংসুটে কিনা, কারো ভাল দেখতে চায় না।

হাঁ, ঠিক বলেছেন জনাব। দেখুন রিলিফদ্রব্য বিভিন্ন কেন্দ্রে বিতরণ করার পূর্বে যৎসামান্য কিছু মাল আমি নিজের জন্য গ্রহণ করি এবং সেই মালামাল আপনাদের মত মহৎ ব্যক্তিদের কাছেই ছেড়ে দেই, এতে আমার যৎসামান্য পয়সা আছে। ও কিছু নয়, কারণ রাজধানীতে তিনটে বাড়ি করছি। জানেন তো এই দুর্দিনে অসাধারণ মূল্যে বাড়ি তৈরির দ্রব্যাদি ক্রয় করতে হচ্ছে। লোহা-চুন-সিমেন্ট সব অগ্নিমূল্য। তারপর দুটো ছেলে বিদেশে পড়াশোনা করছে, মাসে প্রায় পনেরো-বিশ হাজার পাঠাতে হয়। বড় মেয়ের বিয়ে দিয়েছি, গাড়ি-বাড়ি এবং বিশ ভরি সোনার গয়না দিতে হয়েছে। মেজো মেয়ে ডাক্তারী পড়ছে, তার খরচ আছে। বাকি আরও তিনটা ছেলেমেয়ে কলেজে পড়ছে তাদের পড়ার খরচ। এ ছাড়া বুঝতেই পারছেন সংসারের খরচ। ভদ্রভাবে বসবাস করতে গেলে মাসে আট ন' হাজার টাকায় হতে চায় না। স্ত্রীর ইচ্ছে বিলেতে দু'ছেলের জন্য দুটো গাড়ি করে কিন্তু মাস গেলে যা পাই ও কিছু না, তিন চার হাজার মাত্র, ওতে কি সব কিছু গুছিয়ে চলে?

সত্যিই বড় আফসোস, জনসাধারণ আপনার আমার ব্যথা বুঝে না তারা শুধু পাবার জন্য উন্মুখ হয়ে আছে সর্বক্ষণ। রিলিফ দাও না হলে মরে যাবো, তাই না?

হাঁ ঠিক বলেছেন, ওরা মরে যাওয়াই ভাল। যাদের জীবনের কোন দাম নেই, নেই কোনো ভবিষ্যৎ, তারা বেঁচে থেকে কি হবে বলুন? ওসব আবর্জনা পৃথিবীতে না থাকাই ভাল, মরে যাওয়াই শ্রেয় ওদের।

এই তো এসে গেছি। বললেন আগন্তুক ভদ্রলোক।

গাড়ি থামলো একটি চুনবালি খসে পড়া বাড়ির সম্মুখে।

রিলিফ প্রধান মনে মনে নাক সিটকালেও মুখে তিনি ভদ্রতার খাতিরে কিছু বললেন না, কারণ যিনি কোটি কোটি টাকা দেবার জন্য চুক্তিবদ্ধ হয়েছেন তিনি সাধারণ মানুষ নন, এটুকু আঁচ করে নিয়েছেন রিলিফ প্রধান।

গাড়ি থেকে নেমে ভদ্রলোক গাড়ির দরজা খুলে ধরে বললেন—নামুন।

নামলেন রিলিফ প্রধান।

ভদ্রলোককে অনুসরণ করে এগিয়ে চললেন রিলিফ প্রধান।

অপরিচ্ছন্ন একটি গাড়ি। যতই এগুচ্ছেন রিলিফ প্রধান ততই তিনি বিস্মিত হচ্ছেন, এমন বাড়িতে মানুষ থাকে নাকি। উঠান এবং ঘরদোর দেখে কেমন যেন ভূতুড়ে বাড়ি বলে মনে হতে লাগলো তাঁর কাছে।

তিনি উঠানে ইট-পাটকেলের সঙ্গে বারবার হোঁচট খাচ্ছিলেন। কেমন যেন জঙ্গলে ভরা উঠান। কতদিন যে পরিস্কার করা হয়নি তার ঠিক নেই। বললেন তিনি—এখানে আপনি থাকেন?

হাঁ জনাব; দুঃস্থ জনগণকে ফাঁকি দেবার জন্যই তো আমি এই পথ অবলম্বন করেছি। নাহলে একদিন আমার দেহের মাংস ওরা ছিঁড়ে খাবে না?

আপনি দেখছি বড্ড ভীতু। ওদের সাধ্য কি আপনাকে বিরক্ত করে? দেখেছেন তো আমাদের বাড়ি.....

বাড়ি বলছেন কেন ইমারত বলুন, বাড়িটা যেন কেমন তুচ্ছ শোনায। বলুন তারপর?

হাঁ, ঠিক বলেছেন বাড়ি কথাটা সত্যি কেমন যেন শোনায। বাড়ি বলবে ঐ চাষারা যারা ক'ব জানে না।

বলুন তারপর?

হাঁ, আমাদের ইমারতের চারপাশে সুউচ্চ প্রাচীরের মাথায় কাঁটাতারের বেড়া...

তার উপরে বেশ কলমি লতার মত কি যেন গাছ-গাছড়া দেখেছি বলে মনে হলো না?

ওগুলো কলমি লতা নয়—মানি প্ল্যান্ট।

মানি প্ল্যান্ট! মানি প্ল্যান্ট মানে টাকার গাছ। টাকার আবার গাছ আছে নাকি?

টাকার গাছ নয়, নামটা ঐ রকম।

ও, তাই বলুন—আমি মনে করেছিলাম টাকার গাছ আর টাকার গাছই যখন আপনার কাঁটাতারে শোভা বর্ধন করছে, তবে...মানে গরিবের মুখের খাবার, মানে রিলিফ দ্রব্য এভাবে হরণ করার কি প্রয়োজন ছিলো। তাহলে এগুলো ঠিক টাকার গাছ নয়?

না না, টাকার গাছ নয়, তবে নাম মানি প্ল্যান্ট। হাঁ, কি বলছিলাম যেন?

ও ভুলে গেছেন বুঝি? বলছিলেন ঐ দুঃস্থ নামক ব্যক্তিদের সাধ্য কি আপনাদের গেট পেরিয়ে বিরক্ত করে।

হাঁ হাঁ, ঠিক তাই, গেটের ওপারে পৌছবার কোনো উপায় নেই ঐ অসভ্য জানোয়ারদের। গেটে রাইফেলধারী প্রহরী আছে, ওরা গেটের কাছে এগুলোই গলাধাক্কা দিয়ে বিদায় করে দেয়।

হাঁ, আপনি এবং আপনার মত মহৎ ব্যক্তির বড় বুদ্ধিমান।

আপনি কিছু.....

হাঁ, বলুন আমি কিছু মনে করবো না।

আপনি এখনও সেকেলে রয়েছেন, এত টাকা-পয়সার মালিক হয়েও.....

এরকম বাড়িতে বাস করি, তাই না?

হাঁ, সত্যি বড় অবাক লাগছে।

আরও অবাক লাগবে ভিতরে আসুন। ভদ্রলোক সম্মুখের একটি কক্ষমধ্যে প্রবেশ করলেন এবং রিলিফ প্রধানকে ভিতরে প্রবেশ করার অনুরোধ জানিয়ে বললেন—এটা আমার হলঘর, মানে বসবার ঘর।

বিশ্বয়ভরা কণ্ঠে বললেন রিলিফ প্রধান—এই ঘর আপনার বসবার?
চেয়ারগুলো সব হাতলভাঙ্গা রংচটা, কোনোটার পায় নড়বড় করছে।

আরও অবাক হবেন অন্তপুরে প্রবেশ করলে।

অন্তপুরে! আপনি কি.....

না, এখানে আমার স্ত্রীপুত্র নেই, আপনি বিনা দ্বিধায় প্রবেশ করুন।

লোকজন দেখছিনা কেন?

আমার লোকজন নেই।

আপনি একা?

সম্পূর্ণ একা নই, তবে উপস্থিত একাই বটে।

আমাকে তবে কেন এখানে নিয়ে এলেন বলুন তো?

নিভূতে আলাপ জমবে ভাল তাই.....কেন ভয় পাচ্ছেন নাকি?

না না ভয়—ভয় পাবো কেন? আপনি মহৎ ব্যক্তি।

কিন্তু আপনার চেয়ে মহৎ হতে পারলাম কই।

আপনাকে যেন কেমন মনে হচ্ছে।

তাই নাকি?

এ আপনি কোথায় নিয়ে এলেন আমাকে?

বললাম তো আমার বাড়ি।

কিন্তু.....

কোনো অসুবিধা হবে না আপনার। আপনি যা ভালবাসেন তাই পাবেন।
বলুন তো কি কি আপনি ভালবাসেন?

আপনার কথাগুলো বড় হেঁয়ালিপূর্ণ মনে হচ্ছে।

যা জিজ্ঞাসা করলাম তারই জবাব দিন—কি ভালবাসেন আপনি?

আমি কি ভালবাসি এ প্রশ্ন করছেন কেন, আপনি কি?

হাঁ, আমি তাই দেবো আপনাকে।

সত্যি?

হাঁ, বলুন কি চান আপনি? অর্থ না সোনাদানা?

মাল না পেতেই আমাকে আপনি.....

হাঁ, যা চাইবেন তাই দেবো আমি।

আপনার কথা আমার বিশ্বাস হচ্ছে না।

বিশ্বাস না হবার কারণ কি—আমার এই অপরিচ্ছন্ন বাড়িঘর?

না না, তা নয়.....

বলুন থামলেন কেন?

কি বলবো?

ঐ যে ভালবাসেন আপনি সোনাদানা না অর্থ?

সোনাদানাই তো অর্থের মূল, কাজেই সোনা পেলে.....

বেশি খুশি হন, তাই না?

রিলিফ প্রধান কোনো উক্তি উচ্চারণ না করলেও তাঁর মুখোভাব প্রসন্ন মনে হলো কিন্তু কোথায় যেন বাঁধছে, কেমন যেন একটু সন্দেহের ছোঁয়াচ লাগছে তাঁর মনে। ভদ্রলোকের কথাগুলো খুব সচ্ছ মনে হচ্ছে না।

ভদ্রলোক বললেন—চলুন, এবার অন্তঃপুরে চলুন।

রিলিফ প্রধান সন্দিগ্ধ মনে পা বাড়ালেন।

এগিয়ে চললেন ভদ্রলোক, তাঁকে অনুসরণ করলেন রিলিফ প্রধান। অন্তঃপুরে এগুতেই দু'চোখ তাঁর কপালে উঠলো। সম্মুখভাগে অপরিচ্ছন্ন একটি বাড়ি মনে হলেও ভিতরে ঠিক বিপরীত। যদিও ঐশ্বর্যের বালাই বলে কিছু নেই কিন্তু বাড়ির দেয়াল ও মেঝে আর জানালা-কপাট দেখে বিস্মিত হলেন জমকালো আবলুস পাথরে তৈরি রাজপ্রাসাদসম অন্তঃপুর মেঝেতে পা পিছলে যায় আর কি! অদ্ভুত সে বাড়ি, চক্ষুস্থির রিলিফ প্রধানের।

ভদ্রলোকের সঙ্গে এগুতে এগুতে তিনি অবাধ হয়ে গেছেন একেবারে। একি আশ্চর্য অদ্ভুত রাজপ্রাসাদ, এ বাড়ির তুলনায় তাঁর বাড়ি খেলনা বলে মনে হচ্ছে যেন।

ভদ্রলোক মাঝে মাঝে রিলিফ প্রধানের মুখে দৃষ্টি নিক্ষেপ করে দেখছিলেন, মৃদু মৃদু হাসছিলেন তিনি।

বিরাট বিরাট কক্ষ পেরিয়ে এগিয়ে চলেছেন ভদ্রলোক।

রিলিফ প্রধান দু'চোখ গোলাকার করে এগুচ্ছিলেন, এবার তিনি বললেন, এ বাড়ি আপনার?

যদি মনে করেন তবে তাই। হাঁ, এবার বলুন কি চান। একটা কক্ষের দরজা খুলে দিলেন ভদ্রলোক।

সঙ্গে সঙ্গে অক্ষুট শব্দ করে উঠলেন রিলিফ প্রধান—এত সোনা! এত মোহর.....

হাঁ, যত খুশি গ্রহণ করুন। যান ভিতরে যান। ভদ্রলোক নিজে দরজায় দাঁড়িয়ে রিলিফ প্রধানকে অনুরোধ জানানলেন।

রিলিফ প্রধান স্বপ্ন দেখছেন না সত্য কিছু যেন ভেবে পাচ্ছেন না। তিনি বললেন—ইচ্ছামত নেবো আপনি তা দেবেন কেন?

আপনি যখন ভাগ্যহত দুঃস্থ মানুষের মুখের গ্রাস আমার হাতে সব তুলে দেবেন বলে কথা দিয়েছেন তখন আমিও আপনাকে এই কক্ষের সব সোনাদানা মোহর তুলে দিচ্ছি—গ্রহণ করুন, যান ভিতরে যান।

রিলিফ প্রধান একবার তাকিয়ে দেখলেন ভদ্রলোকের মুখে, তারপর ভিতরে প্রবেশ করলেন কম্পিত পদক্ষেপে। তিনি যেন কিছুতেই নিজের চোখকে বিশ্বাস করতে পারছেন না। এত মোহর তিনি দেখেননি কোনোদিন। কক্ষমধ্যে প্রবেশ করে রিলিফ প্রধান দু'হাত ভরে মোহর তুলে নিলেন। হাত দু'খানা তুলে ধরলেন চোখের সামনে।

ঠিক ঐ মুহূর্তে ভদ্রলোক দরজার একপাশে হাত দিলেন, সঙ্গে সঙ্গে লৌহশিকবিশিষ্ট একটি দরজা উঠে এলো মাটির নিচ থেকে। দরজার ওপাশে চমকে উঠলেন রিলিফ প্রধান, বিস্ময় ভরা চোখে দেখলেন তিনি বন্দী হয়ে গেছেন। হাতের মোহরগুলো আপনা আপনি যেন পড়ে গেলো তাঁর হাত থেকে, অবশ্য তিনি ভীষণভাবে ভড়কে গেছেন বলেই হাত দুখানা অবশ হয়ে গেছে। বললেন তিনি—কে আপনি? আমাকে এভাবে বন্দী করলেন কেন?

মুখের দাঁড়ি আর মাথার টুপি খুলে ফেললেন ভদ্রলোক, তারপর দাঁতে দাঁত পিষে বললেন—আপনি বন্দী নন, দস্য বনহরের স্বর্ণাগারে আপনি অতিথি।

দস্য বনহর! আপনি...তুমি...তুমি দস্য বনহর!

হাঁ, সন্দেহের কোনো কারণ নেই। রিলিফ প্রধান, প্রচুর অর্থের প্রয়োজনে আপনি দেশের অগণিত অসহায় মানুষের মুখের গ্রাস আত্মসাৎ

করে নিজের উন্নতি সাধন করেছেন। বিলেতে বাড়ি কিনছেন, বিদেশে ছেলে রেখে লেখাপড়া শেখাচ্ছেন, মেয়ে বিয়ে দিয়েছেন গাড়িবাড়ি যৌতুক দিয়ে, মেয়েকে ডাক্তারী পড়াচ্ছেন, ছেলেমেয়েদের কলেজে পড়াচ্ছেন। ভাই-ভাতিজা, আত্মীয়-স্বজন ওদিকে না খেয়ে মরছে সে খবর রাখা প্রয়োজন মনে করেন না। মনে করেন না দেশের জনগণের কথা—ওরা তো পৃথিবীর বুকে আবর্জনা স্বরূপ, তাই না?

এ সব আপনি, মানে তুমি কি বলছো বাবা? তোমার সব কথা হেঁয়ালিপূর্ণ মনে হচ্ছে.....

এখনও না বুঝার ভান করছেন! শুনুন, এই সোনা সব আপনাকে দিলাম কিন্তু এই কক্ষ থেকে আপনি বের হতে পারবেন না। আপনি ইচ্ছামত যত পেটে ধরে সোনাদানা এবং মোহর ভক্ষণ করতে পারেন। আপনি আমার মহামান্য অতিথি, কাজেই আপনার স্থান এই স্বর্ণকক্ষে.....বনহর দরজার পাশে দ্বিতীয় একটি বোতামে চাপ দিলো, সঙ্গে সঙ্গে কক্ষের দরজা বন্ধ হয়ে গেলো।

দরজা বন্ধ হবার মুহূর্তে শোনা গেলো রিলিফ প্রধানের ক্ষীণ আত্মকণ্ঠস্বর—একি হলো আমার ভাগ্যে.....

এরপর আর কিছু শোনা গেলো না। বনহর সরে গেলো সেখান থেকে।



সর্দার, আকাস হাজারীকে আর কতদিন বন্দী করে রাখা হবে? আদেশ করুন এবার তাকে খতম করে দেই?

না রামসিং, এখনও তাকে পৃথিবী থেকে বিদায় দেবার সময় আসেনি, কারণ জম্বুর শয়তানদের সবগুলো সন্ধান এখনও পাইনি। আকাস হাজারীর কাছে অনেক কিছু জেনে নেওয়ারও বাকি আছে। শোন রামসিং, যে চিঠিগুলো আকাস হাজারীর কাছ থেকে নেওয়ার কথা ছিলো, নিয়েছো?

নিয়েছি সর্দার ।

চিঠিগুলো ঠিকভাবে ঠিকানা অনুযায়ী পৌছে দিও ।

আচ্ছা সর্দার ।

ঠিকভাবে চিঠি বিতরণ করো সাবধানে, বুঝলে?

বুঝেছি সর্দার ।

যাও ।

রামসিং বেরিয়ে যায় ।

ঐ মুহূর্তে কক্ষমধ্যে প্রবেশ করে হায়দার আলী । অভিবাদন জানিয়ে বলে—সর্দার, নতুন সুড়ঙ্গপথ তৈরি প্রায় শেষ হয়ে এসেছিলো, কিন্তু...

কিন্তু কি বলো?

সুড়ঙ্গ খননকারী মেশিন বিকল হয়ে গেছে । অচিরে মেশিন চালু না হলে ভূগর্ভ ঘাটির ভীষণ ক্ষতি হবে সর্দার ।

বলো কি হায়দার, মেশিন বিকল হয়ে গেছে, এতে সর্বনাশ হবে—জন্মের ভূগর্ভ দূর্গে আমার প্রায় দেড়শত অনুচর রয়েছে, তারা যে মৃত্যুবরণ করবে ।

সর্দার উপায়?

ইঞ্জিনিয়ার কামরুল মেশিন দেখেনি?

সে ভোর থেকে চেষ্টা চালাচ্ছে তবু মেশিন চালু করতে পারছে না । সে ছাড়াও আওরঙ্গ দেখেছে এবং প্রাণপনে মেশিন মেরামত করার প্রচেষ্টা করছে কিন্তু কিছুতেই মেশিন মেরামত হচ্ছে না । মেশিনের কোথায় কি ঘটেছে তাও বুঝতে পারছে না তারা ।

বনহর বললো—চলো দেখি ।

হায়দার আলী বনহরকে অনুসরণ করলো ।

এগিয়ে চললো ওরা দু'জন ।

প্রশস্ত সুড়ঙ্গপথ ।

দু'জন পাশাপাশি এগিয়ে চলেছে । বনহর বললো—সম্মুখ সুড়ঙ্গপথ এখনও বন্ধ করে দাওনি?

সম্ভব হয়নি সর্দার ।

কেন?

নতুন সুড়ঙ্গপথ তৈরি শেষ না হলে.....

বুঝেছি কিন্তু বড় বিলম্ব হয়ে গেলো হায়দার আলী। আমি চাই দস্যুরাণী যেন কোনোক্রমে জম্মু আস্তানার পথ খুঁজে না পায়।

সর্দার, আমরা আপনার নির্দেশমতই কাজ করে চলেছি। এক সপ্তাহ অবিরাম প্রচেষ্টা চালিয়ে সুড়ঙ্গপথ বন্ধ করে দেওয়া হয়েছে। আর অপর দিকের গোপন পথ তৈরি হচ্ছে। মেশিন বিকল না হলে আর দু'তিন দিনের মধ্যেই কাজ শেষ হয়ে যেতো...

হাঁ, যত শিগগির সম্ভব সুড়ঙ্গ পথের কাজ সমাধা করতে হবে। সুড়ঙ্গের মুখ থাকবে জম্মু পর্বতের তলদেশে হিমসা জঙ্গলের দিকে, যে জঙ্গলে কোনোদিন সূর্যের আলো প্রবেশ করেনি।

সর্দার, তাই করা হচ্ছে কিন্তু মেশিন খারাপ হয়ে যাওয়ায় কাজ সম্পূর্ণ বন্ধ হয়ে আছে...

চলো দেখি কি হলো?

যেখানে সুড়ঙ্গ খনন কাজ চলছিলো সেখানে উপস্থিত হয়ে দেখলো বনহর, কয়েকজন অনুচর এবং দু'জন দক্ষ ইঞ্জিনিয়ার মেশিনটা কার্যক্ষম করে তোলার চেষ্টা চালিয়ে যাচ্ছে।

বনহর এসে দাঁড়াতেই ওরা তাকে অভিবাদন জানালো।

বনহর প্রধান ইঞ্জিনিয়ারকে জিজ্ঞাসা করলো—মেশিন মেরামত হলো?

না সর্দার। অনেক চেষ্টা করেও ধরতে পারছি না কোথায় কি হয়েছে।

ইঞ্জিনিয়ারগণ বনহরেরই দলের লোক। তারা এক এক জন বিদেশ থেকে ইঞ্জিনিয়ারিং ডিগ্রি নিয়ে এসেছে। বনহর তাদের সরে দাঁড়াতে বলে নিজে মেশিন পরীক্ষা করে দেখতে লাগলো। নিজেও সে কিছু কিছু এ সব কাজ জানতো, তাই সে চেষ্টা করে দেখতে লাগলো।

সুড়ঙ্গ খনন মেশিনটা ছিলো অত্যন্ত মূল্যবান এবং শক্তিশালী, ক্ষমতা সম্পন্ন—পৃথিবীর মধ্যে এমন মেশিন কয়েকটিমাত্র আছে, যা দিয়ে শত শত ফুট মাটির নিচে গভীর সুড়ঙ্গপথ তৈরি করা সম্ভব হয়, এমনকি সাগরতলেও এ মেশিন দ্বারা রেলপথ বা সুড়ঙ্গ পথ তৈরি করা হয়ে থাকে।

দস্যু বনহরের নিজস্ব ছিলো এই ক্ষমতাসম্পন্ন মেশিনটা এবং এটা ৭৫দিন পূর্ব হতেই আছে। বনহর নিজে মাঝে মাঝে এ মেশিন চালনা করে থাকে, অবশ্য যখন কোনো সুড়ঙ্গপথের দ্রুত প্রয়োজন হয়। কাজেই বনহর মেশিন চালনায় যখন দক্ষ তখন নিশ্চয়ই মেশিন মেরামতেও তার কিছু কিছু অভিজ্ঞতা আছে। বনহর নিজে মেশিনটা পরীক্ষা করে দেখতে শুরু করলো। ৫৮৭ চমকে উঠলো বনহর, মেশিনের ভিতরে একটি গুরুত্বপূর্ণ অংশ নেই, যার জন্য এত বড় শক্তিশালী যন্ত্রদানবটা একেবারে নিশ্চল হয়ে গেছে প্রাণহীন কোনো এক বিরাটকায় জন্তুর মৃত দেহের মত। ৫৮৭ বনহরের একটি জিনিসে লক্ষ্য পড়তেই এমনভাবে চমকে উঠেছিলো, সে জিনিসটা হলো বিকল যন্ত্রটির পাশে সূতো দিয়ে বাঁধা একটি ছোট চিঠি।

বনহর চিঠিখানা খুলে নিলো সুতোর গিরো থেকে। আশ্চর্য হলো বনহর, এই শক্তিশালী বিরাটকায় মেশিনের মধ্যে এ চিঠি এলো কি করে। দ্রুতহস্তে খুলে ফেললো বনহর ছোট চিঠির ভাঁজখানা। মুহূর্তে তার মুখমণ্ডলে গভীর একটা ভাব পরিস্ফুটিত হলো, চিঠিখানা যেন তার সমস্ত দেহের রক্ত জমাট করে দিয়েছে, চিঠিতে লেখা আছে—

আমার চোখে ধুলো দেবার জন্য
তুমি সুড়ঙ্গমুখ বন্ধ করেছো
এবং নতুন সুড়ঙ্গপথ তৈরি
করছো—কিন্তু মনে রেখো বনহর,
আমাকে ধোঁকা দিতে পারবে না।

—দস্যুরাগী

—দস্যুরাগী! দস্যুরাগী কি করে এলো এখানে? হায়দার আলী চিঠিখানা পড়ে দেখো।

চিঠিখানা বনহর হায়দার আলীর হাতে দিলো। হায়দার আলীর মুখমণ্ডলে বিস্মিত ভাব ফুটে উঠেছে, দস্যুরাগী... অস্ফুট শব্দ করে উঠে সে।

বনহরের মুখে প্রথমে একটা বিস্ময় এবং ত্রুদ্ব ভাব পরিলক্ষিত হলেও অল্পক্ষণেই তা প্রশমিত হলো, বললো সে—এবার বুঝতে পারছি মেশিন

হঠাৎ এমন অকেজো হলো কি করে? হায়দার আলী, তোমাদের চোখে ধুলো দিয়ে এই নতুন সুড়ঙ্গপথেও দস্যুরাণী জন্ম আস্তানায় প্রবেশ করেছিলো তবে।

হায়দার আলীর মুখমণ্ডল লজ্জিত ও ভয়াত হয়ে উঠে, ললাটে ফুটে উঠে কয়েকটা চিন্তারেখা দড়ির মত শক্ত হয়ে, একবার সর্দারের মুখে দৃষ্টি নিক্ষেপ করে মাথা নত করে নেয় সে।

বলে বনহর—আমি জানতাম তোমরাও এমনি ভুল কোনো সময় করবে। প্রধান ইঞ্জিনিয়ার আওরঙ্গ এবং তাঁর সহকারী ইঞ্জিনিয়ার কামরুলকে লক্ষ্য করে বললো—নিশ্চয়ই এমন কোনো ব্যক্তি এসেছিলো এখানে যে মেশিনটাকে অকেজো করে দিয়ে গেছে এবং সেই ব্যক্তি স্বয়ং দস্যুরাণী। হায়দার, কেউ এসেছিলো এখানে?

না সর্দার, কেউ তো আসেনি, শুধু আমাদেরই লোকজন ছিলো এখানে। কে কে ছিলো নাম বলো।

রফিক নামক অনুচর লিষ্ট নিয়ে এলো এবং লিষ্ট দেখে নামগুলো উচ্চারণ করে বললো। সবাই তো জন্ম আস্তানার অনুচর, কেউ নতুন বা বাইরের লোক ছিলো না।

আওরঙ্গ এবং কামরুল দু'জনই অভিজ্ঞ ইঞ্জিনিয়ার—এরা বিদেশ থেকে শিক্ষা লাভ করে এসেছে অথচ তবু তারা ধরতে পারেনি মেশিনে কি গোলযোগ দেখা দিয়েছে। বনহর বললো—দস্যুরাণী মেশিনের মূল্য যন্ত্র বিকল করে দিয়েছে, যন্ত্রটি অত্যন্ত ক্ষুদ্র হলেও মেশিনটি চালু রাখার একমাত্র সহায়ক। সেই ক্ষুদ্র যন্ত্রটি শুধু অকেজোই সে করে দেয়নি, যন্ত্রটি সে খুলে নিয়েছে.....

বলে উঠে হায়দার আলী—আশ্চর্য কথা সর্দার, কারণ সব সময় এখানে আমাদের লোক ছিলো। দস্যুরাণী কখন কিভাবে এখানে প্রবেশ করেছিলো একেবারে বিস্ময়কর সর্দার।

তোমরা কি জানো না পৃথিবীতে বিস্ময়কর কিছু নেই। যাদুকরগণ কিভাবে শত শত দর্শকের চোখে ভেঙ্কি লাগিয়ে যাদুবিদ্যার কারসাজি

দেখিয়ে মানুষকে তাক লাগিয়ে দেয়—তেমনি দস্যুরাণী তোমাদের চোখেও ভেসে লাগিয়ে এ কাজ সমাধা করেছে। মেশিন বিকল হবার পূর্ব মুহূর্তে কে ছিলো মেশিনে?

হারুন নামক অনুচর বললো—ইঞ্জিনিয়ার কামরুল ছিলো তখন এবং অন্যান্য আরও কয়েকজন ছিলো, তারা মেশিনে ছিলো না।

বনহর ফিরে তাকালো ইঞ্জিনিয়ার কামরুলের দিকে, তারপর ধীরে ধীরে দৃষ্টি ফিরিয়ে নিলো মেশিনটার দিকে। কামরুল তখন মেশিনটার একপাশেই দাঁড়িয়ে ছিলো। বনহর মেশিনটার দিকে লক্ষ্য করে পুনরায় ফিরে তাকালো কামরুলের মুখে, তারপর সে অনুচরদের বেরিয়ে যাবার জন্য নির্দেশ দিলো।

আদর্শে পালন করলো অনুচরগণ।

সবাই বেরিয়ে যেতেই বনহর দ্রুতহস্তে রিভলবার বের করে চেপে ধরলো কামরুলের বুকে—রাণীজী তুমি! ভেবেছিলে আমার চোখে ধুলো দিয়ে সরে পড়বে কিন্তু মনে রেখো এই তোমার শেষ আমার আস্তানায় প্রবেশ।

পুরুষবেশী দস্যুরাণী মুহূর্তের জন্য কিংকর্তব্যবিমূঢ় হলেও নিজকে সামলে নিলো সে অল্পক্ষণেই। দীপ্ত দৃঢ়কণ্ঠে বললো কামরুলবেশী দস্যুরাণী—বনহর, তুমি আমাকে চিনতে পারবে এ আমি জানতাম কিন্তু আমি জানি আমাকে তুমি বন্দী করতে পারবে না।

তাই নাকি?

হাঁ বনহর এবং জানি তুমি আমাকে বন্দী করে রাখতে পারবে না আর পারবে না বলেই আমি তোমার আস্তানায় প্রবেশ...

দস্যুরাণীর মুখের কথা কেড়ে নিয়ে বলে বনহর—আমার আস্তানায় প্রবেশের দুঃসাহস করেছে। হঠাৎ বনহর হেসে উঠলো, তারপর দাঁতে দাঁত পিষে বললো—রাণীজী, তোমার সাধ্য নেই তুমি আমার আস্তানা থেকে বেরিয়ে যাও। আমি তোমাকে এই মুহূর্তে বন্দী করলাম।

দস্যুরাণীর বুকে বনহরের রিভলবারের আগা তখনও ঠেকে আছে। দস্যুরাণী তাকালো বনহরের চোখ দুটোর দিকে। দীপ্ত উজ্জ্বল নীল দুটি চোখ, বলিষ্ঠ মুখমণ্ডল, একরাশ ঘন চুল ছড়িয়ে ওর ললাটে।

হেসে বললো বনহর—কি দেখছো?

তোমাকে ।

আমাকে?

হাঁ ।

কিন্তু কেন?

তোমার ঐ সুন্দর রূপ দিয়ে তুমি নারীদের মন জয় করে নাও এবং করো তাদের সর্বনাশ.....

এসব তুমি কি বলছো রাণীজী?

যা সত্যি তাই বলছি কিন্তু মনে রেখো বনহর, আর তুমি পারবে না তোমার সৌন্দর্য দিয়ে নারীমনকে জয় করতে ।

রাণীজী, এ তোমার সম্পূর্ণ ভুল ধারণা ।

না, আমি জানি তুমি.....

খবরদার, কোনো অশ্লীল বাক্য উচ্চারণ করবে না রাণী.....

তাহলে আমাকে তুমি কেন বন্দী করতে চাও? যদি আমার প্রতি তোমার কোনো দুর্বলতা না-ই থাকে তবে আমাকে...

মুক্তি দেবো, এই তো?

দস্যুরাণী কোনো কথা উচ্চারণ করে না ।

বনহর বলে উঠে—রাণীজী, তুমি নিজে এসে ধরা দিলে, এ আমার সৌভাগ্য । বনহর কলিং বেলে হাত রাখতে যাচ্ছিলো, ঐ সময় দস্যুরাণী বলে উঠে—বনহর, জানি তুমি তোমার অনুচরদের আহ্বান জানানোর জন্য ঐ কলিংবেল টিপতে যাচ্ছিলে । ওরা এলে আমাকে বন্দী করে কৃত্তিব লাভ করবে? বনহর, জানি তুমি একজন বিশ্ববিখ্যাত দস্যু হলেও তুমি একজন মহৎপ্রাণ মানুষ.....

এ কথা তুমি স্বীকার করো তাহলে?

যা সত্য না করে উপায় নেই । বনহর, তোমার এবং আমার উদ্দেশ্য এক, তাই একটি কথা বলবো বলেই এসেছি এবং তোমাকে নিভূতে কাছে পাবো বলে আমি তোমার সুড়ঙ্গ খনন মেশিনটা বিকল করেছি ।

দু'চোখে বিশ্বয় নিয়ে তাকিয়ে থাকে বনহর দস্যুরাণীর মুখের দিকে !

দস্যুরাণী বলে চলে—জন্ম আস্তানার সুড়ঙ্গমুখ বন্ধ করে দিচ্ছে যেন আমি তোমার আস্তানার পথ খুঁজে না পাই। বনহর, যেমন তোমার চোখকে ফাঁকি দেওয়া আমার পক্ষে সম্ভব হলো না, তেমনি আমার দৃষ্টিকেও তুমি এড়িয়ে চলতে পারবে না। সুড়ঙ্গপথ তুমি বন্ধ করো কিন্তু আমার গতিরোধ করতে তুমি সক্ষম হবে না।

তার প্রমাণ পেলাম, তুমি সত্যিই দস্যুরাণী বটে! বলো তুমি কি চাও আমার কাছে?

যে রক্তে আঁকা ম্যাপের জন্য তুমি আমার পিছু ধাওয়া করেছো আমি তোমাকে অনুরোধ করছি তুমি ঐ ম্যাপ সম্বন্ধে সবকিছু ভুলে যাও।

ও এই কথা!

হাঁ, বনহর, আমাদের উভয়ের উদ্দেশ্যই যখন এক তখন তুমি আমাকে এ ব্যাপারে সহায়তা করবে বলেই আশা করি, আর তেমনই এক মহান ভরসা নিয়েই আজ আমি এসেছি। বনহর, আশা করি তুমি আমাকে বিমুখ করবে না।

দস্যুরাণীর কথাগুলো বনহর মনোযোগ সহকারে শুনে যাচ্ছিলো। স্থির দৃষ্টি মেলে তাকিয়ে ছিলো সে ওর মুখের দিকে। দস্যুরাণীর ছদ্মবেশ অতি নিখুঁত হয়েছিলো, সাধ্য নেই কেউ তাকে নারী বলে বুঝতে পারে। বনহর অবাক না হয়ে পারেনি, তাই সে নির্বাক হয়ে গিয়েছিলো কতকটা।

দস্যুরাণী তবু বলে চলেছে—আমি শপথ করছি, তুমি আমার রক্তে আঁকা ম্যাপ থেকে বিরত হও আমি কোনোদিনই তোমার চলার পথে এসে দাঁড়াবো না।

বেশ, তাই হবে। বিশেষ করে আমাদের উদ্দেশ্য যখন এক তখন আমি তোমার সঙ্গে সন্ধি করতে রাজি আছি, কিন্তু একটি কথা রাখতে হবে তোমাকে...

বলো বনহর।

মস্তনর আস্তানা তোমাকে সরিয়ে নিতে হবে। জানি এতে তোমার ক্ষতি হবে অনেক—শুধু অনেক নয় সীমাহীন, তবু এ কাজ তোমাকে করতে হবে।

বনহর!

হাঁ রাণীজী, কারণ তুমি জানতে চেও না। চাইলেও আমি তা বলবো না।

কিন্তু.....

জানি মস্থনায় তোমার অনেক দান আছে। মস্থনার হাসপাতাল সে তোমারই তৈরি। মস্থনা থেকে মান্‌হা পর্বতের মধ্যে যে সুপ্রশস্ত সুদীর্ঘ পথ সেও তোমারই দান, তবু তোমাকে মস্থনা ত্যাগ করতে হবে দস্যুরাণী।

বেশ, তবু যদি তুমি আমার রক্তে আঁকা ম্যাপ থেকে সরে আসো।

হাঁ, আমি রক্তে আঁকা ম্যাপ থেকে নিজেকে সংযত করলাম। দস্যুরাণীর দিকে হাত বাড়িয়ে দিলো—এসো এবার সন্ধি...

দস্যুরাণীও হাত বাড়িয়ে দিলো বনহরের দিকে।

বনহরের বলিষ্ঠ হাতের মুঠায় দস্যুরাণীর হাতখানা মিলিত হলো।

বনহর বললো পুনরায়—চলো রাণীজী, তোমাকে আস্তানার বাইরে পৌঁছে দিয়ে আসি।

একটু অপেক্ষা করো বনহর তোমার সুড়ঙ্গপথ খনন মেশিনটা মোরামত করে দিই।

ও তোমাকে করতে হবে না রাণীজী। তুমি যে ক্ষুদ্র অংশ খুলে নিয়ে ওটাকে বিকল করেছিলে শুধু ওটা ফিরিয়ে দাও।

দস্যুরাণী পকেট থেকে ক্ষুদ্র একটা মেশিন বল বের করে বনহরের হাতে দিলো, তারপর ওরা দু'জনা এগিয়ে চললো পাশাপাশি।



সর্দার!

বলো হায়দার আলী?

দস্যুরাণীকে আপনি হাতে পেয়েও ছেড়ে দিয়েছেন, এ কেমন কথা। আরও শুনলাম সেই নাকি ইঞ্জিনিয়ার কামরুলের বেশে.....

এত কথা কে তোমাকে বললো হায়দার আলী?

সর্দার সব আমি শুনেছি।

বুঝেছি, রহমান তোমাকে বলেছে।

হাঁ সর্দার। বলুন কেন আপনি তাকে এমনভাবে ক্ষমা করলেন?

ক্ষমা নয় হায়দার আলী সন্ধি, বুঝলে.....

দস্যুরাণীর সঙ্গে সন্ধি!

বেমানান মনে হচ্ছে, না?

সর্দার!

জানি দস্যুরাণীকে বন্দী করার জন্য আমি উন্মুখ, সেও তেমনি আমাকে বাগে পেলে কমে ছাড়বে না তবু কেন সন্ধি করলাম জানতে চাও?

হাঁ সর্দার।

তোমরা সবাই জানো দস্যুরাণী এবং আমার উদ্দেশ্য এক, কাজেই আমি চাইনা আমাদের উভয়ের মধ্যে কোনো বিবাদ থাকে। অনেক ভেবে দেখলাম রক্তে আঁকা ম্যাপ তার কাছে থাকাই শ্রেয় কারণ সেও ঐ ধনসম্পদ দুঃস্থ জনসেবায় বিলিয়ে দেবে তাতে কোনো সন্দেহ নেই। তবে একটি শর্ত আমি তাকে পালন করতে বলেছি সে হলো মস্থনা দ্বীপ তাকে ত্যাগ করতে। কারণ তাকে না বললেও তোমাকে বলতে চাই এবং এক্ষুণি বলবো।

সর্দার একটি কথা তার পূর্বে আমি বলতে চাই।

বেশ বলো?

দস্যুরাণী আমাদের দ্বিতীয় সুড়ঙ্গপথ কি করে আবিষ্কার করেছিলো?

হাঁ, এ কারণেই আমি তাকে হত্যা না করে তার সঙ্গে সন্ধি স্থাপন করেছি জেনেছি সে আমার চেয়ে বুদ্ধিমত্তায় দুর্বল নয় এবং এ কারণেই আমি তাকে মস্থনা ছেড়ে চলে যাবার জন্য বলেছি। সে যদি মস্থনা ত্যাগ না করে তাহলে আমি তার সঙ্গে কোনো সন্ধি রাখতে রাজি নই। অবশ্য বিনা কারণে তাকে এ নির্দেশ দেই নি হায়দার আলী।

জানি সর্দার, আপনি বিনা কারণে এমন কোনো কাজ করেন না আমরা জানি। সর্দার তবু জানতে চাই দস্যুরাণী মস্থনা ত্যাগ না করলে

আমাদের এমন কি ক্ষতি ছিলো তাই না?

হাঁ সর্দার।

হায়দার আলী, তুমি যখন জানতে চাইছো তখন না বলে পারছি না। দস্যুরাণী আমার চেয়ে বুদ্ধিমত্তায় কম নয়। পূর্বেই বলেছি শক্তিতে ঠিক আমার সমকক্ষ না হলেও যথেষ্ট শক্তি তার আছে, কাজেই আমি চাই না আমার অবর্তমানে দস্যুরাণী আমার জম্বুর আস্তানায় প্রবেশ করে এবং তোমাদের কোনো ক্ষতি সাধন করতে সমর্থ হয়। জানি সে যখন প্রথম বার আবার আস্তানা খুঁজে বের করে নিয়েছে তখন দ্বিতীয় কিংবা তৃতীয় বার আস্তানার সুড়ঙ্গপথ খুঁজে নিতে তার বেশি বিলম্ব হবে না। একটু থেমে বললো বনহর—এ ছাড়া মন্তুনা তার রাজ্য নয় যদিও সে মন্তুনার অনেক কাজ করেছে। মন্তুনা আমার জম্বু আস্তানার এক অংশ।

তাহলে দস্যুরাণী কি মন্তুনার আস্তানা গুটিয়ে নিয়ে বিদায় নেবে সর্দার?

না নিলেও আমি তাকে চলে যেতে বাধ্য করছি। সে যদি মন্তুনা ত্যাগ না করে তা হলে তার পরম যত্নের সম্পদ রক্তে আঁকা ম্যাপ সে হারাবে।

এমন সময় রামসিং এসে সালাম জানালো।

বনহর বললো—চিঠিগুলো ঠিকমত পৌছে দিতে সক্ষম হয়েছে তো?

হাঁ সর্দার, হয়েছে।

বেশ, এবার আমি কাজ শুরু করবো। রহমান কোথায়?

সেও ফিরে এসেছে।

আচ্ছা তুমি এখন যাও।

হায়দার আলী বলে উঠে—সর্দার আমিও কি এখন যেতে পারি?

যাও তোমরা সবাই প্রস্তুত থেকো।

আচ্ছা সর্দার। কথাটা উচ্চারণ করে বেরিয়ে গেলো হায়দার আলী এবং রামসিং।

বনহর আপন মনে পায়চারী করে চললো। বনহরের শরীরে জমকালো পোশাক মশালের লাল টক্টকে আলোতে অদ্ভুত দেখাচ্ছে। ওর প্রশস্ত ললাটে গভীর চিন্তার ছাপ ফুটে উঠেছে।

প্যান্টের পকেট থেকে বের করলো সিগারেট কেসটা। একটা সিগারেট নিয়ে ঠোঁটের ফাঁকে চেপে ধরে অগ্নিসংযোগ করলো, তারপর রাশিকৃত ধোঁয়ার মাঝে তলিয়ে গেলো সে।



হাজারী সাহেবের অন্তর্ধান নিয়ে জম্মুর নেতৃস্থানীয় শ্রেণীর মানুষ একেবারে হন্যে হয়ে উঠলেন। অকস্মাৎ হাওয়ায় উবে যাওয়ার মত যেন উবে গেছেন তিনি।

হঠাৎ কোথায় উধাও হলেন তিনি, কেউ জানেন না। হাজারী সাহেবই যে তাঁদের পথের দিশারী। তার অন্তর্ধান সবাইকে ভাবিয়ে তুললো।

পুলিশ মহলকে এইসব মহান নেতা নাচিয়ে তুললেন।

টেলিফোন এলো কোনো এক নেতার কাছ থেকে জম্মু পুলিশ প্রধানের কাছে—আপনারা যদি মিঃ হাজারী সাহেবকে খুঁজে বের করতে অক্ষম হন তাহলে আপনাদের প্রতি কঠোর ব্যবস্থা নেওয়া হবে।

পুলিশ প্রধানের পিছে চমকে গেলো। তিনি ফোন করলেন জম্মুর অন্যান্য পুলিশ অধিনায়কের কাছে। তারা তো ক’দিন থেকে হাজারী সাহেবের তল্লাশে জম্মু শহর এবং আশেপাশের গ্রামাঞ্চল চষে ফেলেছেন কিন্তু হাজারীর কোনো হদিস খুঁজে পাওয়া যায় নাই, হাজারী সম্পূর্ণ লাপাতা।

যে সব মহান ব্যক্তি হাজারী টিমের সঙ্গে জড়িত তাঁরা যেন দিশে হারা হয়ে পড়েছেন। কারণ হাজারীর নিরুদ্দেশ তাঁদের ব্যবসার সর্বনাশ ছাড়া কিছু নয়।

হাজারীকে নিয়ে যখন হাজারীটিমের মাথা বন বনিয়ে চক্র দিচ্ছে তখন তাঁদের হাতে এলো একখানা চিঠি।

চিঠি খুলে সবাই অবাক হলেন এ যে তাদের পথের দিশারী হাজারী সাহেবের হাতের লেখা। চিঠি খুলে পড়ে দু’চোখ তাঁদের চড়ক গাছ। চিঠিগুলোতে লিখা ছিলো—

বন্ধুগণ এতোদিন যে কাজ করেছি
 এবার তার প্রায়শ্চিত্ত করছি। নিজে-
 দের স্বার্থে অন্ধ হয়ে দুঃস্থ জনগণের
 মুখের গ্রাস নিয়ে ছিনিমিনি
 খেলেছি। শুধু আমি নই, আমাদের
 হাজারী টিমের সবাইকে প্রায়শ্চিত্ত
 করতে হবে। বন্ধুগণ, প্রস্তুত
 হয়ে নিন, বিচার সনিকটে:.....

‘পথের দিশারী হাজারী’

চিঠিতে কোনো ঠিকানা নেই। হাজারী সাহেব কোথায় আছেন এবং কি প্রায়শ্চিত্ত তিনি করছেন কিছুই বুঝা যায় না তাঁর চিঠিতে, তবে এটুকু সবাই বুঝতে পারেন হাজারী সাহেব জীবিত আছেন এবং অত্যন্ত দুর্বিসহ অবস্থায় তাঁকে রাখা হয়েছে।

হাজারী সাহেবের চিঠি পেয়ে হাজারী টিমের প্রধান অধিনায়ক ভিতরে ভিতরে ঘাবড়ে গেলেও মুখে যথাসম্ভব সাহস টেনে বললেন—কার এতবড় সাহস হাজারী সাহেবকে বন্দী করেছে...আমরাই হলাম কিনা জম্মুর হর্তা-কর্তা-বিধাতা, আমাদের কথায় পুলিশ মহল নাচের পুতুলের কাজ করে, আর কিনা দুষ্টিকারী আমাদের পথপ্রদর্শক হাজারী সাহেবকে আটক করে তাঁকে নাকানি চুবানি খাওয়াচ্ছে। আবার হাজারী সাহেবকে দিয়ে চিঠি লিখিয়ে আমাদের সবাইকে ভয় দেখানো হচ্ছে।

হাজারী টিমের অধিনায়কের কথা শেষ হয় না, দ্বিতীয় অধিনায়ক এসে হাজির হন। তাঁর চোখেমুখেও উত্তেজনার ছাপ। এক রকম প্রায় উঠিপড়ি করে এসেছেন দ্বিতীয় অধিনায়ক, তাই তিনি বেশ হাঁপিয়ে পড়েছেন।

প্রধান অধিনায়ক পায়চারী করছিলেন আর কথাগুলো আপন মনেই বলে যাচ্ছিলেন, এবার তিনি থমকে দাঁড়িয়ে বললেন—আপনি!

হাঁ এলাম, চিঠি...একটি চিঠি পেয়েছি। রীতিমত হাঁপাতে হাঁপাতে বললেন দ্বিতীয় অধিনায়ক।

প্রথম অধিনায়কের হাতের মুঠায় তখনও ছিলো সেই চিঠিখানা, তিনি বললেন—চিঠি।

হাঁ, হাজারী সাহেবের চিঠি পেয়েছি। যে হাজারী সাহেবের সন্ধানে আমরা মানে আমাদের লোক গোটা জম্বু চম্বে ফিরলো হঠাৎ তাঁরই লিখা চিঠি পেলাম এই দেখুন...পেকেট থেকে বের করলেন একটি ভাঁজ করা কাগজ।

এবার প্রধান অধিনায়ক বললেন—আমিও একটু পূর্বে হাজারী সাহেবের লেখা একটি চিঠি পেয়েছি। দেখি আপনার চিঠিতে কি লিখা আছে? প্রধান অধিনায়ক দ্বিতীয় অধিনায়কের হাত থেকে চিঠিখানা নিয়ে ঐক নিঃশ্বাসে পড়লেন। চিঠিখানা পড়ে নিয়ে বললেন—এই দেখুন একইভাবে লিখা আমাকেও তিনি পাঠিয়েছেন।

তারা যখন দু'খানা চিঠি নিয়ে আলোচনা করছেন তখন টেবিলে ফোন বেজে উঠলো ক্রিং ক্রিং করে।

রিসিভার তুলে নেন প্রধান অধিনায়ক। ...হ্যালো স্পিকিং হাজারী টিম অধিনায়ক.....

ওপাশ থেকে শোনা গেলো উত্তেজনাপূর্ণ কণ্ঠস্বর...হাজারী সাহেবের চিঠি পেয়েছি....

...হাজারী সাহেবের চিঠি।.....

• ...হাঁ এইমাত্র পেলাম.....

...কি লিখা আছে তাতে?.....

...আমি পড়ছি আপনি শুনুন.....

...বেশ পড়ুন.....

ওপাশ থেকে ভেসে এলো চিঠি পড়ছেন হাজারী টিমের তৃতীয় অধিনায়ক। চিঠি পড়া শেষ হলো।

প্রধান অধিনায়ক অস্ফুট কণ্ঠে বললেন...হ্যালো...আমিও একটু পূর্বে ঠিক ঐ ধরনের একটি চিঠি পেয়েছি এবং আমাদের আরও একজন পার্টনারও ঐ রকম চিঠি পেয়েছেন...আপনিও পেয়েছেন...সব যেন কেমন ঘোরালো লাগছে...আপনি এফুগি চলে আসুন.....

রিসিভার না রাখতেই বাইরে গাড়ির শব্দ শোনা গেলো। তারপর সিঁড়িতে জুতোর আওয়াজ, একটু পরেই কক্ষমধ্যে প্রবেশ করলেন হাজারী টিমের চতুর্থ অধিনায়ক।

সমস্ত দেহ তাঁর ঘামে ভিজে চুপসে উঠেছে। তিনি কিছুক্ষণ কথাই বলতে পারলেন না।

হাজারী টিমের প্রধান অধিনায়ক তাকে বসতে অনুরোধ জানালেন।

চতুর্থ অধিনায়ক আসন গ্রহণ করে রুমালে মুখ মুছলেন তারপর বললেন—বসুন কথা আছে।

হাজারী টিমের প্রধান অধিনায়ক আসন গ্রহণ করতে করতে বললেন সব বুঝতে পেরেছি, আপনিও চিঠি পেয়েছেন।

হাঁ চিঠি, কিন্তু আপনি কি করে বুঝতে পারলেন স্যার?

আমিও পেয়েছি শুধু আমি নই আমাদের আরও কয়েকজন অংশীদার তারাও পেয়েছেন.....

বলেন কি স্যার?

হাঁ, এই যে ইনিও পেয়েছেন.....হাজারী টিমের প্রধান অধিনায়ক দ্বিতীয় অধিনায়ককে দেখিয়ে বললেন এবং নিজ নিজ হাতের চিঠিগুলো দেখালেন।

চতুর্থ অধিনায়ক যেন হতভম্ব হয়ে পড়েছেন। তিনি এক এক করে তিনখানা চিঠিই পড়লেন। সবগুলোতে একই কথা লিখা আছে এবং তাঁরা সবাই হাজারী সাহেবের হাতের লেখাই দেখতে পাচ্ছেন।

একটু পূর্বে হাজারী টিমের তৃতীয় অধিনায়ক যিনি টেলিফোনে কথা বলেছিলেন তিনি সশরীরে এসে হাজির হলেন। আরও তিনজন অধিনায়ক এলেন কয়েক ঘন্টার মধ্যে। সবারই গাড়ি রয়েছে কাজেই জম্বুর মধ্যে যত দূরেই থাকুন না কেন তাদের প্রধান অধিনায়কের নিকটে হাজির হতে বেশি সময় লাগলো না।

সবাই জোট হলেন এসে।

হাজারী টিমের প্রধান অধিনায়ক তাঁর জৌলুসভরা হলঘরের কার্পেটে পায়চারী করছিলেন। চারপাশে সোফায় বসে আছেন হাজারী টিমের

অধিনায়কগণ। সবার চোখেমুখেই উত্তেজনার ছাপ ফুটে উঠেছে। কেউ বা সিগারেটের পর সিগারেট পান করে চলেছেন, কেউবা বারবার রুমালে মুখ মুছছেন, কেউ বা মাথার চুল ধরে টেনে ছিঁড়ে ফেলার উপক্রম করছেন।

হাজারী সাহেবকে আটক রেখে তারই দ্বারা চিঠি লিখিয়ে হাজারী টিমকে শাসন করা হয়েছে। কিন্তু কে সেই ব্যক্তি যার এত দুঃসাহস হাজারী টিমের সঙ্গে চক্র খেলছে। সে জানে না কারা তাঁরা যারা হাজারী টিমের অধিনায়ক। জানলে কিছুতেই এমন দুঃসাহস তার হতো না। পায়চারী বন্ধ করে এক নিঃশ্বাসে কথাগুলো বললেন প্রধান অধিনায়ক।

দ্বিতীয় অধিনায়ক বললেন—নিশ্চয়ই কোনো যড়যন্ত্রকারী আমাদের পিছু লেগেছে।

তৃতীয় অধিনায়ক বললেন—পিছু লেগেছে না, হাজারী টিমকে ধ্বংস করে দেবার চক্রান্ত করছে।

চতুর্থ অধিনায়ক বললেন—এই যড়যন্ত্রকারী শুধু হাজারী টিমকে ধ্বংস করে দেবার চক্রান্তই করেনি, সে অনেকদিন থেকে জঘ্নু সরকারের বিরুদ্ধেও অভিযান চালিয়েছে। হাজারী টিম মানেই দেশের স্বনামধন্য ব্যক্তি আমরা হাজারী টিম।

অধিনায়ক দাঁত পিষে বললেন—পুলিশ মহল বড় অকেজো হয়ে পড়েছে, তারা এই এই দুষ্কৃতিকারীদের গ্রেপ্তার করতে সক্ষম হচ্ছে না। আমার নির্দেশে কয়েকজন পুলিশ অফিসারকে চাকরি থেকে বরখাস্ত করা হলো তবু তেমন কোনো কাজ হচ্ছে না।

পঞ্চম অধিনায়ক বললেন—দেশে দিন দিন অরাজকতা বেড়েই চলেছে। দুষ্কৃতিকারীর সংখ্যা বাড়ছে।

শুধু বাড়ছে নয়, সীমাহীনভাবে এরা মাথা চাড়া দিয়ে উঠেছে। আমরা যেভাবে দেশ চালনা করছি এরা তার বিরুদ্ধে অভিযান শুরু করেছে। এরা দেশের সর্বনাশ চায়। একটু থামলেন প্রধান অধিনায়ক, তারপর বলতে শুরু করলেন—জনগণের মঙ্গল সাধন উদ্দেশ্য নিয়েই তো আমরা জনদরদীর আসনে উপবিষ্ট হয়েছি। দেশের মঙ্গল কামনা করেই আমরা দেশের দ্রব্যমূল্য বৃদ্ধি ব্যাপারে উৎসাহী হয়েছি।

স্যার, এ কথা জনগণ যেন বুঝতেই চায় না। দ্রব্যমূল্য বৃদ্ধি পেলে এতে দেশেরই তো লাভ মানে জনগণেরই তো লাভ বলা চলে।

ষষ্ঠ অধিনায়কের কথায় বললেন প্রধান অধিনায়ক—হাঁ, আপনি ঠিকই বলেছেন, দেশের উৎপন্ন দ্রব্যের মূল্য বৃদ্ধি এত আমাদের দেশেরই মঙ্গল, কারণ দ্রব্যমূল্য বৃদ্ধি পেলে জনগণ চরমভাবে লাভবান হবে বা হচ্ছে।

দ্বিতীয় অধিনায়ক বলে উঠেন—এই সুন্দর সহজ কথাটা কিন্তু দেশের জনগণ মোটেই অন্তর দিয়ে গ্রহণ করে না বা বোঝার চেষ্টাও করে না। দ্রব্যমূল্য বৃদ্ধি হয়েছে আরও হচ্ছে এতে তারাই যথেষ্ট লাভবান হচ্ছে কারণ খাদ্যশস্য দেশের মাটিতেই উৎপন্ন হয়। যদি এই খাদ্যশস্য প্রচুর দরে বিক্রি হয় তাহলে তারাই সমৃদ্ধিশালী হতে পারছে.....

তৃতীয় অধিনায়ক বলে—তবু ঐ দুষ্ট শয়তান দুঃস্থ নামধারী জনগণ হা হা করে করে দেশ ও দেশের শান্তি নষ্ট করছে।

হাঁ, সত্যিকথা বলেছেন—ঐ এক শ্রেণীর লোক আছে যারা দেশের আবর্জনা স্বরূপ, ওরা মরে যাওয়াই শ্রেয়। কথাটা বললেন পঞ্চম অধিনায়ক।

এবার বললেন প্রধান অধিনায়ক—ঐ দুষ্ট জনগণের হা কান্না কোনদিন থামবে না। ওরা যত পারে ততই আরও চাইবে। কাজেই ওরা চিৎকার করে গলা দিয়ে রক্ত ঝরাক সেদিকে আমাদের কান দেবার সময় নেই। আমরা কাজের লোক, সর্বদা কাজ করে যাচ্ছি। কেমন করে দেশ ও দেশের মান-মর্যাদা রক্ষা পাবে এ চিন্তাই আমাদের একমাত্র ভাববার বিষয়। কে কোথা না খেয়ে মরলো এসব দেখবার বা শুনবার অবসর আমাদের নেই। তবে হ্যাঁ, যখন আমরা জনসভায় মঞ্চে দাঁড়িয়ে বক্তৃতা দেবো তখন অবশ্যি ঐ নগণ্য দুঃস্থ জনগণকে লক্ষ্য করেই কথা বলতে হবে, কারণ আপনারা সবাই জানেন। হ্যাঁ, এবার কাজের কথায় আসা যাক, কেমন?

ঠিক বলেছেন, এবার কাজের কথা নিয়ে আলোচনা করা যাক। দেখুন হাজরী সাহেবকে কেউ বা কারা আটক করেছে এবং তার দ্বারাই আমাদের এ চিঠিগুলো লেখানো হয়েছে।

হ্যাঁ, আপনার অনুমান সত্য তাতে কোনো সন্দেহ নেই। কিন্তু সেই দুষ্কৃতিকারী যেন মনে রাখে হাজারী সাহেবকে আটক করে কোনো কিছু

করতে পারবে না। আমাদের হাজারী টিম যেমন চলেছে তেমনি চলবে। দেশের পণ্যদ্রব্য যদি দেশের বাইরে না যায় তবে কি করে দেশ সমৃদ্ধশালী হবে। কথাগুলো বলে থামলেন প্রধান অধিনায়ক।

চতুর্থ অধিনায়ক বললেন—হিম্মির পণ্যদ্রব্য হারিয়ে আমরা একেবারে মুম্বড়ে পড়েছিলাম। পর পরই বেতসী ও ইজহার মাল পাঠিয়ে আবার কোনো রকমে সেইটার ক্ষতিপূরণ করলাম। তারপর পুনরায় কয়েকবার আমরা দুষ্কৃতি দ্বারা ক্ষতিগ্রস্ত হলাম। জানিনা কে সেই দুষ্কৃতিকারী যে বারবার আমাদের এমন ক্ষতি সাধন করে চলেছে।

শুধু ক্ষতিসাধন করাই তার উদ্দেশ্য নয়। উদ্দেশ্য হাজারী টিমকে নিশ্চিহ্ন করে দেওয়া। যদি তাই না হবে তাহলে এত লুটতরাজ করা সত্ত্বেও সে হাজারী সাহেবকে আটক করতো না।

আটক করেই সে ক্ষান্ত হয়নি। হাজারী সাহেবকে আটক করে তার কাছ থেকে জানিয়েছে আমাদের হাজারী টিমের সবার নাম ও ঠিকানা। এ চিঠিগুলোই তার প্রমাণ.....

সপ্তম অধিনায়ক কথা কয়টি বলে থামলেন।

প্রথম এবং প্রধান অধিনায়ক বললেন—দুষ্কৃতিকারীদের দৌরাত্ম্য বেড়ে গেছে চরমভাবে। এদের কেমন করে শায়েস্তা করতে হয় আমরা জানি। সব নষ্টের মূল ঐ দুঃস্থ অসহায় নামধারী জনগণ।

আপনি ঠিক বলেছেন জনাব। ওরাই দেশটাকে রসাতলে দিলো। দেশের সুখশান্তি সব বিনষ্টের কারণ ওরা। বললেন তৃতীয় অধিনায়ক।

চতুর্থ অধিনায়ক বললেন—এই সব দুঃস্থ জনগণকে কোনো এক ব্যক্তি উৎসাহ যুগিয়ে চলেছে সেই হলো সব নষ্টের মূল। তাকে শায়েস্তা না করতে পারলে দেশে শান্তি ফিরে আসবে না।

পঞ্চম অধিনায়ক বললেন—হাঁ, আপনি ঠিকই বলেছেন, সেই শয়তান দুটলোকটিই আমাদের সর্বনাশের একমাত্র কারণ। আমাদের যে পণ্যদ্রব্যগুলো সীমান্তের বাইরে পাচার হয়ে যাচ্ছিলো সব সেই আটক করে দুঃস্থ নামধারী শয়তানগুলোর মধ্যে বিলিয়ে দিয়েছে।

প্রধান অধিনায়ক বললেন—হাঁ, আমাদের ক্ষতির পরিমাণ যদিও কোটি কোটি টাকা তবু আমরা ভেঞ্জে পড়িনি। এবার আমাদের কারবার আরও সাবধানে চালাতে হবে যেন একটি প্রাণীও জানতে না পারে। পুলিশ মহল আজকাল বড় অকেজো হয়ে পড়েছে।

ঠিক বলেছেন, পুলিশ মহল আজও সেই দুষ্কৃতিকারীকে খেঁজার করতে সক্ষম হলো না। বড় অপদার্থ ওরা।

সে কারণেই কয়েকজন পুলিশ অফিসারকে চাকরি থেকে বরখাস্ত করা হয়েছে। তাদের অবহেলাই দুষ্কৃতিকারীকে প্রশ্রয় দিয়েছে এবং দিচ্ছে। হাঁ, আমাদের এ চিঠির ব্যাপারে মিঃ কোইসগিনকে জানিয়েছি অচিরে যেন হাজারী সাহেবের আটককারীকে খুঁজে বের করা হয় এবং তাকে শাস্তি দেওয়া হয়।

জনাব, আপনি এক্ষুণি পুলিশ প্রধানকে ফোন করুন যেন মিঃ কোইসগিন সহ এখানে চলে আসেন। এখানে বসেই আলোচনা চলবে।

অত্যন্ত সূতীক্ষ্ণ বুদ্ধি নিয়ে সন্ধান চালাতে হবে। এতদিন সহ্য করলেও আর সহ্য করা সম্ভব নয়। কথাগুলো বলতে বলতে প্রধান অধিনায়ক রিসিভার তুলে নিলেন হাতে। তিনি জম্মু পুলিশ প্রধানের কাছে ফোন করলেন।

হাজারী টিমের প্রধান অধিনায়কের ফোন পেয়ে পিলে চমকে উঠলো পুলিশ প্রধানের। তিনি শশব্যস্তে বিনীত কণ্ঠে ফোনে জানালেন এক্ষুণি আমরা হাজির হচ্ছি স্যার।

যেমন কথা তেমনি কাজ।

কয়েক ঘণ্টা নয়, কয়েক মিনিটের মধ্যে জম্মু পুলিশ প্রধান ইন্সপেক্টার মিঃ কোইসগিনসহ হাজির হলেন হাজারী টিমের অধিনায়কদের পাশে।

খাকি পোশাকে সজ্জিত হয়ে পুলিশ প্রধানদ্বয় এসে উপস্থিত হলেন হাজারী টিমের কক্ষমধ্যে, মিলিটারী কায়দায় ছালাম জানালেন তারা হাজারী টিমের অধিনায়কগণকে।

গোলটেবিলের চারপাশ ঘিরে বসেছিলেন অধিনায়কগণ। সবাই এরা দেশের হর্তা-কর্তা-বিধাতা। এরাই সরকার বাহাদুর, এরাই দেশের শাসন

এবং শোষণ কর্তাও বলা চলে। এক একজন ভাবগম্ভীর মুখে বসে আছেন। তাদের মুখোভাবে ফুটে উঠেছে দেশ রক্ষার বিরাট দায়িত্ববোধের ছাপ।

কেউ কেউ সিগারেট পান করছেন সোফায় হেলান দিয়ে। চিঠিগুলোর কথা এখন কিছুটা হালকা হয়ে এসেছে। এমন চিঠি দুষ্ট লোকেরা লিখেই থাকে তাই তারা নিশ্চিন্ত হতে চেষ্টা করছেন। পুলিশ প্রধানদ্বয় কক্ষমধ্যে প্রবেশ করলেও হাজারীটিম অধিনায়কগণ তাঁদের কোনো রকম সম্মান দেখানো সমীচীন মনে করলেন না কারণ তারাই তো অধিনায়ক। পুলিশ প্রধান যত সম্মানিত ব্যক্তিই হন না কেনো তাঁরা হলেন কর্মচারী কাজেই তাঁরা এনাদের কাছে অবজ্ঞার পাত্র।

একজন বললেন—বসুন আপনারা।

পুলিশ প্রধান আসন গ্রহণ করার পর কোইসগিন আসন গ্রহণ করলেন।

কিছুক্ষণ কক্ষমধ্যে সবাই নীরব।

পুলিশ প্রধান ও ইন্সপেক্টর কতকটা অপরাধীর মতই নিশ্চুপ বসে রইলেন হাজারী টিম অধিনায়কদের কি হুকুম জানার জন্য। মূল্যবান সিগারেটের ধূমরাশি কুন্ডলি পাকিয়ে পাকিয়ে কক্ষময় বিচরণ করে ফিরছে। ম'থার উপরে কোনো বৈদ্যুতিক পাখা না চললেও কক্ষটি হিমশীতল আরামদায়ক। শীতাতপ নিয়ন্ত্রণ ব্যবস্থা রয়েছে, কাজেই অসুবিধা নেই কিছু।

মেঝেতে দামী কার্পেট বিছানো।

তুল তুলে নরম সোফায় এক একজন অধিনায়কের নাদুস্ নুদুস্ দেহগুলো যেন তলিয়ে আছে। সম্মুখের টেবিলে মূল্যবান নাস্তার স্তুপ।

পুলিশ প্রধান এবং ইন্সপেক্টর পরিবেশটা হৃদয়ঙ্গম করার চেষ্টা নিচ্ছিলেন, এমন সময় কথা বললেন প্রধান অধিনায়ক—আপনারা সম্পূর্ণ অকৃতকার্য ব্যক্তি বলে পরিচিত হয়েছেন। এটা শুধু আপনাদের জন্যই দুঃখজনক নয় আমাদের জন্যও এক কলঙ্ক। আজও আপনারা খুঁজে বের করতে সক্ষম হলেন না কে সেই দুষ্কৃতিকারী যে সবার চোখে ধূলো দিয়ে লক্ষ্য দিবালোকে নিজের স্বার্থসিদ্ধি করে যাচ্ছে। দেশে প্রতিদিন লুটতরাজ ঝাড়াঝানি লেগেই আছে। হিপ্পির তিন কোটি টাকার মাল লুট হলো।

হিজলায় দশ ট্রাক মাল হানা দিয়ে কেড়ে নিয়ে গেলো। ফিরোজপুর সাত নৌকা পণ্য দ্রব্য তারা আটক করে ফেললো এবং এসব মাল তারা প্রকাশ্যে দুঃস্থ নামধারী বদমাইশদের মধ্যে দিনের আলোতে বিলিয়ে দিলো অথচ আপনারা পুলিশ মহল কিছু করতে পারলেন না?

পুলিশ প্রধান মাথা নিচু করে ঢোক গিলছিলেন। এবার তিনি একবার চোখ তুলে তাকিয়ে দেখে নিলেন প্রধান অধিনায়কের মুখখানা।

ইন্সপেক্টর কোইসগিনের অবস্থা আরও শোচনীয়, তিনি একেবারে মাটিতে মিশে গেছেন যেন। বুকটা তার প্রচণ্ডভাবে টিপ টিপ করছে। এক একটা হাতুড়ির ঘা মারছে যেন কেউ তাঁর হৃদপিণ্ডে।

প্রধান অধিনায়ক চুপ হতেই বলে উঠলেন দ্বিতীয় অধিনায়ক। শুধু অকৃতকার্যই নন, আপনারা অকৃতজ্ঞও বটে। সরকারের বেতনভোগী কর্মচারী হয়েও আপনারা সরকারের কাজে অবহেলা করেন।

এবার কোইসগিন চুপ থাকতে পারলেন না, তিনি উঠে দাঁড়িয়ে বললেন—স্যার আপনারা যা খুশি তাই বলতে পারেন, তাই বলে আমরা অকৃতজ্ঞ নই। জীবন দিয়ে আমরা আপমাদের ডিউটি পালন করে যাই। অন্যায় অনাচার আমরা করি তা আপনাদের মতই মহান ব্যক্তিদের নির্দেশেই করি। অকৃতজ্ঞ আমরা নই স্যার।

কোইসগিনের কথা শুনে কক্ষমধ্যে সবাই স্তম্ভিত হয়ে গেলেন। আজ পর্যন্ত কোনো পুলিশ অফিসার তাঁদের সম্মুখে এভাবে কথা বলতে সাহসী হন নি আর একটা নগন্য পুলিশ ইন্সপেক্টর তাদের সম্মুখে দাঁড়িয়ে এভাবে কথা বললো! হাজারী টিমের অধিনায়কগণ ক্রুদ্ধ হয়ে উঠলেন।

প্রধান অধিনায়ক টেবিলে প্রচণ্ড আঘাত করে বললেন—এত বড় কথা, আমাদের মত লোকদের ইংগিতেই আপনারা অন্যায় অনাচার করেন!

হাঁ স্যার, করতে আমরা বাধ্য হই। জানি এটা অন্যায় করছি তবু মুখ বন্ধ করে নীরবে করে যেতে হয়, কারণ আমরা বেতনভোগী কর্মচারী। কত নির্দোষ মানুষকে আপনারা আমাদের দ্বারা শায়েস্তা করে নেন আবার কত দোষী কঠিন শাস্তি পাবার উপযোগী ব্যক্তি আপনাদের নির্দেশে বিনা দ্বিধায়

খালাস পেয়ে যায়, তাও করতে হয় আমাদেরকেই। বলুন স্যার, কি করে আমরা অকৃতজ্ঞ হলাম? কোইসগিন এক নিঃশ্বাসে কথাগুলো বললেন।

পুলিশ প্রধানের শরীরের রক্ত যেন জমে যাবার উপক্রম হয়েছে। কোইসগিন একজন সামান্য পুলিশ ইন্সপেক্টার হয়ে মহান নেতাদের মুখের উপর এভাবে কথা বলছেন, এ ভারী অন্যায় করছেন, তাতে কোনো ভুল নাই। এর পরিণতি কি তিনি ভেবে অস্থির হচ্ছেন।

অধিনায়কগণ সবাই চেয়ার ছেড়ে দাঁড়িয়ে পড়েছেন, তাঁদের মুখচোখের ভাব এমন হয়েছে এই বুঝি তাঁরা মিঃ কোইসগিনকে হত্যা করে ফেলবেন। বারবার তাকাচ্ছেন হাজারী টিমের অধিনায়কদের মুখের দিকে।

প্রধান অধিনায়ক অধর দংশন করে বললো—স্পর্ধা আপনার কম নয় ইন্সপেক্টার। জানেন আপনি কোথায় এবং কাদের সম্মুখে দাঁড়িয়ে কথা বলছেন?

জানি আপনারা দেশ ও দশের রক্ষক, নেতা, মহান ব্যক্তি, আপনারা এখন জনসমুদ্রের সম্মুখে মঞ্চে গিয়ে দাঁড়ান তখন কিন্তু আপনারদের আরও একটি রূপ আছে যা অনেকেই জানে না আর জানবেই বা কি করে আপনারা যে বিভ্রান্তপন্থী.....

এই মুহূর্তে বেরিয়ে যান, বেরিয়ে যান বলছি। প্রধান অধিনায়ক চিৎকার করে বললেন।

কোইসগিন বললেন—থাকতে আসিনি বেরিয়ে যাবো বলেই এসেছি। সম্মানে অভিবাদন জানিয়ে বেরিয়ে যান মিঃ কোইসগিন।

পুলিশ প্রধান দাঁড়িয়ে আছেন, তাঁর মুখোভাব অসহায় গোবেচারীর মত দেখাচ্ছে। মিঃ কোইসগিনের আচরণে তিনিও একেবারে মর্মান্বিত হয়েছেন। কোনো কথা যেন তাঁর কণ্ঠ দিয়ে বের হচ্ছে না।

প্রধান অধিনায়ক বললেন—দেখুন বেশি কথা বলতে চাই না মিঃ কোরেশী। হাজারী সাহেবকে কে বা কারা উধাও করেছেন এ কথা আপনি জানেন।

জানি স্যার, শুধু জানি নয় তাঁর অন্তর্ধানের পর থেকে তাঁর সন্ধানে শমস্ত জম্বুর এলাকা আমাদের পুলিশ বাহিনী চষে ফেলেছে অথচ.....

অথচ তাঁর কোন হৃদিস আপনারা করতে পারেননি, এই তো?

হাঁ স্যার।

শুনুন, হাজারী সাহেব জীবিত আছেন এবং তাঁকে এমন কোনো স্থানে আটক রাখা হয়েছে যেখানে পুলিশ মহল তো দূরের কথা মশা-মাছিও প্রবেশ করতে সক্ষম নয়।

স্যার, কি করে তাঁর সন্ধান পেলেন জানতে পারি কি?

এই দেখুন তাঁর স্বহস্তে লিখিত চিঠি। এবং এ কারণেই আপনাদের এখানে ডেকেছি। মিঃ কোইসগিন যা আচরণ করেছেন তাতে তাঁকে ক্ষমা করা যায় না। অমন লোক এখানে না থাকাই বাঞ্ছনীয়।

এ ব্যাপারে আমি দুঃখিত, এবং লজ্জিত স্যার। বললেন—জম্মু পুলিশ প্রধান মিঃ কোরেশী।

মিঃ কোইসগিনের আচরণে কক্ষমধ্যে একটা উত্তেজনাপূর্ণ ভাব বিরাজ করছিলো। এখন তো অনেকটা প্রশমিত হয়ে এসেছে। অধিনায়কগণ কেউ কেউ উত্তেজিত হয়ে আসন ত্যাগ করে উঠে দাঁড়িয়ে পড়েছিলেন, তারা এবার আসন গ্রহণ করলেন।

মিঃ কোরেশীও আসন গ্রহণ করেছেন।

এবার প্রধান অধিনায়ক বললেন—দেখুন, আপনি এই চিঠিগুলো পড়ে দেখুন।

কয়েকখানা চিঠি বের করে টেবিলে পুলিশ প্রধানের সম্মুখে রাখলেন প্রধান অধিনায়ক।

জম্মুর পুলিশ প্রধানের চোখে মুখে বিস্ময় ফুটে উঠলো, চিঠিগুলো, একই হাতের লেখা এবং চিঠির বক্তব্য এক, তিনি কিছু বুঝতে না পেরে তাকালেন প্রধান অধিনায়কের মুখে।

প্রধান অধিনায়ক বললেন—দুষ্কৃতিকারী হাজারী সাহেবকে আটক করে তারই দ্বারায় এ চিঠি লিখিয়ে আমাদের সবাইকে শাসিয়েছে। দেখুন কত বড় সাহস সেই দুষ্কৃতিকারীটার। মিঃ কোইসগিন চলে গিয়ে ভাল হয়েছে কারণ তাকে বিশ্বাস করা যায় না। যাকে বিশ্বাস করা যায় না তার সম্মুখে

গোপন কথাও বলা যায় না। মিঃ কোরেশী, জানি আপনি কোন সময় ভুল বশতঃ আমাদের গোপন কথা ফাঁস করবেন না। করলে আপনিও রক্ষা পাবেন না, এ কথাও স্মরণ রাখবেন।

জানি স্যার, তাছাড়া আপনাদের গোপন ব্যাপার এটা কোন অবস্থাতেই প্রকাশ করা উচিত নয়।

হাঁ, মনে রাখবেন, শুনুন হাজারী সাহেবকে বন্দী করে আমাদের সায়েস্তা করার বাসনা পোষণ করেছে দুষ্কৃতিকারী। যাতে সে আমাদের কোন ক্ষতিসাধন করতে না পারে, সেদিকে নজর দেবার জন্যই আপনাকে আমরা ডেকেছি। জম্মুর রাজধানীর বুকেই আমরা থাকতে চাই। মিঃ কোরেশী আপনি আমাদের নিরাপত্তার দায়িত্বভার গ্রহণ করবেন।

নিশ্চয়ই স্যার।

আজ থেকেই পুলিশ ফোর্সের ব্যবস্থা করবেন বলে আশা করছি।

আপনাদের আদেশ পালনে সদা সর্বদা আমরা প্রস্তুত আছি।

প্রধান অধিনায়ক বললেন আবার—মিঃ কোরেশী কে সেই দুষ্কৃতিকারী তার দৌরাশ্ব দিনের পর দিন ভীষণভাবে বেড়েই চলেছে। যে হাজারী সাহেবকে বন্দী করে হাজারী টিমকে সায়েস্তা করার জন্য উন্মাদ হয়ে পড়েছে। আমাদের ইচ্ছা অচিরে সেই শয়তান দুষ্কৃতিকারীকে গ্রেপ্তার করে সায়েস্তা করা। যতক্ষণ না সেই দুষ্কৃতিকারী বন্দী হয়েছে ততক্ষণ আমরা নিশ্চিন্ত নই।

পুলিশ প্রধান বিনীতকণ্ঠে বললেন—স্যার, আমরা যথাসাধ্য চেষ্টা চালিয়ে যাচ্ছি কিন্তু কোনক্রমে সেই দুষ্কৃতিকারীকে গ্রেপ্তার করতে সক্ষম হচ্ছি না। পুলিশ মহল সদা সর্বদা জম্মুর সমস্ত জায়গা চষে ফিরছে কিন্তু তাকে খুঁজে পাওয়া যাচ্ছে না।

খুঁজে বের করতে হবে মিঃ কোরেশী। জম্মুর প্রতিটি গর্তে, প্রতিটি ধূলি কণায় তার সন্ধান চালাতে হবে। এবার যদি আপনারা কৃতকার্য না হন তা হলে.....কথা শেষ না করেই হাজারীটিমের প্রধান অধিনায়ক উঠে পাড়ালেন।

অন্যান্য সবাই আসন ত্যাগ করে উঠে পড়লেন।

মিঃ কোরেশীও নতমস্তকে দাঁড়ালেন বিনয়ের সঙ্গে তাঁর মুখোভাব অপরাধীর মত মনে হচ্ছিলো।

প্রধান অধিনায়ক বলে চলেছেন—আজ প্রায় দীর্ঘদিন ধরে এই দুষ্কৃতিকারী জম্বুর বৃকে দুষ্কর্ম করে চলেছে অথচ আপনারা তাকে আজও.....কথা শেষ না করে ত্রুষ্কভাবে টেবিলে মুষ্টিঘাত করলেন সঙ্গে সঙ্গে উচ্চারণ করলেন—আজও তাকে আবিষ্কার করতে সক্ষম হলেন না আপনারা।

দ্বিতীয় অধিপতি বললেন—আবিষ্কার করা তো দূরের কথা তাকে আজও কেউ স্বচক্ষে দেখেছে বলে শুনলাম না। শুধু হাজারী সাহেব আর দু'একজন তার সঙ্গী সাথী ছাড়া।

হাঁ, এটাই আশ্চর্য দুষ্কৃতিকারীটি কৌশলে তার কাজ চালিয়ে যাচ্ছে অথচ কেউ আজও তার কোন হদিস করতে পারলোনা। শুনেছি জমকালো পোশাক পরা, মাথায় পাগড়ি, পাগড়ির আঁচল দিয়ে মুখের নিচের অংশ ঢাকা তার সর্বক্ষণ। কথাগুলো বললেন তৃতীয় অধিনায়ক।

চতুর্থ অধিনায়ক বললেন—নিশ্চয়ই কোন দস্যু বা ডাকু হবে।

পঞ্চম অধিনায়ক বললেন—ডাকু তো বটেই না হলে অপরের সম্পদ ওমন করে কেড়ে নেয়।

প্রধান অধিনায়ক বললেন—সে ডাকু বা দস্যুই হউক তাকে অচিরে গ্রেপ্তারের ব্যবস্থা করতে হবে এবং হাজারী সাহেবকে তার কবল থেকে উদ্ধার করতেই হবে। মিঃ কোরেশী এ দায়িত্ব ভার আপনার উপরে রইলো। এখন যেতে পারেন আপনি।

মিঃ কোরেশী মাথা নেড়ে সম্মতি জানিয়ে বেরিয়ে গেলেন। যাবার সময় পুনরায় স্বসম্মানে ছালাম জানাতে ভুললেন না।

জম্বু পুলিশ প্রধান বেরিয়ে যেতেই প্রধান অধিনায়ক আসন গ্রহণ করে বললেন—বসুন আপনারা।

যারা দাঁড়িয়ে ছিলেন সবাই পুনরায় আসন গ্রহণ করলেন।

জম্বুর মহান নেতারা এবার নিজেদের গোপন আলোচনায় মেতে উঠলেন।

বললেন প্রধান অধিনায়ক—এতোবড় স্পর্ধা একজন পুলিশ ইন্সপেক্টরের আমাদের মুখের উপর এমন কথা উচ্চারণ করতে সাহসী হলো।

অপর এক অধিনায়ক বললেন—আমি বিস্মিত হয়ে গেছি কোইসগিনের কথা শুনে। শুধু স্পর্ধা নয় এর মধ্যে আমি লক্ষ্য করেছি বিরাট একটা বিদ্রোহীর ছাপ।

অন্য অধিনায়ক বলে উঠেন—হাঁ, সত্য কথা সরকারি চাকরিজীবির মুখে এমন বুলি। জনগণকে এ ধরনের বিদ্রোহীমর্না ভাবাপন্ন কথাবার্তা আরও উত্তেজিত করে তুলবে তাতে কোন সন্দেহ নাই।

না এ ধরনের উক্তি যেন সে আর দ্বিতীয় বার উচ্চারণ করতে না পারে সেই কাজ করতে হবে। থামলেন প্রধান অধিনায়ক।

সবাই তখন তাকিয়ে আছেন প্রধান অধিনায়কের মুখের দিকে।

প্রধান অধিনায়ক বললেন—আমাদের যে লোক হাতে আছে, যারা আমাদের সমর্থন করে সেই যুবকদের ডেকে পাঠান এবং তাদের জানিয়ে দেন মিঃ কোইসগিনের উক্তিগুলোর কথা। শুধু কোইসগিন নন যারা এ ধরনের কথা মুখে উচ্চারণ করবে তাদের একটিকেও রেহাই দেওয়া হবে না। দাঁতে দাঁত পিষে কথাগুলো উচ্চারণ করলেন তিনি।



পরদিন জম্বুর রাজ পথে পড়ে থাকতে দেখা গেলো মিঃ কোইসগিনের মৃত দেহ। তাকে কে বা কারা নির্মমভাবে হত্যা করেছে। দেহ থেকে মাথাকে সম্পূর্ণ বিচ্ছিন্ন করে ফেলা হয়েছে।

মিঃ কোইসগিনের মৃতদেহ দেখা সত্ত্বেও কোন জনগণ সেখানে ভীড় জমাতে সাহসী হলো না বা কোন রিপোর্টার ফটো নেবার জন্য ভীড় জমালোনা।

পুলিশ এক সময় মিঃ কোইসগিনের মৃত দেহ সরিয়ে ফেললো। যদিও অতি সহজ পরিবেশেই লাশ সরিয়ে ফেলা হলো তবুও শহরে কোইসগিনের নিহত ব্যাপার নিয়ে একটা চাঞ্চল্যতার সৃষ্টি হলো। কারা তাঁকে হত্যা করেছে, কেনো তাকে হত্যা করা হয়েছে, মিঃ কোইসগিনের হত্যা কি কোনো রকম রহস্যপূর্ণ, এ সব কোনো প্রশ্নের জবাব কেউ খুঁজে পেলো না।

মিঃ কোইসগিন পুলিশের লোক বলে সরকারিভাবে তদন্ত শুরু হলো। গোয়েন্দা বিভাগ তদন্তের ভার হাতে নিলেন। জোর তদন্ত চললো। পত্রিকায় নানাভাবে এই নৃশংস হত্যাকাণ্ডের খবরা খবর প্রকাশিত হতে লাগলো।

জম্বুর জনসাধারণ এই হত্যাকাণ্ডের শেষ সমাধা জানার জন্য উদগ্রীব ভাবে প্রতি দিন সংবাদ পত্রের পৃষ্ঠায় নজর বুলিয়ে চললো কিন্তু এই হত্যা কাণ্ডের কোনো সমাধান তারা পত্রিকা বা সংবাদপত্রের পৃষ্ঠায় দেখতে পেলেন না। কয়েকদিন বা কয়েক সপ্তাহ এই হত্যাকাণ্ডের বর্ণনা নানা ভাবে পত্রিকার পৃষ্ঠায় ফলাও করে প্রচারিত হলো। তারপর দেখা গেলো আর কোনো সংবাদ প্রচারিত হচ্ছে না এ হত্যালীলা সম্পর্কে।

কিন্তু কেনো এ হত্যালীলা নিয়ে আর কোনো সংবাদ প্রচারিত হলোনা এটা কেউ জানেনা বা বলতে পারলোনা।

মিঃ কোইসগিনের মত যারাই এই মহান নেতাদের নিয়ে কোনো কথা বলতে গেলো তারাই প্রাণ হারালো নৃশংসভাবে।

কারা এবং কেনো হত্যা করলো জানলোনা বা কেউ বুঝলোনা। মাঝে মাঝে দেখা যায় পথের ধারে কিংবা ডোবা খালে বিলে পড়ে আছে মস্তক বিহীন লাশ কিংবা হাত পা বাধা কোনো অসহায় ব্যক্তির মৃত দেহ।

হাজারী টিম হাজারী সাহেবকে হারিয়েও তাঁদের গোপন ব্যবসা থেকে ক্ষান্ত হলেন না। দেশের প্রয়োজনীয় দ্রব্যাদি এবং খাদ্যশস্য যখন যা দেশের মাটিতে উৎপন্ন হয়ে চললো তার তিন ভাগ খাদ্যশস্য জনগণের চোখে

ধূলো দিয়ে অত্যন্ত সতর্কতার সঙ্গে গোপনে দেশের বাইরে পাচার করে চললেন। অবশ্য নিজেরা সাধু সেজে জনসভায় চোরাচালানী আর এই ধরনের ব্যবসায়ীদের খুব কষে গালমন্দ করতে ভুললেন না, যেন তাঁদের উপর জনগণের আস্থা বদ্ধমূল হয়।

সাধুতার মুখোস পরে এক এক জন ভীষণ জনদরদী বনে গেলেন যেন আরও বেশি করে।

কিন্তু জনগণ জানেন এটা এদের উপরের রূপ আসল রূপ লুকানো আছে মুখোসের অন্তরালে।

জনদরদী নেতারা যতই গলা ফাটিয়ে জনহিতকর উক্তি উচ্চারণ করুননা কেনো, জনগণ বোঝেন, জানেন, ভিতরের আসল পরিচয়। অবশ্য নেতারাও তা বোঝেন জনগণ তাদের প্রতি কতখানি আস্থাশীল তা তাঁরা অন্তরে অন্তরে বেশ ভাল ভাবেই উপলব্ধি করেন এবং এ কারণেই তাঁদের সাবধানতার অন্ত নাই। দেহরক্ষী ছাড়াও নিজেরা সর্বক্ষণ সজাগ সচেতন নিজেদের ব্যাপারে।

কিন্তু কতদিন?

কতদিন তারা জনগণের বুকের রক্ত এ ভাবে শোষণ করবেন। জনগণের মুখের গ্রাস নিয়ে ছিনি-মিনি খেলবেন। যত গোপনতার সঙ্গেই তারা জনগণের চোখে ডেক্কী-বাজী লাগিয়ে যাদু বিদ্যার কারসাজি খেলুন না কেনো? একদিন তাঁদের সাধুতার মুখোস জনগণই টেনে ছিঁড়ে, তাঁদের আসল রূপ সবার সম্মুখে তুলে ধরবে সেদিন, সেই সুনাম ধন্য মহান অধিনায়কদের বিচার হবে জনগণের আদালতে।

প্রধান অধিনায়ক হাসলেন—দেখলেন কোইসগিনের শেষ পরিণতি।

দ্বিতীয় অধিনায়ক বললেন—হাঁ, যারা আমাদের বিরুদ্ধে টু'শদ করেছে, তাঁদের আমরা কিভাবে দুনিয়া থেকে সরিয়ে ফেলি। অতি কৌশলে, অতি সন্তুর্পণে আমরা তাদের নিঃচিহ্ন করে দেই। তাদের মৃতদেহের সং কাজও পর্যন্ত হয় না। তাদের দেহের খণ্ড খণ্ড টুকরায় শিয়াল শকুনির উদর পূর্ণ হয়।

তৃতীয় অধিনায়ক বললেন—আমাদের বিরুদ্ধে বলেও তারা জীবিত থাকবে এ হতে পারে না, তাইতো আমরা এমন সুকৌশলে কাজ করে চলেছি।

চতুর্থ অধিনায়ক বললেন—শুধু সুকৌশলে আমরা একটি কাজই করছি না, আমরা সব কিছুই করছি সুকৌশলে। আজ আমাদের জীবন সার্থক হয়েছে.....

পঞ্চম অধিনায়ক বললেন—শুধু নামে যশেই নয় আমরা ধনসম্পদেও মানুষের মত মানুষ হয়েছি। হাজারী টিমের অধিনায়ক হবার পূর্বে আমাদের কি ছিলো? তেমন কিছুই ছিলো না, আজ গাড়ি-বাড়ি ঐশ্বর্যের ইমারত সব পেয়েছি শুধু একটি জিনিস আমরা পেলাম না তা ঐ দুঃস্থ অসহায় নামধারী-দুষ্ট জনগণের নির্ভরশীলতা এবং বিশ্বাস.....

হাঁ, ওরা কোন দিনই আমাদের উপর ভরসা করতে চায় না। ওরা চায় দেশের সর্বনাশ, আমাদের উপর আস্থা হারানো মানেই দেশের উপর আস্থা হারানো....কথাগুলো বললেন সপ্তম অধিনায়ক।

এতোক্ষণ গভীর মনোযোগ দিয়ে শুনছিলেন হাজারীটিমের অষ্টম অধিনায়ক, এবার তিনি বললেন—ঐ আবর্জনাগুলোর নাম আপনারা মুখে আনবেন না। ওদের কথা স্মরণ করতেও শরীর ঘৃণায় কুঞ্চিত হয়, যত সব অপদার্থ.....

প্রধান অধিনায়ক বললেন—চুপ, আস্তে বলুন ওরা আশে পাশেই থাকে সর্বক্ষণ, হঠাৎ শুনে ফেলবে। যত কাজ করতে হয় ওদের খুশি রেখেই করতে হবে বুঝলেন? দেশের জনগণ যদি বিগড়ে যায় তাহলে বড় মুঙ্কিল আছে। কামানের গোলা রদ করা যায় কিন্তু জনগণের বিক্ষোভ রদ করবার উপায় নেই কারো, কাজেই.....একটু থেমে বললেন অধিনায়ক ওদের খুশি রেখেই কার্যসিদ্ধ করে যেতে হবে.....

বললেন দ্বিতীয় অধিনায়ক—জনগণকে না হয় যে কোন উপায়ে খুশি করা হলো কিন্তু ঐ জমকালো পোশাকধারী, সেই দুষ্কৃতিকারীটিকে কেমন করে সে সায়েস্তা করবেন। হাজারীসাহেবকে আটক করে সে আমাদের সবার ঠিকানা সংগ্রহ করে নিয়েছে। যে কোন মুহূর্তে সে আমাদের উপর আক্রমণ চালাতে পারে।

প্রধান অধিনায়ক বললেন—পুলিশ প্রধানকে জানিয়ে দিয়েছি, আমাদের প্রতিটি অধিনায়কের বাসভবনের চার পাশে স্বশস্ত্র প্রহরী পাহারায় নিযুক্ত

থাকবে, যেন কোনো রকমে কেউ ফটক পেরিয়ে ভিতরে প্রবেশ করতে সক্ষম না হয়। এমন কি পিপীলিকাও যেন প্রবেশ করতে না পারে।

তাতো বুঝলাম কিন্তু যখন আমরা বাসভবনের বাহিরে যাবো তখনও তো আমাদের উপর হামলা চলতে পারে? কথাটা বললেন চতুর্থ অধিনায়ক।

জবাব দিলেন প্রধান অধিনায়ক—যখনই আমরা বাসভবন ত্যাগ করবো তখনই আমাদের দেহরক্ষী হিসাবে পুলিশ ফোর্স নিযুক্ত থাকবে কেউ যেন আমাদের কেশগ্র স্পর্শ করতে সক্ষম না হয়।



জন্ম পুলিশ প্রধানের চোখে আজ ক'দিন হলো ঘুম নাই। তিনি যেন একেবারে মরিয়া হয়ে উঠেছেন। সদা সর্বদা পুলিশ বাহিনীর উপর কড়া নির্দেশ দিয়ে যাচ্ছে, যেন তারা সর্বক্ষণ সজাগ এবং সতর্কতার সঙ্গে নিজ নিজ দায়িত্ব পালন করে চলেন। দেশের ভূত ভবিষ্যৎ পুলিশবাহিনী। দেশের শান্তিশৃঙ্খলা রক্ষাকারী তারাই। তারা যদি কোনো রকম শান্তি শৃঙ্খলা বজায় রেখে না চলতে পারে—তা হলে দেশ রক্ষা করা কিছুতেই সম্ভব হবে না।

পুলিশ প্রধান যে ভাবে নির্দেশ দিচ্ছেন সেইভাবে কাজ করে যাচ্ছেন অন্যান্য পুলিশ অফিসারগণ! অফিসারগণ আবার যে ভাবে পুলিশের নির্দেশ দিচ্ছে, পুলিশ ফোর্স সেইভাবে আদেশ পালন করে যাচ্ছেন। পুলিশ বাহিনী বা পুলিশ মহল তো হুকুমের চাকর।

পুলিশ প্রধান এতো করেও নিশ্চিত হতে পারছেন না, তিনি অত্যন্ত উদ্বিগ্নতার সঙ্গে কাল-কাটাচ্ছেন। স্বনামধন্য ব্যক্তিদের নির্দেশ তাঁকে মেনে চলতেই হবে, না হলে তাকেও মিঃ কোইসগিনের মত নৃশংসভাবে প্রাণ হারাতে হবে কিংবা চাকরি থেকে সরে পড়তে হবে।

ক'দিনের মধ্যেই মিঃ কোরেশীর মাথার সম্পূর্ণ চুল পেকে সাদা হয়ে উঠলো। সব সময় তাঁর মনে উৎকণ্ঠা না জানি কোন মুহূর্তে জন্মের কোন স্থানে দূষ্ণতিকারী হানা দিয়ে বসে। যদি কোনো অধিনায়কের বাস ভবনে হানা পড়ে বা কোনো অঘটন ঘটে তা হলে কৈফিয়ৎ দিতে হবে তাকেই।

মিসেস কোরেশী স্বামীকে সদাসর্বদা ব্যস্ত এবং চিন্তিত দেখে একদিন বললেন—চাকরি করছো বলেই দিন রাত এ ভাবে দুঃশ্চিন্তা করবে? শুধু দুঃশ্চিন্তা নয় সর্বক্ষণ পোশাক পরে ছুটাছুটি করে বেড়াচ্ছ। তোমার চেহারার দিকে একবার তাকিয়ে দেখেছো? এ ক'দিনের মধ্যেই একেবারে যাতা হয়ে গেলো। দেহ আধখানা হয়ে গেছে। চোখের নিচে কালি পড়েছে, সম্পূর্ণ চুল পেকে সাদা হয়ে গেলো.....

যেতে দাও! সব যেতে দাও। গিনি এমন দেশে বেঁচে থেকে কোনো লাভ নেই। যে দেশে সুখ নেই, শান্তি নেই, সে দেশে বেঁচে থেকে কি হবে বলো? এতো বড় একটা চাকরি করি, দেশের মানুষ কত সম্মান করে, ভয়ও করে, তবু কোন মুহূর্তে আমি নিশ্চিত হতে পারিনি। দেশের অধিনায়কদের খুশি করতে গিয়ে মনের বিরুদ্ধে আমাকে অনেক কাজ করতে হচ্ছে যা করতে গিয়ে আমি আমার বিবেকের কাছে ধিক্কার পেয়েছি। গিনি অধিনায়কদের আদেশ কে বা কারা তাঁদের পিছু নিয়েছে এবং তাঁদের গোপন দল যার নাম “হাজারী টিম” সেই দলের নেতাকে আটক করেছে, সেই দূষ্ণতিকারীকে খুঁজে বের করতে হবে।

নইলে?

নইলে চাকরি খোয়া যাবে নিঃসন্দেহে।

তা হলে উপায়?

উপায় চিন্তা করতে গিয়েই বুড়িয়ে গেলাম গিনি একেবারে ভেঙ্গে পড়লাম; হতাশ হয়ে পড়েছি চাকরিটা বুঝি আর রক্ষা পাবে না।

তুমি নিজে এতো বেশি উতলা হচ্ছে কেনো? অন্যান্য পুলিশ অফিসারদের আদেশ করো।

তুমি বুঝবেনা গিনি, জন্ম পুলিশ মহল একেবারে হীমসীম খেয়ে গেছে। সমস্ত শহর তন্ন তন্ন করে খুঁজে ফিরেছে। কিন্তু কোথাও সেই দূষ্ণতিকারীর সন্ধান পাওয়া যায় নাই।

ওগো আমার বড্ড ভয় করছে, দেখলে তো মিঃ কোইসগিনের অবস্থা। দেখলে তো তাঁকে কে বা কারা কি নির্মমভাবে হত্যা করেছে। আহা বেচারীর শেষ পরিণতি এই ছিলো। তুমি সাবধানে থাকবে, সাবধানে চলাফেরা করবে, দেশের সর্বত্র যেন একটা ভীষণ ত্রাস বিরাজ করছে। জীবনের এতোটুকু নিরাপত্তা নেই কারো।

গিন্নি সরকারি চাকরি করি সব সময় সরকারের নির্দেশ মেনে চলতে হয়। আমাদের কোনো ভীতি ডর করে চললে চলবে বলো? যত ত্রাসের সৃষ্টিই হোকনা কেনো ডিউটি পালন করতেই হবে, আইন মেনে চলতেই হবে আমাদের।

কিন্তু.....

কোনো কিন্তু নেই, যত ঝড় বৃষ্টি তুফান হোক। যত মহামারী কিংবা দুর্যোগ চলুক তবু আমাদের নিস্তার নেই।

চাকরি করো বলেই.....

হাঁ, এরই নাম পুলিশের চাকরি।

জানালা দিয়ে বাইরে তাকিয়ে বলেন মিসেস কোরেশী—দেখছো ভীষণ মেঘ করেছে তুমি বাইরে যাবে।

হাঁ, না গেলেই নয়, কারণ যেমন করে হোক সেই জমকালো পোশাকধারী দুষ্কৃতিকারীকে খুঁজে বের করতেই হবে নইলে আমার চাকরি তো যাবেই, তা ছাড়া.....কথা শেষ না করেই থামলো মিঃ কোরেশী।

মিসেস কোরেশীর সমস্ত মুখে ছড়িয়ে পড়লো একটা দুঃচিন্তার ছাপ।



বনহর হাজারী সাহেবের বুকে রিভলভার চেপে ধরে বলিষ্ঠ কণ্ঠে বললো—বলুন আপনি বিশ্বাসঘাতকতা কেনো করেছিলেন? বলুন, জবাব দিন আমার প্রশ্নের?

হাজারী সাহেব করুণ কণ্ঠে বললেন—এবারের মত ক্ষমা করে দিন আর কোনদিন এমন বিশ্বাসঘাতকতা করবোনা।

দাঁতে দাঁত পিষে বললো বনহর—প্রথম বারও আপনি এমনভাবে নিজেদের অন্যায়ে জন্ম ক্ষমা ভিক্ষা চেয়ে নিয়ে ছিলেন স্বরণ আছে সে কথা?

আছে!

তবু সাহস হলো পুনরায় ক্ষমা ভিক্ষার।

দেখুন ভুল হয়েছে।

ভুল! ভুল মানুষের একবারই হয়। বার বার আপনাদের ভুল হবে, যেমন চিরদিন আপনারা ভুল করে এসেছেন?

বড্ড ক্ষুধা পেয়েছে। আজ তিনদিন আমি খাই না।

আ-হা বড় আফসোস। এবার তা হলে ক্ষুধা কেমন আচ করতে পেরেছেন? লক্ষ লক্ষ দুঃস্থ জনগণের মুখের গ্রাস কেড়ে নিয়ে আপনারা ঐশ্বর্যের ইমারতে বসে পা দুলিয়ে দুলিয়ে শাহান শাহ্ খাবারে উদর পূর্ণ করেন। আর সেই লক্ষ লক্ষ দুঃস্থ মানুষ, দিনের পর দিন ক্ষুধার জ্বালা নীরবে সহ্য করে যায়...মনে করুন হাজারী সাহেব—ক্ষুধার জ্বালা কেমন!

আমাকে ক্ষমা করুন। আমি জীবনে আর কোনদিন অন্যায় কাজ করবো না। দেশের সম্পদ সীমান্তের ওপারে পাচার করবোনা। হাজারীটিম ভেঙ্গে দেবো বিশ্বাস করুন আপনি...

বনহর এবার হাতে তালি দিলো, সঙ্গে সঙ্গে দু'জন অনুচর এলো সেখানে।

হাজারী সাহেব মনে করলেন এবার বুঝি তাকে মুক্তি দেওয়া হবে। বুঝি ক্ষমা পেলেন তিনি কিন্তু ক্ষমা নয়। আদেশ দিলো বনহর—নিয়ে যাও হাজারী সাহেবকে, কোনো এক ধনাগারে বদ্ধ করে রাখো। শুধু ধন-সম্পদ উনি ভক্ষণ করবেন।

হাজারী সাহেব চোখে সর্ষে ফুল দেখলেন। কেঁদে ফেললেন তিনি হাঁউ মাউ করে।

তাদের বাড়ির চারপাশে সুদক্ষ সশস্ত্র প্রহরী রীতিমত পাহারা দিয়ে চলেছে। কিভাবে এই ভয়ঙ্কর লোকটি প্রবেশ করলো।

সবাই স্থির হয়ে দাঁড়িয়ে আছেন, কারো মুখে কোনো কথা নাই। যেন আড়ষ্ট হয়ে গেছেন তাঁরা। বললেন প্রধান অধিনায়ক—কে তুমি? এবং এই প্রাসাদের মধ্যে প্রবেশ করলে?

আমি কে একটু পরেই জানতে পারবেন, আর এসেছি আপনাদের সদর দরজা দিয়ে।

প্রহরী! সশস্ত্র প্রহরী পাহারায় রয়েছে তবু তুমি কি করে...

মৃত্যু যখন আসন্ন হয়ে আসে তখন সশস্ত্র প্রহরী কেন লৌহ প্রাচীর ভেদ করেও আজরাইল এসে উপস্থিত হয়, এ কথা ভুলে গেছেন মহাত্মাগণ। আপনাদের সময় শেষ হয়ে এসেছে।

তুমি কি আমাদের হত্যা করতে চাও? বললেন প্রধান অধিনায়ক।

বনহর হেসে বললো—এতো সহজে বিদায় নিতে চান? না, আপনাদের একজনকেও আমি স্বহস্তে হত্যা করবো না। যাদের মুখের গ্রাস নিয়ে আপনারা ছিনিমিনি খেলেছেন তাদের হাতেই সঁপে দেবো আপনাদেরকে। তারা যা ভাল মনে করেন তাই করবেন। আপনাদের বিচার হবে জনগণের আদালতে। আমি তো আজরাইল বিচারের পর জান কবজের পালা আমার।

সবার মুখমণ্ডল মরার মুখের মত ফ্যাকাশে হয়ে উঠেছে। এ ওর মুখের দিকে অসহায়ভাবে তাকাচ্ছেন। যে অধিপতিদের অধিপত্যে সমস্ত দেশ ও দেশের জনগণের ত্রাহি ত্রাহি অবস্থা ছিলো, সেই মহান নেতাদের অবস্থা ফাঁদে পড়া বগার মত হলো।

বনহর বাম হাতের রিভলবার টিপলো সঙ্গে সঙ্গে এক রাশ ধোঁয়া ছড়িয়ে পড়লো কক্ষটার মধ্যে। বনহর তখন নিজের মুখে এক ধরনের মুখোস পরে নিয়েছে। ধোয়াটা কক্ষমধ্যে ছড়িয়ে পড়তেই মহান অধিপতিরা টলতে লাগলো মাতালের মত।

বনহর শিস দিলো—সঙ্গে সঙ্গে কয়েকজন অনুচর প্রবেশ করলে জানালা দিয়ে ভিতরে। তাদের প্রত্যেকের মুখে অদ্ভুত ধরনের মুখোস পরা রয়েছে।

ততক্ষণে অধিনায়কগণ সবাই ঢলে পড়েছে মেঝেতে ।

বনহর অনুচরদের নির্দেশ দিলো—মহান অধিপতিদের তুলে নিতে ।

অনুচরগণ এক একজন অধিপতিকে কাঁধে তুলে নিয়ে সিঁড়ি বেয়ে নিচে নেমে চললো ।

প্রহরীগণ সবাই তখন যার যার জায়গায় মূর্তির মত দাঁড়িয়ে আছে । সবাই জ্ঞান শূন্য তাতে কোন সন্দেহ নাই ।

অবশ্য বনহর ক্লোরফরম গ্যাস দ্বারা সবাইকে অজ্ঞান করে ফেলেছিলো এবং তা সে করেছিলো অতি সুকৌশলে ।

সবাইকে নামানো হলো নিচে ।

প্রধান অধিপতির বাড়ির অদূরে অন্ধকারে অপেক্ষা করছিলো একটি খালি পুলিশ ভ্যান । বনহরেরই এক অনুচর পুলিশ ড্রাইভারের বেশে ড্রাইভ আসনে বসেছিলো ।

অধিনায়কদের সবাইকে এক একটা পুটলি বানিয়ে ভ্যানে উঠিয়ে নেওয়া হলো । পথচারী দু'চারজন যারা রাজ পথে যাচ্ছিলো তারা মনে করলো হয়তো বা কোনো মাল পাচার হচ্ছে তাই তারা তেমন করে সাহস পেলোনা দাঁড়িয়ে দেখার ।

ভ্যান বোঝাই হলো তারপর ড্রাইভার ভ্যান ছাড়লো ।

বনহর তার জমকালো তাজের পিঠে বসলো । জমাট অন্ধকারে শোনা গেলো অশ্ব পদশব্দ । জম্বুর ঘুমন্ত শহরের পাষাণ প্রাচীরগুলো থর থর করে কঁপে উঠলো সেই শব্দে ।



সংজ্ঞা ফিরে এসেছে, সবগুলো অধিনায়কের । তাঁদের চোখে মুখে নিশ্চয়, এ তারা কোথায় এসেছে । কেমন করে এসেছে কে তাঁদের এনেছে ।
 াকটা ছোট্ট ঘরে তারা সবাই বন্দী ।

ধীরে ধীরে স্মরণ হতে লাগলো সব কথা। প্রধান অধিনায়কের বাড়িতে তাঁদের গোপন বৈঠক হচ্ছিলো। বৈঠক প্রায় শেষ হয়েছে এমন সময় হঠাৎ যমদূতের মত এক ব্যক্তি গবাক্ষ পথে প্রবেশ করেছিলো সেই কক্ষ মধ্যে।

সেই জমকালো বলিষ্ঠ চেহারা লোকটাকে? তার দুই হাতে ছিলো দু'খানা রিভলবার। একরাশ ধোঁয়া ছড়িয়ে পড়লো সমস্ত কক্ষে তারপর আর কোনো কথা মনে নেই তাদের। যারা রাজ প্রাসাদসম বাসভবনে নরম গদির সোফায় বসে দিন কাটান, তারা কিনা এমন কঠিন পাথুরে মেঝেতে বসে থাকতে পারেন? ব্যথা হয়ে গেছে মাখনের মত কোমল দেহগুলো।

কক্ষ মধ্যে কোনো আলো নেই।

উপরে ছোট্ট একটি ভ্যান্টিলেটর। ঐ ভেন্টিলেটরের মধ্য দিয়ে যৎকিঞ্চিৎ আলো প্রবেশ করছিলো কক্ষ মধ্যে। অধিনায়কবৃন্দ এ ওর মুখ স্পষ্ট দেখতে না পেলেও তাঁরা একে অপরকে ঠিক চিনতে পারছিলেন। হঠাৎ এমন একটা অবস্থার জন্য মোটেই তারা প্রস্তুত ছিলো না। তাঁদের ভাগ্যাকাশ যে এমন করে অপরিচ্ছন্ন হবে এটাও তারা ভাবতে পারেননি কোনোদিন।

রাগে দুগুণে অধর দংশন করতে লাগলেন সবাই। এতো পুলিশ পাহারা থাকা সত্ত্বেও কি করে তাঁদের অন্তপুরে জমকালো পোশাকধারী প্রবেশে সক্ষম হলো তারা ভেবে পাচ্ছেন না। পুলিশগণ অপদার্থ এটাই তারা নিজেরা ক্রোধের সঙ্গে বার বার উচ্চারণ করে চললেন।

কয়েক ঘন্টার মধ্যেই মাখনদেহী মহান নেতারা হাঁপিয়ে উঠলেন। যারা দুগ্ধ ফেনিল শয্যায় শয়ন করেন। গালিচা বিছানো মেঝেতে পদচারণ করেন। মসৃণ মুখ দর্শন খাবার টেবিলে বসে সাহেবী খানা খান। এমন অবস্থার কথা তারা ভাবতেও পারেন না কোনোদিন। আজ সেই নির্মম অবস্থায় এসে পৌছেছেন তারা মহান অধিনায়কগণ।

মানুষের অদৃষ্ট এক মহা পরীক্ষা।

সেই মহাপরীক্ষায় সম্মুখীন এখন তারা। অস্থির হয়ে পড়েছিলেন সবাই, ক্ষুধা পিপাসায় তো কাতর হয়েই পড়েছেন। তারপর এক একজন

অধিনায়কদের চা সিগারেট পানের নেশা আছে, এরা একমুহূর্ত নেশা ত্যাগ করতে অভ্যস্ত নন। অথচ দুটোদিন হলো তারা এ অবস্থায় আছেন। মরিয়া হয়ে উঠেছেন সবাই।

পুরো দুটো দিন অতিবাহিত হবার পর হঠাৎ দরজা খুলে গেলো।

সবাই ব্যাকুল আশ্রয়ে তাকালেন দরজার দিকে। মুহূর্তে তাদের মুখ ফ্যাকাশে রক্ত শূন্য হয়ে পড়লো। কক্ষের দরজায় দাঁড়িয়ে আছে সেই জমকালো মূর্তি—তার পিছনে কয়েকজন বলিষ্ঠ চেহেরার লোক। সবার হাতেই মশাল শুধু জমকালো মূর্তি ছাড়া।

প্রধান অধিনায়ক সবার সম্মুখে। তারা দাঁড়িয়ে পড়ছেন সবাই।

জমকালো পোশাক পরিহিত দস্য বনহর বললো—বন্ধুগণ আপনারা আমার অতিথি। জানতে এলাম কেমন আছেন?

অধিনায়কগণ জমকালো মূর্তির পরিহাসজনক উক্তি নীরবে সহ্য করে স্থির হয়ে দাঁড়িয়ে রইলেন। মুখোভাব অপরাধীর মত করুন বিষণ্ণ বিবর্ণ দেখাচ্ছে।

অধিনায়ক প্রধান বললেন—তুমি কেন আমাদের এখানে এসেছো? বলো কি চাও তুমি আমাদের কাছে?

অধিনায়ক প্রধান ভেবেছেন কিছু মোটা পয়সা পেলেই জমকালো মূর্তি তাঁদেরকে মুক্তি দেবে। সেই রকম মনোভাব নিয়েই কথাটা বললেন প্রধান অধিনায়ক।

বনহর তার কথা শুনে অট্টহাসি হেসে উঠে বললো—কেন আপনাদের এনেছি তার জবাব হাজারী সাহেব দেবেন। দ্বিতীয় প্রশ্নের জবাব অবশ্য আমিই দিচ্ছি। আমি কিছু চাইনা, যারা আপনাদের কাছে পাওনাদার রয়েছে তারাই নেবেন নিজেদের পাওনা পূরণ করে। পিছন দিকে লক্ষ্য করে বললো বনহর—রাম সিং?

বলুন সর্দার?

হাজারী সাহেবকে নিয়ে এসো।

তাকে আনতে গেছে।

বেশ।

একটু পরে দু'জন বলিষ্ঠ লোক হাজারী সাহেবকে নিয়ে এলো।

প্রথমে হাজারী সাহেবকে চিনতেই পারলেন না। তার পরম বন্ধু স্থানীয় মহান অধিপতিগণ। কিন্তু একটু পরেই তারা চিনতে পারলেন এবং ব্যাকুল কণ্ঠে বললেন—হাজারী সাহেব আপনি!

হাজারী সাহেব যেন এ ক'দিনে একটা জীবন্ত কঙ্কাল বনে গেছে। চোখ দুটো ঘোলাটে, চুলগুলো রুম্ম, পাগলের চুলের মত এলোমেলো। হাজারী সাহেব প্রথমে কিছু বুঝতেই পারলেন না। চোখে তাঁর উন্মাদের দৃষ্টি। আজ দু'সপ্তাহ তার মুখে অনু পড়েনি বা প্রাণ ভরে পানি পান করেনি। সামান্য একটি শুকনো রুটি তাকে দেওয়া হয়েছে আর এক কাপ পানি, যেন হাজারী সাহেব জীবনে বেঁচে থাকেন। ক্ষুধার কেমন জ্বালা তা তিল তিল করে অনুভব করবার সুযোগ পাচ্ছেন হাজারী সাহেব।

প্রথমে না চিনলেও একটু পরেই চিনতে পারলেন যে মুহূর্তে হাজারী টিমের অধিপতিগণ তাকে জড়িয়ে ধরে বললেন—হাজারী সাহেব আপনি...আপনার এ অবস্থা...

হাজারী সাহেব হাঁউ মাঁউ করে কেঁদে উঠলেন একটা শিশু ছেলের মত। কাঁদতে কাঁদতে তিনি বললেন—আজ দু'সপ্তাহ মুখে অনু পড়েনি। কেনো আপনারা আমাকে দিয়ে এ সব অসৎ ব্যবসা চালিয়েছিলেন? বলুন, কেনো কেনো আপনারা আমাকে আপনাদের দলে টেনে নিয়েছিলেন.....হাজারী সাহেব এবার কঠিনভাবে চেপে ধরলেন প্রধান অধিনায়কের গলা।

প্রধান অধিনায়ক উন্মাদ প্রায়, হাজারীর কবল থেকে নিজেকে ছাড়িয়ে নেবার আশ্রয় চেষ্টা করতে লাগলো। অন্যান্য অধিনায়কগণও প্রধান অধিনায়ককে সহায়তা করছেন কিন্তু হাজারী সাহেব একেবারে এটে ধরেছেন কিছুতেই ছাড়ছেন না।

দাঁতে দাঁত পিষে কঠিন কণ্ঠে বললেন বনহর—হাজারী সাহেবকে দেখে আপনারা নিজেদের পরিণতির কথা স্মরণ করুন মহামান্য অধিনায়কগণ।

বনহরের কথা শেষ হবার সঙ্গে সঙ্গে দরজা আপনা-আপনি বন্ধ হয়ে গেল। জমাট অন্ধকারে আচ্ছন্ন হলো কক্ষটা।

বেশ।

একটু পরে দু’জন বলিষ্ঠ লোক হাজারী সাহেবকে নিয়ে এলো।

প্রথমে হাজারী সাহেবকে চিনতেই পারলেন না। তার পরম বন্ধু স্থানীয় মহান অধিপতিগণ। কিন্তু একটু পরেই তারা চিনতে পারলেন এবং ব্যাকুল কণ্ঠে বললেন—হাজারী সাহেব আপনি!

হাজারী সাহেব যেন এ ক’দিনে একটা জীবন্ত কঙ্কাল বনে গেছে। চোখ দুটো ঘোলাটে, চুলগুলো রুক্ষ, পাগলের চুলের মত এলোমেলো। হাজারী সাহেব প্রথমে কিছু বুঝতেই পারলেন না। চোখে তাঁর উন্মাদের দৃষ্টি। আজ দু’সপ্তাহ তার মুখে অনু পড়েনি বা প্রাণ ভরে পানি পান করেনি। সামান্য একটি শুকনো রুটি তাকে দেওয়া হয়েছে আর এক কাপ পানি, যেন হাজারী সাহেব জীবনে বেঁচে থাকেন। ক্ষুধার কেমন জ্বালা তা তিল তিল করে অনুভব করবার সুযোগ পাচ্ছেন হাজারী সাহেব।

প্রথমে না চিনলেও একটু পরেই চিনতে পারলেন যে মুহূর্তে হাজারী টিমের অধিপতিগণ তাকে জড়িয়ে ধরে বললেন—হাজারী সাহেব আপনি...আপনার এ অবস্থা...

হাজারী সাহেব হাঁউ মাঁউ করে কেঁদে উঠলেন একটা শিশু ছেলের মত। কাঁদতে কাঁদতে তিনি বললেন—আজ দু’সপ্তাহ মুখে অনু পড়েনি। কেনো আপনারা আমাকে দিয়ে এ সব অসৎ ব্যবসা চালিয়েছিলেন? বলুন, কেনো কেনো আপনারা আমাকে আপনাদের দলে টেনে নিয়েছিলেন.....হাজারী সাহেব এবার কঠিনভাবে চেপে ধরলেন প্রধান অধিনায়কের গলা।

প্রধান অধিনায়ক উন্মাদ প্রায়, হাজারীর কবল থেকে নিজেকে ছাড়িয়ে নেবার আশ্রয় চেষ্টা করতে লাগলো। অন্যান্য অধিনায়কগণও প্রধান অধিনায়ককে সহায়তা করছেন কিন্তু হাজারী সাহেব একেবারে এটে ধরেছেন কিছুতেই ছাড়ছেন না।

দাঁতে দাঁত পিষে কঠিন কণ্ঠে বললেন বনহর—হাজারী সাহেবকে দেখে আপনারা নিজেদের পরিণতির কথা স্মরণ করুন মহামান্য অধিনায়কগণ।

বনহরের কথা শেষ হবার সঙ্গে সঙ্গে দরজা আপনা-আপনি বন্ধ হয়ে গেল। জমাট অন্ধকারে আচ্ছন্ন হলো কক্ষটা।

অধিনায়কগণ চোখে শর্ষে ফুল দেখতে লাগলেন। এতো নিজেদের স্বার্থে দেশবাসীদের সঙ্গে যে বিশ্বাসঘাতকতা করেছেন আজ তার প্রায়শ্চিত্ত শুরু হলো।

বনহর ফিরে চললো, তার পিছনে মশাল হাতে এগিয়ে চললো তার অনুচরগণ।

বললো বনহর—যারা দেশের সর্বনাশের মূল—যারা দেশের এই দুর্বিসহ অবস্থার জন্য দায়ী, যারা জনগণকে নিয়ে ছিনিমিনি খেলছে, সেই মহা নায়কদের আমি বন্দী করে আনতে সক্ষম হয়েছি। রামসিং রহমান তোমাদের সকলের সহায়তায় আমি এত বড় একটা কঠিন কাজ আয়ত্তে আনতে পেরেছি। পুলিশ মহলকে এরা নাচের পুতুল বানিয়ে তাদের দিয়ে যেমন খুশি তেমনি কাজ করাতো। বেচারী পুলিশ বাহিনী যদি এদের কথা মতো কাজ না করতো—তাদের হয় চাকুরি যেতো, নয় জীবন। চাকুরি না হলেও চলবে না, প্রাণও বাঁচাতে হবে, কাজেই পুলিশমহল এদের ইংগিতে নাচতো—আমি সে নাচ বন্ধ করে দিবা।

সর্দার চোরাচালানীই সব কি শায়েস্তা হবে এদের বন্ধ করে? বললো রামসিং।

না, যারা ছোট খাটো এরা তো আছেই। আর এদের শায়েস্তা করতে আমার প্রয়োজন হবে না। মূল স্তম্ভ যারা, যারা এক দু' বা চার মণ নয় কোটি কোটি মণ খাদ্যশস্য এবং পণ্যদ্রব্য সীমান্তের বাইরে পাচারের জন্য নিয়োজিত ছিলো, আমি তাদের আটক করেছি। জীবনে মারবো না এদের। একটু থামলো বনহর, তারপর বললো ক্ষুধার্ত জনগণের কষ্ট কিছুটা আঁচ করে নিক। বুঝুক ওরা যাদের ঘরে খাবার থাকেনা তাঁদের অবস্থা কেমন হয়। প্রতিদিন একখানা করে শুকনো রুটি দেবে আর দেবে এক কাপ করে পানি। যেন বন্দী খানায় কারো মৃত্যু না ঘটে।

বনহর আস্তানার বাইরে বেরিয়ে আসে। অদূরে তাজ ও দুলাকি অপেক্ষা করছিলো। তাজের পিঠে চেপে বসে বনহর। আর রহমান চেপে বসে দুলাকির পিঠে।



দিপালী এখন সম্পূর্ণ সুস্থ, সে আবার আগের মত উচ্ছল চঞ্চল হাস্যদ্বীপ হয়ে উঠেছে। বনহরের আস্তানায় সে এখন নিশ্চুপ থাকে না। সমস্ত আস্তানা সে চষে ফেরে।

মোহসিনের সঙ্গেই অবশ্য দিপালী বনহরের আস্তানা ঘুরে ফিরে দেখেছে। সব দেখে সে অবাক হয়ে গেছে, এমন জায়গা সে কোনোদিন দেখেনি, তার বাবা হিম্মৎখাঁর আড্ডাখানা সে দেখেছে। কান্তাবারের অভ্যন্তরে ছিলো সে এক মহা ব্যাপার। কিন্তু এমন এক বিশাল রাজ্য দিপালী দেখেননি। একেবারে স্তম্ভিত হতবাক হয়ে গেছে সে।

দিপালীর কোথাও যেতে মানা নেই, তাই সে সময় অসময়ে আস্তানার সবকিছু ঘুরেফিরে দেখে।

সেদিন আস্তানা ছেড়ে সবাই কাজে গেছে। এমন সময় দিপালী ধীরে ধীরে অগ্রসর হলো আস্তানার দক্ষিণ দিকে। মোহসিন সব দিক দেখিয়েছে কিন্তু দক্ষিণ দিক সে তাকে দেখায় নাই।

দিপালী কিছুটা এগুতেই সে শুনতে পেলো একটা শব্দ ঘর্ ঘর্ ঘর্। এ কিসের শব্দ—ভাবলো দিপালী এবং অতি সতর্কতার সঙ্গে এগুলো। বেশ কিছুটা এগুতেই দেখলো উঁচু এক প্রাচীর। শব্দটা ঐ প্রাচীরের ভিতর থেকেই আসছে। দিপালী প্রাচীরের অপারের শব্দটার আসল রূপ দেখার জন্য ব্যাকুল হয়ে উঠলো।

একটা উঁচু স্থানে দাঁড়িয়ে সে প্রাচীরের উপারে উঠে পড়ার চেষ্টা করছে, এমন সময় দিপালীর কাঁধে কে যেন হাত রাখলো।

চমকে ফিরে তাকালো দিপালী।

সঙ্গে সঙ্গে দীপ্ত হয়ে উঠলো তার চোখ দুটি।

আনন্দ উচ্ছল কণ্ঠে বললো রাজকুমার!

হঁ রাজকুমার নয়—দস্যু বনহর।

না তুমি চিরদিন আমার কাছে রাজকুমার হয়েই থাকবে। বলো রাজকুমার, এতদিন তুমি কোথায় ছিলে?

বললো বনহর—এই তোমার পাশে পাশেই ছিলাম দিপালী।

মিথ্যে কথা।

মোটাই মিথ্যে নয়, যাক বলো এদিকে কেন এসেছো?

এই শব্দটা আমাকে টেনে এনেছে। বলো রাজকুমার প্রাচীরের ওপাশে কিসের ও শব্দ?

তুমি জানতে চাও?

হাঁ, বড় ইচ্ছা হচ্ছে।

দিপালীর সব ইচ্ছাই সব সময় পূর্ণ হয় না। প্রাচীরের ওপাশে ও কিসের শব্দ তুমি জানতে পারবে না।

কেনো?

কেনো তাও বলা যাবে না।

রাজকুমার আজও তুমি আমাকে বিশ্বাস করো না। একটি বার নয় কয়েকবার তুমি আমার জীবন রক্ষা করেছো। আমি আজও তোমার এতোটুকু উপকার করতে পারিনি।

হাঁ, কিন্তু যখন প্রয়োজন হবে তখন করবে এবং করবে বলেই আমিও তোমাকে সেই শয়তানদের কবল থেকে উদ্ধার করে এনেছি। দিপালী একদিনেই তুমি আমাদের আস্তানার একজন হয়ে গেছো। এখন আমাদের আস্তানার বাইরে তুমি গেলেও আমাদের কোনো ক্ষতি সাধিত হবে না এ আমি জানি।

রাজকুমার তুমি বিশ্বাস করো আমার দ্বারা কোনোদিন তোমাদের কোনো ক্ষতি হবে না।

এ বিশ্বাস আমার আছে। দিপালী দেশ এখন মহা সমস্যার সম্মুখীন। দেশের প্রতিটি নাগরিককে সংগ্রাম করতে হবে, এ মহা সমস্যার করাল গ্রাস থেকে দেশকে মুক্ত করার জন্য।

বনহরের কথাগুলো দিপালী সমস্ত মন দিয়ে শুনছিলো।

বনহর বলে যাচ্ছে তখনও।

প্রাচীরের ও পাশ থেকে ভেসে আসছে এক টানা ঘর ঘর ঘর শব্দ..... নিস্তর্র পুরিতে যেন এক অদ্ভুত পরিবেশ সৃষ্টি হচ্ছিলো। বনহরের মুখমণ্ডলে গাভীরের ছাপ বিদ্যমান সে বলছে এই মহা সমস্যা হতে দেশকে রক্ষা করতে হলে চাই অসীম মনোবল। চাই স্বার্থহীন সংগ্রাম। দিপালী শুধু কান্দাই শহরে নয়, সমস্ত দেশ ব্যাপি একটা বিরাট অশান্তির আগুন জ্বলছে। যে আগুনের জ্বালা আজ প্রতিটি মানুষের ঘরে ঘরে।

আমি জানি রাজকুমার তুমি যা বলতে চাও, আমি জানি। তুমি যা বলবে আমি তাই করবো। রাজকুমার বলো প্রাচীরের ওপাশে এ কিসের শব্দ?

তুমি জানতে চাও।

হাঁ।

বেশ এসো আমার সঙ্গে। বনহর দিপালী সহ এগিয়ে যায় প্রাচীরের মাঝামাঝি এক অংশে। সম্মুখে কিছুটা এগিয়ে থমকে দাঁড়ায় বনহর।

দিপালীও দাঁড়িয়ে পড়তে বাধ্য হয়।

বনহর দেয়ালের এক অংশে চাপ দিতেই ধীরে ধীরে দেয়াল সরে যায় এক পাশে, বেরিয়ে আসে একটা পথ।

বনহর দিপালীকে লক্ষ্য করে বলে চলো।

দিপালী বনহরের অগ্রে প্রবেশ করে প্রাচীরের ভিতরে। বনহর পিছনে এগিয়ে যায়।

• ও পাশে একটি আধো অন্ধকার সুড়ঙ্গ পথ।

দিপালী হোচট খেয়ে পড়ে গেলো।

সঙ্গে সঙ্গে দিপালীকে ধরে ফেললো বনহর। দিপালীর সমস্ত দেহ এবং মনে অপূর্ব এক শিহরণ নাড়া দিয়ে গেলো। দিপালীর হৃদয় অনাবিল এক আনন্দে আত্মহারা হলো।

বনহর তাকে কোনোদিন স্পর্শ করেনি। আজ তাই দিপালী যেন অভিভূত হয়ে পড়লো। একটুখানি স্পর্শ একটু খানি ছোয়া তার শিরায় জাগিয়ে তুললো গভীর আবেগভরা একটা অনুভূতি।

বনহর বললো অন্ধকার কিনা।

হাঁ, আলো থেকে হঠাৎ অন্ধকারে ঠিক দেখতে পারিনি রাজকুমার।

দিপালী তুমি এখনও আমাকে রাজকুমার বলবে?

এ ছাড়া তোমাকে কি বলে ডাকবো বলো?

বনহর, মনির, বা সর্দার যা তোমার খুশি।

না ওসব নামে তোমায় মানায় না। তুমি আমার জীবনে এসেছো রাজকুমার বেশে। আমার রাজকুমার তুমি.....

বনহর কোনো জবাব দেয়না।

এগুতে থাকে ওরা।

কিছুটা এগিয়ে একটি লৌহ প্রাচীর। বনহর সেই লৌহ প্রাচীরের সম্মুখে দাঁড়িয়ে একটি সুইচে চাপ দেয়, সঙ্গে সঙ্গে বেরিয়ে পড়ে একটি ক্ষুদ্রাবৃত ছিদ্র পথ।

বনহর বললো—সম্মুখে দৃষ্টি নিক্ষেপ করো দিপালী।

দিপালী ব্যাকুল আগ্রহে দৃষ্টি নিক্ষেপ করলো। সঙ্গে সঙ্গে বিস্ময়ে আড়ষ্ট হলো সে। ওপাশে বিশাল এক রাজ্য বিরাট বিরাট মেশিন চলছে। ভাল ভাবে নজর পড়তেই দিপালী বলে উঠে অস্ত্রাগার। এখানে অস্ত্র তৈরি হচ্ছে?

হাঁ দিপালী, অস্ত্রাগারই বটে। এখানে যে কোনো আধুনিক অস্ত্র তৈরি হয়। এ স্থান কোথায় জানো?

না তো?

কান্দাই শহরের ভেনিয়ার হাজার ফিট মাটির নিচে আমরা এখন দাঁড়িয়ে। এই অস্ত্রাগার তৈরি করতে আমাদের কয়েক কোটি টাকা ব্যয় করতে হয়েছে। দীর্ঘ তিন বৎসর ধরে চব্বিশ হাজার দশ ইঞ্জিনিয়ার অবিরত কাজ করে, আমার এই অস্ত্রাগার তৈরি হয়েছে। দিপালী আমি জানি আমার অস্ত্রাগারে যে অস্ত্র তৈরি হচ্ছে তা পৃথিবীর কোনো অস্ত্রাগারে আজও তৈরি হয়নি। শব্দ বিহীন রিভলবার, রাইফেল, মেশিনগান এবং বোমা। যা বিস্ফোরণের শব্দ দশ হাতের মধ্যের কোনো ব্যক্তি শুনতে পারবে না। এ ছাড়াও আছে ভারী ভারী অস্ত্র.....

আচ্ছা রাজকুমার এতো অস্ত্র তৈরি করে কি করবে তুমি?

ভয় নেই, যুদ্ধ আমি করবো না, কিন্তু দেশরক্ষার প্রয়োজনে যদি অস্ত্র প্রয়োজন হয় তখন আমার এই অস্ত্রাগার থেকে প্রয়োজনীয় অস্ত্র আমি দেশবাসীকে দেবো।

বনহর যখন কথা বলছিলো তখন তার দিকে নির্বাক দৃষ্টি মেলে তাকিয়েছিলো দিপালী।

বনহর বললো—অস্ত্রাগারের পাশে বেশিক্ষণ অপেক্ষা করা ঠিক হবেনা, চলো দিপালী একটা অদ্ভুত এবং বিস্ময়কর জিনিষ তোমাকে দেখাবো।

দিপালী বললো—চলো।

বনহর আর দিপালী এগিয়ে চললো।

বেরিয়ে এলো তারা অস্ত্রাগারের পাশ থেকে। সুদীর্ঘ সুড়ঙ্গ পথ।

আধো অন্ধকারাচ্ছন্ন সুড়ঙ্গ পথে ওরা দু'জনা। দিপালীকে পথ দেখিয়ে নিয়ে চলেছে স্বয়ং দস্যু বনহর।

কয়েক গজ এগিয়ে থমকে দাঁড়ালো বনহর।

একটা ছোট্ট লিফ্ট।

উঠে দাঁড়ালো বনহর বললো—এসো.....

দিপালী উঠতে পারছিলেনা।

বনহর হাত বাড়িয়ে দিলো, হাত ধরে উঠে এসো।

দিপালী বনহরের বলিষ্ঠ হাতের উপর হাত রাখলো। বনহর ওকে তুলে নিলো লিফ্টে পাশাপাশি দাঁড়ালো ওরা।

বনহরের দেহের স্পর্শ দিপালীর দেহে শিহরণে জাগালো। অনন্তকাল ধরে যদি সে এমনি করে তার রাজকুমারকে পাশে পেতো। পৃথিবীর কোনো ঐশ্বর্যই সে চায়না-যদি সে ওকে পায় কিন্তু তাকে সে কোন দিন পাবে না, পেতে পারেনা কারণ সে অপবিত্র। কিন্তু সে কি নিজে নিজের এই নষ্ট জীবনের জন্য দায়ী? দিপালী বনহরের পাশে দাঁড়িয়ে ভাবছে। লিফ্ট সমানে এগিয়ে যাচ্ছে দিপালী বুঝতে পারছে না লিফ্ট উপরে উঠছে না নীচে নামছে। আসলে লিফ্ট চলেছে সোজাসুজি পাতালে।

দিপালীর মনে এক উচ্ছল আনন্দ, বনহরকে সে কামনা করে কিন্তু কোনোদিন তাকে সে পাবে কিনা জানে না। এতো কাছে, তবু মনে হয় কত দূরের মানুষ সে।

লিফ্ট চলেছে।

দিপালীর মনে রাশি রাশি চিন্তাধারা বয়ে চলেছে।

দু'পাশে জমাট পাথুরে দেয়াল।

অন্ধকার কিছু হালকা বলে মনে হলেও খুব বেশি নয়।

তবে বনহরকে দিপালী স্পষ্ট দেখতে পাচ্ছে। ওর নিঃশ্বাসের শব্দ শুনতে পাচ্ছে, এমনকি বনহরের দেহের একটা পবিত্র উষ্ণতার ছোঁয়াচ তার দেহ স্পষ্ট করছে।

দিপালী ভাবছে একটিবার যদি সে রাজকুমারের বুকে মাথা রাখতে পারতো। যদি সে ঐ দুটি বলিষ্ঠ বাহুবন্ধনে আবদ্ধ হতে পারতো। কিন্তু না না এ চিন্তা করাও পাপ কারণ যে অপবিত্র। রাজকুমারকে সে স্পর্শ করতে পারেনা।

বনহর আর দিপালী নীরবে চলেছে।

উভয়ের মনের চিন্তাধারা এক নয়, দু'জন ভাবছে দু'দিক। বনহর ভাবছে হয়তো তার কান্দাই জঙ্গলের আস্তানার কথা। ভাবছে তার কাজের কথা। ভাবছে জম্বুর ঘটনাগুলো নিয়ে আর দিপালী ভাবছে রাজকুমার কি কোনো দিন তার হবে না।

হঠাৎ দিপালীর চিন্তাধারা এলোমেলো হয়ে গেলো। বিরাটভাবে চমকে উঠলো দিপালী।

একটা তীব্র আর্ত চিৎকার অতি দুর্বল সে কণ্ঠস্বর অতি মর্মবিদারক করুন।

দিপালী বললো—রাজকুমার?

আশ্চর্য হচ্ছে দিপালী?

হাঁ। ও কিসের শব্দ?

তোমার কি মনে হয় দিপালী?

কোন মানুষের কণ্ঠস্বর ।

না, মানুষের নয় ।

বলো কি রাজকুমার আমি তো ঠিক মানুষের কণ্ঠস্বর শুনতে পেলাম ।

বলেছি তো মানুষ নয় ।

তবে কি?

জানোয়ার ।

হাঁ ।

কিন্তু মানুষের মত উচ্চারণ.....

বেশ দেখলেই বুঝতে পারবে ।

আমাকে কোথায় নিয়ে যাচ্ছে রাজকুমার?

মনে কোনো সন্দেহ জাগছে?

না ।

এমন নির্জন, নির্জনতার মধ্যেও তোমার মনে সন্দেহ জাগছে না দিপালী?

রাজকুমার যুগ যুগ তোমার পাশে থেকে এমনি করে চলতে পারলে নিজেকে সার্থক মনে করবো । রাজকুমার তুমি মানুষ নও দেবতা.....

দিপালী তুমি আমাকে ভালবাসো বলেই দেবতা মনে করো কিন্তু আসলে দেবতার মধ্যে যে গুণ থাকা দরকার তার একটি গুণও নেই আমার মধ্যে । এই তো আমরা প্রায় এসে গেছি । দিপালী সাবধান এবার যে জায়গা দিয়ে লিফ্ট চলতে শুরু করেছে অতি ভয়ঙ্কর জায়গা নিচের দিকে তাকিও না ।

দিপালী হঠাৎ নিচে দৃষ্টি নিক্ষেপ করে । সঙ্গে সঙ্গে ওর মাথা ঘুরে পড়ে যাবার উপক্রম হতেই ধরে ফেলে বনহর ।

দিপালী যেন অনাবিল এক আনন্দ সাগরে ডুবে যায় । যদিও দিপালী নিচে দৃষ্টি নিক্ষেপ করতেই সে দেখতে পেয়েছিলো গভীর একটি খাদ । সেই খাদ পেরিয়ে লিফ্ট এগিয়ে যাচ্ছে । দিপালীর মনে হচ্ছিলো যদি লিফ্ট খানা ছিঁড়ে তারা পড়ে যায় তা হলে আর রক্ষা থাকবে না । তাদের হাড়-গোড়

পিষে একাকার হয়ে যাবে। মাথাটা হঠাৎ কেমন যেন ঝিম ঝিম করে উঠেছিলো। বনহর ওকে নিবিড়ভাবে কাছে টেনে নেবার সঙ্গে সঙ্গেই দিপালীর মনে হয়েছিলো এবার সে হাজার ফুট নিচে কেনো লক্ষ লক্ষ ফুট নিচে গভীর খাদের মধ্যে পড়ে মিশে যেতে পারে। দিপালীর মন প্রাণ আবেশে উচ্ছল হয়ে উঠেছিলো। কিন্তু সে নীরব ছিলো নিষ্প্রাণ পুতুলের মত এ মুহূর্তে তার মনে কোনো ভয় ছিলো, না বরং ছিলো অভূতপূর্ব এক শিহরণ।

বললো বনহর—দিপালী ভয় নেই, আর একবার তাকিয়ে দেখো—

দিপালী তাকালো চোখ মেলে।

নিচে এখন আর গভীর খাদ নেই। লিফ্ট এসে থেমে পড়েছে।

বনহর দিপালীর হাত ধরে নামিয়ে নিলো নিচে এ যেন যাদুর রাজ্য।

দিপালী মুগ্ধ চোখে তাকিয়ে দেখছে।

সম্মুখে বিরাট একটা জল কল্লোল হুহু করে বয়ে চলেছে দু'পাশে শ্বেত পাথরের আসন। জলধারা ছোট বড় পাথরের নুড়িগুলোর উপর দিয়ে কল কল ধরায় বয়ে যাচ্ছে।

অপূর্ব সে দৃশ্য।

যদিও ভূগর্ভ, তাতে কোনো সন্দেহ নাই তবু কোথা থেকে রাশি রাশি আলোক ছটা ছড়িয়ে পড়ছে জল কল্লোলের বুকে।

বনহর এসে দাঁড়ালো।

দিপালী ওর পাশে। হঠাৎ দিপালী জলকল্লোলের ওপারে তাকিয়ে বিস্মৃত হলো, সুন্দর একটি কক্ষ। কক্ষটি ধপ ধপে মার্বেল পাথরে তৈরি। কক্ষটির দরজা বন্ধ। কক্ষ থেকে একটি সোপান নেমে এসেছে জল কল্লোলের বুকে।

কয়েকটি ধাপ জলকল্লোলের মধ্যে ডুবে রয়েছে। পাথরগুলোর বুকে আছাড় খেয়ে খেয়ে উচ্ছল জল রাশি নেমে যাচ্ছে নিচের দিকে।

দিপালী বললো—সত্যি বড় সুন্দর।

কি?

ঐ জল কল্লোল। আচ্ছা রাজকুমার ঐ জলকল্লোলের ওপাশে যে সাদা ধপ ধপে কক্ষটি দেখতে পাচ্ছি ওটা কিসের কক্ষ?

তোমার বুঝি দেখতে খুব ইচ্ছা হচ্ছে?

হাঁ।

চলো।

বনহর আর দিপালী এগিয়ে যায় পাথরের ধাপে ধাপে পা রেখে। বনহর অবশ্য ওকে মাঝে মাঝে এগুতে সাহায্য করছিলো।

আনন্দে দিপালীর মন উচ্ছল চঞ্চল হয়ে উঠে।

বলে দিপালী—রাজকুমার।

বলো?

সত্যি, আমি তো স্বপ্ন দেখছিনা।

স্বপ্ন?

হাঁ, এ যেন কোনো এক স্বপ্নময় রাজ্য বলে মনে হচ্ছে।

কেন?

আমি বিশ্বাস করতে পারছিনা, তুমি আছো আমার পাশে। এ যেন আমার কত সাধনার দিনগুলো খুঁজে পেয়েছি.....

দিপালী।

বলো রাজকুমার?

এত সাধ এত বাসনা তোমার মনে? আচ্ছা দিপালী এই সুন্দর স্বপ্নপুরি যদি আমি তোমাকে উপহারস্বরূপ দেই, বলো গ্রহণ করবে?

এত সুখ কি আমার সহিবে রাজকুমার?

কেন? দিপালী, কেন তুমি ভয় পাও?

জানি না, কেন আমি ভয় পাই। জানিনা, আমি নিজেও। বড় দুঃখী, বড় অসহায়। আমি কিনা.....

দিপালী নিজেকে কোনো সময় এত ক্ষুদ্র বলে ভাবতে নেই। তুমি মানুষ এ কথা ভুলে যেও না।

কিন্তু.....

না, কোনো কিন্তু নেই। দিপালী তুমি থাকবে এই স্বপ্ন পুরিতে। যা চাইবে তাই পাবে, শুধু প্রয়োজন হলে কাজ করতে হবে। দিপালী বলো পারবে আমার কাজ করতে?

যা বলবে আমি তাই করবো?

সত্যি বলছো তো?

দিপালী কোনোদিন মিথ্যা বলে না।

জানি। তোমার উপর বিশ্বাস আসে।

কি কাজ করতে হবে বলো রাজকুমার?

অন্যায় কাজ আমি তোমায় করতে বলবোনা দিপালী, এ বিশ্বাস তুমি রেখো। তবে আজ কাজের কথা নয়।

তবে আনন্দের কথা বলো? আজকের এই পবিত্রময় মুহূর্তে আমি তোমার মুখে শুনতে চাই অনন্তকালের কাহিনী। যে কাহিনী কোনোদিন শেষ হবে না। রাজকুমার তুমিও যাবেনা আমার পাশ থেকে।

দিপালী আজ অবশ্য সময় হবে না, এরপর যেদিন আবার দেখা হবে, সেদিন তুমি যা জানতে চাইবে তাই আমি তোমাকে বলবো। এসো ঐ কক্ষটি তোমায় দেখাবো।

কি আছে ঐ কক্ষে।

ঐ কক্ষে তুমি থাকবে, যদি তোমার ভাল লাগে।

কিছু.....

বুঝেছি একা ভয় পাচ্ছো। থাকতে পারবে না একা, তাই না? এসো দেখবে এসো.....বনহর দিপালীর হাত ধরে নিয়ে চলে সোজা।

জলচ্ছাস পেরিয়ে পৌছে যায় ওরা কক্ষটির সম্মুখে।

শ্বেত পাথরে তৈরি একটি সমাধি মন্দিরের মত সুন্দর একটি কক্ষ। সুন্দর মসৃণ সোপানগুলো। অপূর্ব যেন একটি পথের খণ্ড।

বনহর দরজার পাশে হাত রাখতেই খুলে যায় কক্ষটির দরজা।

আশ্চর্য এক দৃশ্য।

দিপালীর দু'চোখে বিস্ময় ঝরে পড়ে।

বনহর বলে উঠে—দিপালী।

এত মনিমুক্তা, এত ধন সম্পদ.....

তুমি যেমন অবাক হয়েছো, তেমনি বিস্মিত হয়েছে আমার স্ত্রী মনিরা, তবে এমন শ্বেত পাথরে তৈরি কক্ষ দেখে নয়। সে এক পোড়ো বাড়ির

অভ্যন্তরের নিভৃত এক কক্ষ.....রাজকুমার তোমার স্ত্রী...তোমার স্ত্রী
আছে?

হাঁ দিপালী.....

কিছু.....

কোনো কিছু নয়, আমার স্ত্রী আছে সন্তান আছে।

আমি বিশ্বাস করিনা।

কেন?

তুমি কোনোদিন বলোনি।

প্রয়োজন বোধ করিনি।

রাজকুমার।

দিপালী তুমি বিশ্বাস করো আর নাই করো আমি তোমাকে সত্য কথা
বলবো কারণ তোমাকে আমার.....প্রয়োজন.....

তুমি.....

না না ছেড়ে দাও, ছেড়ে দাও। রাজকুমার আমি, আমি অপবিত্র এক
নারী দেহ.....

দিপালী তবু তোমাকে আমার প্রয়োজন! না হলে এতো দূর তোমায়
নিয়ে আসতাম না.....

দিপালী স্থির দৃষ্টি মেলে তাকায় বনহরের মুখের দিকে। সে চাহনী
নির্বাক অসহায় করুন নয়, এক বিস্ময়করভাবমূর্তি যেন কারণ সে এমন রূপ
কোনোদিন রাজকুমারের মধ্যে লক্ষ্য করেনি। আজ এক নতুন রূপে সে
দেখলো তাকে।

বললো বনহর—দিপালী কি চাও তুমি বলো? আমাকে না এই শ্বেত
স্বর্ণগুহার রত্ন সজ্জারগুলোও। যা চাও তাই পাবে।

না না আমি তোমাকে—তোমাকে চাই না। আমি স্বর্ণগুহার
রত্নসজ্জারগুলোও চাই না.....

দিপালী।

বলো রাজকুমার।

তবে কি চাও তুমি? বনহর দিপালীর দেহখানা বলিষ্ঠ হাতের মুঠায়
চেপে ধরে ঝাঁকুনি দেয়।

বনহরের নতুন রূপ দিপালীকে আরও বিস্মিত করলো শুধু বিস্মিত নয় একেবারে আশ্চর্য হয়ে গেছে সে, কত দিন কত নির্জনতা পূর্ণ পরিবেশেও কোনোদিন দিপালী তাকে অধৈর্য হতে দেখেনি বা ঘটেনি তার কোনো ধৈর্যচ্যুতি।

দিপালীকে ঝাঁকুনি দিয়ে বললো বনহর—চুপ করে রইলে কেন, বলো।

না আমি কিছু চাই না।

স্বেত কক্ষের রত্ন সজ্জার চাও না দিপালী?

না।

দিপালী এ তুমি কি বলছো?

চাইনা। চাইনা আমি কোনো কিছু।

আমাকে?

তোমাকে.....তোমাকে আমি ভালবাসি রাজকুমার কিন্তু তোমাকে স্পর্শ করার মত সাহস আমার নেই.....আমি যে অপবিত্র.....

যে রাজ কুমারকে পাবার জন্য উনুখ দিপালী, যে রাজকুমারের সান্নিধ্য লাভের কামনা তাকে উন্মাদ করে তোলে এই মুহূর্তে সেই রাজকুমারের বাহু বন্ধনে আবদ্ধ হতে পারে সে ইচ্ছা করলেই কিন্তু সে নিজেকে অতিকষ্টে সংযত করে নিলো।

বনহরকে দিপালী সরিয়ে ছিলো।

দিপালীর চিবুক তুলে ধরলো বনহর—একি তোমার চোখে পানি?

ও কিছু না।

বনহর কি যেন ভাবলো, তারপর বললো—চলো ফিরে যাই।

চলো রাজকুমার তাই চলো। আমি চাই না তোমার রত্নসজ্জার।

দিপালী তুমি অপূর্ব! অপূর্ব তোমার মন। বড় সুন্দর তুমি.....

না আমি যে কলঙ্কিনী:.....

তোমার জীবনের জন্য তুমি দায়ী নও।

জানি, তবু আমি.....তবু পারিনা নিজের সম্বন্ধে কিছু ভাবতে। রাজকুমার বলো কেন, কেন আমি পারিনা নিজেকে নিয়ে কোনো চিন্তা করতে।

হয়তো তোমার মনের ভ্রম.....

না।

দিপালী তোমার জীবনের জন্য তুমি নিজে দায়ী নও। তোমাকে হরণ করা হয়েছিলো, তুমি তখন নিজেও জানতে না বা বুঝতে না কিছু।

দিপালীর দু'চোখে বিষ্ময় ফুটে উঠে।

বনহর বলে—এসো।

কোথায়?

ঐ জল কল্লোলের পাশে।

তোমার স্বর্ণগুহা বা শ্বেত কক্ষ এমনি খোয়া পড়ে থাকবে?

ক্ষতি হবে না, কারণ এ রাজ্যে কেউ কোনো দিন প্রবেশে সক্ষম নয়! এসো দিপালী.....

চলো।

দিপালী আর বনহর এসে বসলো জল কল্লোলের পাশে।

একরাশ আলোর ছটা এসে গড়িয়ে পড়েছে রূপালী জলস্রোতের উপর, ভারী সুন্দর লাগছে।

বনহর বললো—দিপালী বুঝতে পারিনা মাঝে মাঝে কেন তুমি নিজের উপর অবিচার করো? তোমার জীবনে যা ঘটেছে সব তোমার অনিচ্ছায়, তবু কেন.....

চুপ করো রাজকুমার।

দিপালী তোমার জীবনের জন্য তুমি দায়ী নও, দায়ী সেই শয়তান হিম্মৎ খাঁ। তোমাকে তোমার বাবা মার কাছ থেকে চুরি করে নিয়ে এসেছিলো শয়তানটা।

জানি, এ কথা তুমিই একদিন বলেছিলে আমাকে।

সব তুমি এখনও শোননি, সব কথা আমিও জানিনা, তবে যতটুকু জানি তা এই যে হিম্মৎ খাঁ তোমার অবুঝ অবস্থায় তোমাকে নিয়ে এসেছিলো কান্দাই শহরে। ছোট বেলায় মা বাবার কাছ থেকে তোমাকে ছিনিয়ে এনে শয়তানটা তোমাকে নিজের মেয়ে বানিয়ে নিয়েছিলো কিন্তু আসলেই কি তুমি তার নিজের মেয়ে হতে পেরেছিলে? পারোনি, কারণ হিম্মৎ খাঁ তোমাকে নিজের মেয়ের মত নিঃস্বার্থভাবে গ্রহণ করতে পারেনি। যদি সে

তোমাকে নিঃস্বার্থ ভাবে মেয়ে বানিয়ে নিতে পারতো তা হলে আজ তোমার উপর এমন একটা কলঙ্কের বোঝা চাপাতে পারতো না।

দিপালী বনহরের কথাগুলো মনোযোগ সহকারে শুনে যাচ্ছিলো। এর পূর্বে একবার বনহর দিপালীকে তার জীবন কাহিনী বলার চেষ্টা করেছিলো কিন্তু দিপালী সব শোনেনি বা শোনার সুযোগ লাভে সক্ষম হয়নি।

আজ দিপালী একান্তভাবে শুনে যাচ্ছে ওর কথাগুলো।

বনহর কিছুটা বলে থেমে পড়লো।

দিপালীর দু'চোখে রাজ্যের বিষয় সে এবার প্রশ্ন করে বসলো তুমি যা বলছো সব কি সত্য?

হাঁ সত্যি। তবে প্রথমেই বলেছি তোমার জীবন কাহিনী যতটুকু জানি তা হিম্মৎ খাঁর কাছ থেকেই শোনা। কান্তাবারের এক নিভৃত কক্ষে বসে একদিন সে তার কন্যা দিপালীর জীবন কাহিনী কিছুটা বলেছিলো। জানো দিপালী সেদিন সে মাতাল ছিলো না বা নেশাও করেনি সে কিছু.....

তবু বলেছিলো? কেন বলেছিলো?

হয়তো উদ্দেশ্য ছিলো। দিপালী হিম্মৎ খাঁ সেদিন চেয়েছিলো রাজ কুমার জ্যোতির্ময়কে নিজের জ্বায়ন্তু আনতে।

হাঁ, এবার বুঝেছি, বুঝেছি সব কিছু।

দিপালী সব কিছু বলবার পূর্বেই সে সরে পড়েছিলো সেখান থেকে কারণ কোনো একটি মহান ব্যক্তির আর্বিভাব ঘটেছিলো সেদিন সেখানে!

রাজকুমার তোমার যা বলবার বলা শেষ হয়েছে?

হাঁ, দিপালী আজ আর নয়।

চলো তবে ফিরে যাই।

যাবে?

বনহর ও দিপালী উঠে দাঁড়ালো। পুনরায় ওরা দু'জনা ফিরে এলো সেই লিফটের পাশে।

বনহর লিফটে দাঁড়িয়ে ডাকলো এসো।

দিপালীর দিকে হাত বাড়ালো বনহর।

দিপালীও হাত বাড়িয়ে দিলো।

লিফটে ওরা পাশাপাশি উঠে দাঁড়ালো। যতদূর সম্ভব দ্রুত লিফটখানা এগুচ্ছে। দু'পাশে পাথুরে দেয়াল। কেমন যেন আধো অন্ধকার স্বপ্নময় এক রাজ্য থেকে জমাট অন্ধকারের দিকে এগিয়ে যাচ্ছে লিফটখানা।

বললো বনহর—দিপালী হঠাৎ নীরব হয়ে গেলো কেন?

বলবার কিছু নেই তাই।

দিপালী তুমি কি ফিরে যেতে চাও তোমার সেই হারিয়ে যাওয়া বাবা মার কাছে? বলো—যদি যেতো চাও.....

পারবে? পারবে রাজকুমার আমাকে তুমি নিয়ে যেতে আমার হারিয়ে যাওয়া বাবা মার কাছে? আমার ব্যর্থ জীবনটাকে নতুন আশ্বাদে ভরিয়ে দিতে পারবে?

সাধ হয় যেতে?

হাঁ।

আমি তোমাকে তোমার বাবা মার কাছে ফিরিয়ে নিয়ে যাবো দিপালী।

সত্যি?

হাঁ সত্যি।

কিছু.....

বলো থামলে কেন?

বাবা মা, যাদের কাছ থেকে আমি আজ বিশ বছর আগে হারিয়ে গেছি, কি করে তারা আমায় চিনবে বা আমি তাদের চিনে নেব বলো?

দিপালী তুমি যদি যাবার জন্য প্রস্তুত হয়ে নাও তা হলে কিছু ভাবতে হবে না তোমাকে। তোমার বাবা মাকে চিনে নেবার দায়িত্ব ভার আমার।

রাজকুমার পারবে আমার হারানো বাবা মা কে খুঁজে বের করতে?

পারবো? তুমি প্রস্তুত থেকে দিপালী, একদিন সময় এলেই আমি তোমাকে নিয়ে রওয়ানা দেবো তোমার দেশের উদ্দেশ্যে। দিপালী সত্যি বলতে কি, শুধু তোমার নয় তোমার মত শত শত অসহায় মেয়েদের জন্য বড় দুঃখ হয়। শয়তান হিম্মৎ খাঁর মত মানুষ নাকি জানোয়ারগুলো কত মেয়েকে বাবা মার সান্নিধ্য থেকে ছিনিয়ে এনে তাদের জীবন নিয়ে ছিনি মিনি খেলেছে।

হাঁ, রাজকুমার আমার মত কত মেয়ে আজ রিক্ত সর্বহারা.....বাষ্প
রুদ্ধ হয়ে আসে দিপালীর কণ্ঠস্বর।

লিফ্ট এগিয়ে যাচ্ছে।

হঠাৎ সেই করুণ আর্তচিৎকার কিন্তু বড় ক্ষীণ দুর্বল।

দিপালী চমকে উঠলো।

বনহর বললো—জানায়ারটা দেখছি এখনও বেঁচে আছে।

রাজকুমার কে সে জানোয়ার আমাকে বলবে কি?

সত্যি তুমি জানতে চাও।

হাঁ। যে জানোয়ার মানুষের মত কথা বলতে পারে আমি তাকে এক
নজর দেখতে চাই।

বেশ আমি তোমায় নিয়ে যাচ্ছি।

বনহর লিফ্টের উপরে এক স্থানে পা দিয়ে চাপ দিতেই লিফ্ট থেমে
যায়। এবার লিফ্টখানা নামতে থাকে নিচের দিকে। কয়েক গজ নিচে
নামার পর হঠাৎ থেমে যায় লিফ্টখানা।

দিপালী সম্মুখে তাকিয়ে দেখতে পায় একটা লম্বা টানা বারেন্দায় এসে
থেমে গেছে লিফ্টখানা।

বনহর বললো—নেমে এসো দিপালী।

দিপালী দু'চোখে বিস্ময় নিয়ে নেমে আসে লিফ্ট থেকে, লম্বা টানা
বারান্দার মত প্রশস্ত বেলকুনি।

বনহর দীপ্ত পদক্ষেপে এগিয়ে যাচ্ছে।

দিপালী তাকে অনুসরণ করে চলেছে। ভূগর্ভে এমন এক রাজ্য রয়েছে
এ যেন তার কল্পনার বাইরে।

টানা বেলকুনি ধরে এগিয়ে যেতে যেতে তাকিয়ে তাকিয়ে দেখছিল
দিপালী। যত দেখছে ততই যেন বিস্ময়ে হতবাক হয়ে যাচ্ছে সে। কি ভাবে
এই রহস্যময় রাজ্য তৈরি হয়েছে কে জানে।

বনহর মাঝে মাঝে দিপালীর দিকে তাকিয়ে দেখছিলো, দিপালীর মনো
ভাব সে বুঝতে পারে। বলে বনহর—খুব অবাক হচ্ছে না?

সত্যি রাজকুমার কেমন করে মাটির নিচে এমন সুন্দর রাজ্য তুমি গড়েছো।

অবাক হবার কথাই বটে। একদিন আমি নিজেও তোমার মত অবাক হয়ে গিয়েছিলাম। সে আজ বেশ কয়েক বছর আগের কথা যখন প্রথম আমি এখানে আসি—আমার বাবা সর্দার কালু খাঁর সঙ্গে।

কালু খাঁ।

হাঁ, আমার বাবার নাম সর্দার কালু খাঁ।

কালু খাঁ তিনি কে এবং কি ছিলো?

দস্যু? দস্যু কালু খাঁ.....

দস্যু?

হাঁ।

বুঝেছি, তাই তুমিও তোমার বাবার মত দস্যু হয়েছো রাজকুমার।

বাবার মত দস্যু হতে পেরেছি কিনা জানিনা তবে সর্দার কালু খাঁর বাসনা আমি পূর্ণ করা শপথ নিয়েছি। মৃত্যুকালে সে আমাকে বলে গিয়েছিলো—বনহর আমাকে স্পর্শ করে শপথ কর আমার যে ইচ্ছা নিয়ে বিদায় নিচ্ছি সে ইচ্ছা তুই পূর্ণ করবি বাপ? আমি বাবার মৃত্যু মূহূর্তের কথা ফেলতে পারলাম না, বাবার দেহ স্পর্শ করে বললাম—বলো বাপু তুমি কি ইচ্ছা নিয়ে আজ বিদায় নিচ্ছে? সর্দার কালু খাঁর চোখে আমি কোনদিন অশ্রু দেখিনি, আমার কথায় তার চোখ দুটো ছল ছল করে উঠলো। আমার হাতখানা মুঠায় চেপে ধরে বলল—বনহর, আমার সাধনা ছিলো ধনবানের ঐশ্বর্য লুটে নিয়ে দেশের দুঃস্থ মানুষদের মধ্যে বিলিয়ে দিয়ে তাদের মুখে হাসি ফুটাবো কিন্তু সে সাধ আমার পূর্ণ হলো না.....বাপ তুই আমার সে সাধ পূর্ণ করার.....আমি স্পর্শ করে বলেছিলাম, করবো.....দিপালী তাই করে চলেছি। তুমি যা দেখছো এই যে ভূগর্ভে বিশাল এক রাজ্য এ আমার নয় সেই মহান মহৎ আমার শিক্ষা গুরু দস্যু কালু খাঁর অক্লান্ত পরিশ্রমের স্মৃতি সৌধ।

থামলো বনহর কারণ তার কণ্ঠ ধরে এসেছিলো চাপা কান্নায়। রুমালে চোখ মুছলো সে।

দিপালীর চোখে বিষ্ময়, দস্যু বনহরের চোখে পানি দেখে সে অবাক হয়ে গেলো।

বনহর নিজেকে স্বাভাবিক করে নিল মুহূর্তে, তারপর এগুতে লাগলো সম্মুখে। এখন সেই ক্ষীণ আর্তনাদ আরও স্পষ্ট শোনা যাচ্ছে।

দুর্বল কোনো মানুষের কণ্ঠস্বর।

যত এগুচ্ছে ততবেশি অবাক হচ্ছে দিপালী, কারণ সে কণ্ঠস্বর সে শুনতে পাচ্ছে না মানুষের, কোনো জানোয়ারের নয়। রাজকুমার বলছে এ কণ্ঠস্বর মানুষের নয়, জানোয়ারের, দিপালীর মনে তাই বিষ্ময় জাগছে।

একটি কক্ষের সম্মুখে এসে থামলো বনহর। দেয়ালের এক স্থানে একটি সুইচের মত যন্ত্র রয়েছে সেই যন্ত্রে চাপ দিতেই কক্ষের দরজা খুলে গেলো।

বনহরের পিছনে দাঁড়িয়েছিলো দিপালী, কক্ষ মধ্যে দৃষ্টি পড়তেই চমকে উঠলো সে ভীষণভাবে। দেখলো কক্ষ মধ্যে ঝল মল করছে রাশিকৃত মোহর এবং চাপ চাপ সোনা দানা। মাঝখানে একটি জীবন্ত কঙ্কাল দাঁড়িয়ে আছে, টলছে লোকটা।

দিপালী অস্ফুট কণ্ঠে বললো—কে এই মানুষ?

বনহর হেসে বললো—কাকে তুমি মানুষ বলছো দিপালী মানুষ নয় জানোয়ার।

পরবর্তী বই
স্বর্ণগুহা

ସ୍ବର୍ଗଶା— ୮୦

সত্য ও ন্যায়ের প্রতীক
দস্যু বনহর



দরজা খুলে যেতেই ভিতরে দৃষ্টি পড়লো দিপালীর। বিস্ময়ে চমকে উঠলো সে—রাশি রাশি স্বর্ণ মোহরের মধ্যে দাঁড়িয়ে আছে একটি জীবন্ত কঙ্কাল।

ফিরে তাকালো বনহর দিপালীর মুখের দিকে।

দিপালীর দু'চোখে বিস্ময় ঝরে পড়ছে—এ যেন এক অদ্ভুত দৃশ্য। মানুষ নয়, এ যেন এক চামড়া আচ্ছাদিত কঙ্কাল। চোখ বসে গেছে চার আংগুল। চুল রুক্ষ, লম্বা এলোমেলো। জামাকাপড় ক্ষুধার জ্বালায় দাঁত দিয়ে টেনে কামড়ে ছিড়ে ফেলেছে। চেহারা দেখলে চিনবার কোনো উপায় নেই—কে এই ব্যক্তি।

বনহর বললো—দিপালী, কিছু পূর্বে সুড়ঙ্গপথে আসার সময় তুমি যে কণ্ঠস্বর শুনতে পেয়েছিলো তা এই এরই গলার আওয়াজ।

দিপালী বললো—তুমি না বললে এ আওয়াজ কোনো জানোয়ারের কণ্ঠের?

হাঁ, জানোয়ারেরই বটে। এই যে জীবন্ত কঙ্কাল দেখছো এটা জানোয়ারই, কারণ মানুষ কোনোদিন মানুষের রক্ত শুষে খায় না।

দিপালী বিস্ময়ভরা কণ্ঠে বললো—এই লোকটা বুঝি মানুষের রক্ত শুষে খেতো?

হাঁ দিপালী। দাঁতে দাঁত পিষে বলতে লাগলো বনহর—মানুষের মুখের গ্রাস নিয়ে ছিনিমিনি খেলতো। এই ব্যক্তি হলো কান্দাই রিলিফ প্রধান। বিদেশ থেকে যে হাজার হাজার মণ চাল, গম এবং শিশুখাদ্য এসেছে তা এই নরপশু সীমান্তের ওপারে পাচার করে দিয়েছে। দেশের মানুষ না খেয়ে ক্ষুধার জ্বালায় তিল তিল করে মরেছে অথচ ঐশ্বর্যের ইমারতে বসে বেহেশতের সুখ-স্বাচ্ছন্দ্য ভোগ করেছে। তাই—তাই আমি এই নরপশুকে স্বর্ণগুহায় আটক করে রেখেছি যতগুলি স্বর্ণ ভক্ষণে উদর পূর্ণ করুক।

রিলিফ প্রধান দাঁড়িয়ে দাঁড়িয়ে টলছিলেন, তিনি করুণ ক্ষীণ কণ্ঠে বলে উঠেন—আমার...অপরাধ...মাফ...করে...দাও...আমি...শপথ...ক...র...ছি।

অট্টহাসিতে ফেটে পড়ে বনহর—শপথ করছি! কিসের শপথ?

আর...কোনো...দিন...

সেদিন আর তোমার ভাগ্যে ফিরে আসবে না শয়তান। এই স্বর্ণগুহাই হবে তোমার সমাধি কক্ষ, মনে রেখো রিলিফ প্রধান।

তুমি...তুমি.....

হাঁ, আমি বড় নিষ্ঠুর। তোমাদের মত জীবন্ত শয়তানগুলোকে এমনি করেই স্বর্ণগুহায় আটক করে যত খুশি স্বর্ণ ভক্ষণে সুযোগ দেই। বনহরের কথা শেষ হতে না হতেই স্বর্ণগুহার দরজা বন্ধ হয়ে যায়।

ভিতর থেকে কোনো আওয়াজ আর শোনা যায় না।

দিপালী বলে উঠে—রাজকুমার, ঐ হতভাগ্যটিকে ক্ষমা করে দাও।

ক্ষমা। ওদের জন্য আমার কাছে ক্ষমা নেই দিপালী। যদি কেউ চুরি করে, ডাকাতি করে কিংবা খুন করে তবু ক্ষমা করতে পারি কিন্তু যারা মানুষের মুখের গ্রাস কেড়ে খায় তাদের আমি ক্ষমা করি না। চলো দিপালী।

বনহর এগুতে লাগলো।

দিপালী ওকে অনুসরণ করলো।

কিছুটা এগিয়ে বললো দিপালী—এত দূর থেকে কি করে ওর কণ্ঠস্বর আমরা শুনতে পেয়েছিলাম?

ঐ সুড়ঙ্গমধ্যে স্বর্ণগুহার সঙ্গে একটি শব্দযন্ত্রের যোগাযোগ আছে, তাই স্বর্ণগুহায় সামান্য শব্দ হলেও তা ঐ সুড়ঙ্গ মধ্যে স্পষ্ট শোনা যায়।

ও এবার বুঝতে পেরেছি, এজন্যই আমরা সুড়ঙ্গমধ্যে বহুদূরে থেকেও ঐ রিলিফ প্রধানের কণ্ঠস্বর স্পষ্টভাবে শুনতে পাচ্ছিলাম।

হাঁ দিপালী।

কিন্তু লোকটার শেষ পরিণতি কি ঐ স্বর্ণগুহায়.....

হাঁ, তার শেষ সমাধি রচনা হবে। দিপালী, আমি সব শ্রেণীর লোকদের ক্ষমা করবো কিন্তু যারা দেশবাসীর মুখের আহার নিয়ে ছিনিমিনি খেলে তাদের ক্ষমা করবো না। আমার মনে হয় আল্লাহও তাদের ক্ষমা করবেন না কোনোদিন। দিপালী, দেশের এই মহা ভয়ঙ্কর অবস্থার জন্য শুধু এরাই দায়ী।

দিপালী বললো—শুনেছি সরকার নাকি এবার থেকে দুষ্কৃতিকারীদের বিরুদ্ধে কঠোর শাস্তির ব্যবস্থা করেছেন?

হাঁ, আমিও সেই রকম শুনেছিলাম এবং শুনেছি—কি সে ব্যবস্থা, সত্যিই কার্যকরী হবে কিনা বলা মুশ্কিল। আর যদি হয় তবু দেখবে সত্যিকারের যারা অপরাধী তাদের বিচার হবে না। যারা গদিতে বসে কোটি কোটি মূল্যের খাদ্যসম্পদের দেশের বাইরে পাচার করছে বা পাচারে সহায়তা করছে তারা চিরকাল তেমনি করে যাবে। আর দুষ্কৃতি হিসেবে যাদের শাস্তি দেওয়া হবে তারা হলো ছা-পোষা চোরাকারবারী।

ছা পোষা চোরাকারবারী কেমন আমি ঠিক বুঝতে পারছি না।

যারা পাঁচ দশ-টাকার মাল নিয়ে সীমান্তের ওপারে পাচার করতে গিয়ে ধরা পড়ে যায় তারাই হলো ছা-পোষা চোরা কারবারী। সরকারপক্ষের লোক এইসব ছা-পোষা চোরাকারবারীদের ধ্বংস করে পত্রিকায় ফলাও করে সংবাদ প্রকাশ করেন চোরাচালানী ধ্বংস করা হয়েছে এবং তাদের বিরুদ্ধে কঠোর শাস্তির ব্যবস্থা করা হয়েছে। এইতো হলো সরকারের দুষ্কৃতি দমনে বাহাদুরি.....

তাহলে এবারও কি সরকার এমনিভাবে দেশ ও দশকে মিথ্যার বাণী শুনিয়ে শান্ত রাখবেন?

সরকার তুমি কাকে বলছো দিপালী?

ঐ তো যারা ঘোষণা করেছেন এবার থেকে অন্যায় অনাচার যারা করবে তাদের বিরুদ্ধে চরম শাস্তির ব্যবস্থা করা হবে।

বনহর হেসে উঠলো, তারপর বললো—এ ব্যবস্থা যেদিন সত্যিকারের কাজে আসবে সেদিন তুমি এ প্রশ্ন আমাকে করো দিপালী। আজ আর নয়.....বনহর সম্মুখে একটি লিফট দেখিয়ে বললো—তুমি ঐ লিফটে উঠে দাঁড়াও, তোমার কক্ষে পৌছে দেবে।

আর তুমি! রাজকুমার, তুমি যাবে না আমার সঙ্গে?

আমার কাজ আছে।

আবার তবে কবে দেখা হবে?

যখন সময় পাবো।

রাজকুমার অনেক কথা আছে তোমার সঙ্গে।

বেশ তো, যেদিন আসবো সেদিন শুনবো তোমার সব কথা। যাও দিপালী।

দিপালীর হাত ধরে বনহর ওকে তুলে দেয় লিফটে। একটা সুইচে চাপ দিতেই লিফটখানা সাঁ সাঁ করে উঠে যায় উপরে।

বনহর ফিরে দাঁড়ায়।

ফিরে তাকিয়েই দেখতে পায় তার পিছনে দাঁড়িয়ে আছে মোহসিন, হাতে তার সূতীক্ষ্ম ধার ছোরা।

বনহর ফিরে তাকাতেই মোহসিন ছোরাখানা বনহরের হাতে গুঁজে দিয়ে বলে উঠে—সর্দার, আমি বড় অপরাধী, আমাকে আপনি এই ছোরা দ্বারা হত্যা করুন। আমাকে আপনি হত্যা করুন সর্দার.....

বনহরের দু'চোখে বিস্ময় ফুটে উঠে, অস্ফুট কণ্ঠে বলে—তুমি একি বলছো মোহসিন?

সর্দার, আমি বড় অপরাধী। আমার অপরাধের ক্ষমা নেই। সর্দার, আমি আপনাকে হত্যা করবার অভিপ্রায়ে এসেছিলাম.....

মোহসিন!

হাঁ সর্দার। আপনি আমাকে হত্যা করুন। সর্দার, দিপালীর প্রতি আমার দুর্বলতা আছে এবং সেই কারণে তাকে আমি অনুসরণ করেছিলাম। সর্দার মনে করেছিলাম, আপনার সঙ্গে তার.....না না, ও কথা আমি উচ্চারণ করতে পারবো না। আমাকে আপনি হত্যা করুন, নাহলে আমার পাপের শাস্তি হবে না। সর্দার আপনি আমাকে হত্যা করুন.....

ঠিক ঐ মুহূর্তে সেখানে উপস্থিত হলো রহমান। কুর্ণিশ জানালো সে সর্দারকে, তারপর বললো—কি হয়েছে সর্দার বলুন?

বনহর রহমানকে ঐ মুহূর্তে দেখে অবাক হয়ে গেছে। সেই দণ্ডে বনহর নিজেকে সামলে নিয়ে বলে—মোহসিন আমাকে রক্ষা করেছে রহমান। এই ছোরাখানা আমার অজ্ঞাতে কেউ আমাকে হত্যার কারণে নিক্ষেপ করেছিলো।

সর্দার! অস্ফুট শব্দ করে উঠে রহমান।

বনহর বলে—মোহসিন ঐ সময় না এসে পড়লে হয়তো মৃত্যু ঘট। অস্বাভাবিক ছিলো না। এই নাও মোহসিন, ছোরাখানা তুমিই রেখে দাও।

মোহসিন নত মস্তকে ছোরাখানা হাতে নিয়ে ধীরে ধীরে প্রস্থান করলো।
বনহর আর রহমৎ চলে গেলো বিপরীত পথে।



আস্তানার বাইরে আধো অন্ধকার অপেক্ষা করছিলো তাজ। বনহর
বেরিয়ে আসতেই তাজ শব্দ করে উঠলো চিহি চিহি।

বনহর ওর পাশে এসে দাঁড়ালো, পিঠ চাপড়ে দিয়ে বললো—দাঁড়া
যাচ্ছি।

তাজ পিছনের পায়ে ভর দিয়ে সম্মুখের পা দু'খানা উঁচু করে ধরলো,
তারপর চেপে বসলো তাজের পিঠে।

তাজের জমকালো দেহের সঙ্গে বনহরের জমকালো পোশাক যেন মিশে
গেলো একেবারে। লাগাম ধরতেই ছুটে শুরু করলো।

নিকষ অন্ধকারে তাজের খুরের প্রতিধ্বনি জাগলো।

অতি পরিচিত সেই শব্দ।

কান্দাইয়ের মানুষের কানে এ শব্দ নতুন নয়। এ শব্দ শোনামাত্র
অনেকেই শিউরে উঠলো, আবার অনেকের মনে খুশির উচ্ছ্বাস বয়ে গেলো।

পুলিশ মহলের সবাই সজাগ হয়ে উঠলো।

মিঃ জাফরীর মুহম্মুঁ ফোন আসতে লাগলো। দস্যু বনহরের আগমন
সংবাদ কান্দাই শহরে প্রতিটি পুলিশ মহলকে সজাগ করে তুললো।

মনিরা শুয়েছিলো। হঠাৎ তার শিয়রে ফোন বেজে উঠলো। রিসিভার
হাতে তুলে নিলো মনিরা। ওপাশ থেকে ভেসে এলো নারীকণ্ঠ.....আমি
রীনা বলছি, মনিরা এতদিন নিশ্চিন্ত ছিলাম, জানতে পারলাম দস্যু বনহর
কান্দাই শহরে এসেছে.....

মনিরা অর্ধশায়িত অবস্থায় রিসিভার তুলে নিয়েছিলো হাতে, এবার সে
সজাগ হয়ে সোজা হয়ে বসলো, বললো—হ্যালো, দস্যু বনহর কান্দাই শহরে
এসেছে.....রীনা...কে বললো তোকে এ কথা?

জবাব এলো রীনা বলছে.....আমার স্বপ্তর পুলিশ অফিসার.....তঁার কাছেই পুলিশ অফিস থেকে ফোনে সংবাদ এসেছে.....ভাই মনিরা.....আমি বড় দুশ্চিন্তায় আছি।

হেসে বললো মনিরা.....দুশ্চিন্তার কারণ আমি বুঝতে পারছি না.....দস্যু বনহর কান্দাই শহরে এসেছে তাতে তোর ক্ষতি কি বলতো.....

.....তুই বুঝবি না মনিরা, আমার স্বপ্তর দস্যু বনহরকে খেপ্তার করবেন বলে মিঃ জাফরীর সঙ্গে যোগ দিয়ে উঠে পড়ে লেগে গেছেন। আমি জানি দস্যু বনহরকে খেপ্তার করা যত সহজ বলে তাঁরা মনে করেন তত সহজ নয়.....

.....কিন্তু এতে তোর এত ভীতি কেন শুনি?...

.....দস্যু বনহর সম্বন্ধে যদি ভালভাবে জানতিস মনিরা তবে এ কথা বলতে পারতিস না.....

.....অবশ্য সে কথা সত্য দস্যু বনহর সম্বন্ধে আমি বিশেষ কিছু জানি না...

.....সেজন্যই বলছি মনিরা ভীতি কেন.....দস্যু বনহরের আগমন সংবাদে সমস্ত কান্দাই শহরে ত্রাসের সঞ্চার হয়েছে.....পুলিশ মহলে মহা কলঙ্ক পড়ে গেছে—

.....কিন্তু আমি কিছু জানি না.....যাক, এত ভয় পাবার কিছুতেই.....দস্যু বনহর সে তো মানুষ, কাজেই...আচ্ছা রাখি, খোদা থাকেজ!

রিসিভার রেখে ফিরে তাকাতেই দেখতে পায় পিছনে দাঁড়িয়ে নূর। নূর বলে উঠে—আমি, দস্যু বনহর মানুষ, কাজেই কোনো ভয় নেই বলতে থাকলো না?

হাঁ বাবা, দস্যু হলেও সে তো মানুষ—বাঘ-ভাল্লুক বা সিংহ নয় যে তাকে এত ভয় করে চলতে হবে।

আমি, তুমি আজও দস্যু বনহর সম্বন্ধে ভালভাবে জানো না তাই অমন কথা বলছো। দস্যু বনহর সিংহের চেয়েও ভয়ঙ্কর, এ কথা তুমি কোনো কখনো ভুলে যেও না। সমস্ত কান্দাই শহরে দস্যু বনহর এক ত্রাসের রাজ্য সৃষ্টি

করেছে। দস্যু বনছুর নাম শুনলে মানুষ শিউরে উঠে, মানুষের চোখের ঘুম হারিয়ে যায়।

মনিরা পুত্রের কথাগুলো শুনে যায় শুধু, কোনো কথা সে বলে না।

নূর বলে—আমি, দরজা ভালভাবে বন্ধ করে শোবে, বলা যায় না শয়তানটার আবির্ভাব কখন কোথায় ঘটবে কে জানে।

মনিরা বললো—নূর, তোকে ভাবতে হবে না বাপু, তুই শুবি যা।

আচ্ছা আমি, আমি যাচ্ছি। নূর চলে যায়।

মনিরা দরজা বন্ধ করে শুয়ে পড়ে বিছানায়। অনাবিল এক আনন্দে ভরে উঠেছে মনিরার মন। তার স্বামী কতদিন কান্দাই ছিলো না, ফিরে এসেছে সে কান্দাই শহরে। নিশ্চয়ই সে আসবে। তার মন বলছে নিশ্চয়ই সে আসবে।

কতক্ষণ ভাবে মনিরা, তারপর একসময় ঘুমিয়ে পড়ে। কখন যে ভোর হয়ে গেছে খেয়াল নেই। ভোরে জেগে উঠে মনটা তার বড় ব্যথাকাতর হয়ে উঠে। কই, সমস্ত রাত কেটে গেছে তবু এলো না তো সে। মনিরার মনে দৃষ্টিভ্রমের ছায়া পড়ে।

এমন সময় নূর দরজায় ধাক্কা দিয়ে ডাকে—আমি আমি উঠো, অনেক বেলা হয়েছে।

মনিরা বুঝতে পারে, তাই তো এতক্ষণও সে শয্যা ত্যাগ করেনি বা দরজা খোলেনি।

আজকাল মনিরা মাতের দরজা বন্ধ করেই ঘুমায়।

ওপাশের ঘরে শোয় মরিয়ম বেগম। কিছুদিন পূর্বেও নূর দাদীর ঘরেই ঘুমাতো, এখন সে মাতের ঘরের পাশেই যে ঘর সেই ঘরে ঘুমায়। বয়স তার বেশি না হলেও পড়া শোনায়ে সে অনেকদূর অগ্রসর হয়েছে। কুলে শিক্ষক মহল তাকে ভালবাসেন এবং তার উপর ভরসা রাখেন।

নূর বোঝে তাকে লেখাপড়া শিখে মানুষ হতে হবে। তাই সে মনোযোগ দিয়ে পড়াশোনা করে। সরকার সাহেব ব্যবস্থা করেছেন আগামীতে তাকে বিদেশ পাঠাবেন।

নূরকে বিদেশ পাঠানো ব্যাপারে মরিয়ম বেগম বা মনিরার কোণে অমত নেই বরং তারা এ ব্যাপারে উৎসাহী।

কিন্তু স্বামী না এলে কিছুতেই মনিরা সন্তানকে বিদেশ পাঠাতে পারছে না। নূরকে বিদেশ পাঠানো ব্যাপারে সব ব্যবস্থা হয়ে গেছে, এখন শুধু সঠিক দিন-তারিখ ধার্য করা।

দরজা খুলে বেরিয়ে আসতেই নূর হাস্যোদ্ভীষ্ট, মুখে বলে উঠলো—
আমি এই দেখো আব্বা চিঠি দিয়েছেন। আব্বার ঠিকানাও লিখা আছে এতে। তিনি সরকার সাহেবকে নিয়ে যেতে বলছেন।

দেখি দেখি.....হাত বাড়িয়ে মনিরা নূরের হাত থেকে চিঠিখানা নিয়ে মেলে ধরলো চোখের সামনে। হাতের লিখা দেখেই মনিরা চিনতে পারলো তার স্বামীর হাতের লিখা চিঠি। চিঠিখানা লিখেছে সে সরকার সাহেবকে। মনিরা পড়তে লাগলো—

“সরকার সাহেব, ছালাম রইলো।
হীরাঝিলের দক্ষিণ ধারে ইরামতি
ঘাটে আমার বজরা অপেক্ষা করবে,
আপনি নূর ও মনিরাকে নিয়ে চলে
আসবেন। আমি বজরায়
আপনাদের প্রতীক্ষায় থাকবো।

—মনির

মনিরা চিঠি পড়া শেষ করে বললো—এ চিঠি তোকে কে দিয়েছে নূর?
সরকার সাহেব দিয়েছেন। তিনি চিঠিখানা দিয়ে বললেন—মাকে গিয়ে
বলো তৈরি হতে। আজ দুপুরের পর পরই আমরা রওয়ানা দেবো। আমি,
তুমি শীঘ্র তৈরি হয়ে নাও, কত দিন হলো আব্বাকে দেখি না।

কিন্তু.....

কোনো কিন্তু নয় আমি, আব্বা চিঠি লিখেছেন যেতেই হবে। আমি
যাই দাদী আম্মাকে বলিগে।

নূর চলে যায়।

মনিরার ললাটে ফুটে উঠে গভীর চিন্তারেখা। হঠাৎ সে কেন এভাবে
চিঠি লিখলো হীরাঝিলের দক্ষিণে ইরামতি ঘাটে তার বজরা থাকবে। সব
যেন কেমন ঘোলাটে লাগছে তার কাছে।

মনিরা চিঠিখানা বারবার পড়ছে। না, কোনো সন্দেহের কারণ নেই। এ লেখা তার অতি পরিচিত। তার স্বামীর হাতের লিখা চিঠি। মনিরা এগিয়ে গেলো শাশুড়ির কক্ষ অভিমুখে।

মরিয়ম বেগম নামাজান্তে কোরআন তেলাওয়াৎ করছিলেন। মনিরাকে কক্ষে প্রবেশ করতে দেখে তিনি বুঝতে পারলেন নিশ্চয়ই কোনো কারণে সে এ সময় তার কক্ষে এসেছে। তিনি কোরআন তেলাওয়াৎ শেষ করে মোনাজাত করলেন তারপর কোরআন শরীফে বারকয়েক চুমু খেয়ে তুলে রাখলেন।

মনিরা তখনও দাঁড়িয়ে আছে।

শ্বাশুড়ীকে কোরআন শরীফ তুলে রেখে ফিরে তাকাতে দেখে বললো—
মামীমা, আপনার ছেলে চিঠি দিয়েছে।

কে মনির চিঠি দিয়েছে?

হাঁ মাসীমা, এই দেখো! মনিরা চিঠিখানা মরিয়ম বেগমের হাতে দেয়।
মরিয়ম বেগম চিঠি পড়া শেষ করে বললেন—হয়তো পুলিশ বাড়ির উপর কড়া নজর রেখেছে তাই সে এই চিঠি দিয়ে যেতে বলেছে তোমাদের।

কিন্তু হঠাৎ এভাবে যাওয়া কি ঠিক হবে মামীমা?

একটু হেসে বললেন মরিয়ম বেগম—পাগল মেয়ে! স্বামী চিঠি দিয়েছে যাবে না তো কি। বাছা আমার কতদিন আসতে পারেনি.....একটু থেমে বললেন তিনি—বিলম্ব না করে তৈরি হয়ে নাও এবং যত শীঘ্র পারো সরকার সাহেব আর নূরকে নিয়ে চলে যাও। ড্রাইভারকে গাড়ি বের করতে বলে দাও বৌমা।

মনিরা কোনো কথা না বলে চিঠিখানা ভাঁজ করতে করতে বেরিয়ে আসে। সম্মুখেই সরকার সাহেবকে দেখে থমকে দাঁড়িয়ে পড়ে সে।

সরকার সাহেব বললেন—কি হলো বৌমা, যাবে তো?

মনিরা বললো—সরকার চাচা, আপনি কি মনে করেন?

মনির যেখানে লিখেছে সেখানে আমি অমত করতে পারি না।

এমন সময় এসে নূর দাঁড়ায়। চোখেমুখে তার আনন্দোচ্ছ্বাস, বলে সে—সরকার দাদা, আমি যাবোই, আবু আমাদের জন্য অপেক্ষা করবে আর..... না না, কারও মানা শুনবো না। আমি তুমি যাও চটপট তৈরি হয়ে নাওগে, আমি ড্রাইভারকে গাড়ি বের করতে বলছি।

নূর ছুটে চলে যায়।

সরকার সাহেব বললেন—যাও বৌমা, যাবার জন্য তৈরি হয়ে নাও।

সরকার সাহেবের কথায় মনিরা কোন জবাব না দিয়ে চলে যায়। নিজের ঘরে প্রবেশ করে আলমারী খুলে বের করে একটা ফটো, যে ফটোখানাকে সে অতি যত্ন সহকারে তুলে রেখেছিলো তার শাড়ির ভাঁজের অন্তরালে।

ফটোখানা তার স্বামীর তাতে কোনো সন্দেহ নেই। মনিরা ফটোখানা তুলে ধরলো চোখের সামনে, তারপর চাপাকণ্ঠে বললো—ওগো, সত্যি তুমি ইরামতির ঘাটে আমাদের জন্য অপেক্ষা করবে? এ যে আমার পরম সৌভাগ্য। কতদিন তোমায় দেখিনি.....

নূর জামাকাপড় পরে এসে দাঁড়ায়—কই, আমি তোমার হলো?

এইতো সব গুছিয়ে নিচ্ছি।

নূর চলে যায় সরকার সাহেবের সন্ধানে। ওর মনে আনন্দের উচ্ছাস, কতদিন পর আব্বাকে দেখতে পাবে সে।

কিছুক্ষণের মধ্যেই সরকার সাহেব নূর এবং মনিরাসহ গাড়িতে উঠে বসেন। গাড়ি বেরিয়ে এলো চৌধুরীবাড়ির ফটক পেরিয়ে।

জনমুখর রাজপথ বেরে গাড়ি দ্রুত এগুতে থাকে। মনিরার মনে খুশির উচ্ছাস, কিন্তু মুখে সে কোনো কিছু বলছে না—নীরবে তাকিয়ে আছে বাইরের দিকে। নূর বারবার সরকার সাহেবকে প্রশ্ন করছে, আর কতদূর সরকার দাদা, বলো আর কতদূর সেই হীরাঝিল— কোথায় সেই ইরামতি ঘাট?

সরকার সাহেব হেসে বললেন—এইতো প্রায় এসে গেছি দাদু, আর বেশিক্ষণ গাড়িতে থাকতে হবে না।

নূর বললো—সকালে গাড়িতে চেপেছি আর এখন সন্ধ্যা হয় তবু হীরাঝিল পেলাম না। সরকার দাদু, আব্বাকে বড় দেখতে ইচ্ছা করছে।

সত্যি দাদু, আমারও বড় দেখতে ইচ্ছা করছে, কতদিন ওকে দেখি না। একটা দীর্ঘশ্বাস ত্যাগ করেন সরকার সাহেব।

মনিরা চুপচাপ বসে বসে শুনছিলো, তার দৃষ্টি ছিলো গাড়ির বাইরে। মনের পর্দায় ভাসছিলো কত স্মৃতি, কত কথা। নূর যখন মাত্র ক'মাসের তখন সন্ন্যাসীরা নূরকে চুরি করে নিয়ে যায়। নূরের জন্য মনিরা পাগলিনীপ্রায় হয়ে উঠেছিলো। দিনরাত শুধু নূরকে নিয়ে ভাবতো মনিরা। স্ত্রীকে বিষণ্ণমনা দেখে বনহর খুব ব্যথা পেতো, নূরের সন্ধানে সে নিজেও আহার নিদ্রা ত্যাগ করে ফেলেছিলো। এমন দিনে মনিরা জানতে পারে, হীরাঝিলে তার নূরকে কাপালিক সন্ন্যাসীরা আটক করে রেখেছে। কথাটা জানার সঙ্গে সঙ্গে মনিরা স্বামীকে ধরে বসেছিলো, হীরাঝিলে তার পুত্র আছে। নূরকে যেমন করে হোক এনে দিতেই হবে। বনহর মনিরার জেদে নিজেকে স্থির রাখতে পারেনি। মনিরা সহ গিয়েছিলো হীরাঝিলে কিন্তু মনিরা তখন জানতো না এটা এক ষড়যন্ত্র ছাড়া কিছু নয়। নূরকে হীরাঝিলে পাওয়া যাবে বলে বনহরকে গ্রেপ্তার করার এক বিরাট ব্যবস্থা করা হয়েছিলো সেখানে। তারপর হীরাঝিলে গিয়েছিলো মনিরা স্বামী সহ কিন্তু নূরকে সেখানে পায়নি। ডিটেকটিভ পুলিশ মহল কৌশলে বনহরকে বন্দী করেছিলো। কথাটা আজ নতুন করে মনে হতেই শিউরে উঠলো মনিরা, আজ আবার তারা সেই হীরাঝিলে চলেছে। জানে না কি পরিণতি আছে তাদের ভাগ্যে। সেই হীরাঝিল যেখানে সে একবার হারিয়েছিলো তার জীবনের পরম সম্পদ স্বামীকে.....

হঠাৎ নূরের কণ্ঠস্বরে সস্থির ফিরে পায় মনিরা। নূর বলছে—দাদু, ঐ বুঝি হীরাঝিল দেখা যাচ্ছে?

সরকার সাহেব বললেন—হাঁ দাদু, ঐ হীরাঝিল দেখা যাচ্ছে। আর বেশি দেরী হবে না, আমরা পৌছে যাবো হীরাঝিলে।

নূরের চোখেমুখে ফুটে উঠেছে আনন্দোচ্ছ্বাস। সে খুশিতে যেন ডগমগ।

হীরাঝিলে পৌছতে আর বেশি বিলম্ব হলো না। গাড়ি এসে থামলো হীরাঝিলের অদূরে।

সরকার সাহেব প্রথমে নামলেন। তিনি গাড়ির দরজা খুলে ধরে বললেন—এসো বৌমা, নেমে এসো।

মনিরা এবং নূর নৈম পড়লো।

হীরাঝিল।

সেই হীরাঝিল, যে হীরাঝিলে মনিরা একদিন আকুল স্বরে কেঁদে কেঁদে বুক ভাসিয়ে দিয়েছিলো।

মনিরা নূরের হাত ধরে এগুতে লাগলো।

সরকার সাহেব চললেন আগে আগে।

হীরাঝিলের সোপান অতিক্রম করে ওপাশে প্রশস্ত বারান্দা। সবাই মিলে এগিয়ে যায় হীরাঝিলের দক্ষিণে ইরামতি ঘাটের দিকে।

প্রায় ঘণ্টাকাল চলার পর তারা ইরামতি ঘাটে পৌঁছে যায়। সত্যিই অদূরে বজরা অপেক্ষা করছে। আনন্দে উচ্ছল হয়ে উঠে মনিরার হৃদয়।

নূরের খুশি যেন ধরছে না।

সরকার সাহেবকেও আনন্দোদ্দীপ্ত মনে হচ্ছে।

বজরার নিকটবর্তী হতেই মনিরা, নূর, এবং সরকার সাহেব দেখলেন বজরার রেলিংয়ে ভর দিয়ে দাঁড়িয়ে আছে তাদের আকাঙ্ক্ষিত জন। দূর থেকে নজরে পড়তেই নেমে এলো বনহর বজরা সিঁড়ি বেয়ে নিচে।

ততক্ষণে মনিরা, নূর ও সরকার সাহেব পৌঁছে গেছে বজরার কাছে।

নূর অক্ষুট কণ্ঠে আনন্দধ্বনি করে উঠে—আব্বা!

বনহর নূরকে বুকে জড়িয়ে ধরে বলে উঠে—কেমন আছো নূর?

আব্বা, তুমি কতদিন যাওনা আমাদের কি ভাল লাগে। এবার তোমাকে যেতেই হবে। দাদী বলেছেন তোমাকে নিয়ে যেতে।

আচ্ছা যাবো।

তারপর তাকায় বনহর সরকার সাহেবের দিকে, বলে—কেমন আছেন সরকার চাচা?

ভাল আছি বাবা, তুমি কেমন আছো?

দেখতেই পাচ্ছেন। কথার ফাঁকে তাকায় বনহর মনিরার দিকে—ভাল আছো মনিরা?

আছি। ছোট্ট জবাব দেয় মনিরা।

বনহর সবাইকে সঙ্গে করে উঠে যায় বজরায়।

সন্ধ্যার ঝাপসা অন্ধকার তখন ঘন হয়ে এসেছে। ওদিকে পূর্বাকাশ উজ্জ্বল করে উঁকি দেয় পূর্ণিমার চাঁদ। কিছুক্ষণের মধ্যেই সন্ধ্যার অন্ধকার দূরীভূত হয়ে পৃথিবীর বুক ঝলমল করে উঠে।

বজরার অভ্যন্তরে এসে বসে ওরা ক'জনা। বিরাট প্রশস্ত কক্ষ। মেঝেতে মূল্যবান কার্পেট বিছানো। দেয়ালে মূল্যবান তৈলচিত্র টাঙ্গানো আছে। ছাদের সঙ্গে বেলোয়াড়ী ঝাড় বুলছে। ঝাড়ের সঙ্গে দুলছে একরাশ মোমবাতি।

মোমবাতির আলোতে বজরার কক্ষ উজ্জ্বল হয়ে উঠেছে। কক্ষের মেঝেতে কয়েকটি সোফা গোলাকারভাবে সাজানো। সেই সোফায় গা এলিয়ে দিলো সবাই।

নূর পিতার কোলের কাছ ঘেঁষে বসেছে। সে স্থির দৃষ্টি মেলে তাকিয়ে দেখছে তার আকবাকে। কতদিন হলো তার আকবাকে সে দেখেনি।

বললো বনহর—সরকার চাচা, আমি জানি আপনারা না এসে পারবেন না। নূরকে কতদিন দেখিনি! নূরের বিদেশ যাওয়া ব্যাপারে আপনি যে চিঠি আমাকে পাঠিয়েছিলেন, পেয়েছি। অনেক কথা আছে আপনার সঙ্গে।

বেশ বলো, তোমার কথা শুনতেই এসেছি। বললেন সরকার সাহেব।

বনহর তখন কথা না বলে পরে বলবে বলে জানালো।

আকাশে চাঁদ হাসছে।

বনহর নূর সহ বজরার ছাদে এসে বসলো।

সরকার সাহেব আর মনিরা বজরার মধ্যে বিশ্রামের আয়োজন করছেন।

নূর বললো—আকবা, তুমি কতদিন হলো বাড়ি যাওনা, কেন বলো তো?

তোমার বুঝি বড্ড খারাপ লাগে?

হাঁ আকবা, আমার বড্ড খারাপ লাগে। তুমি কোথায় কি চাকরি করো কোনোদিন বললেনা?

বলবো! এবার বলবো বলেই তোমাদের ডেকেছি নূর।

সত্যি বলবে?

হাঁ।

কিন্তু এতদিন কেন বলোনি? আক্কা, আশ্বিকেও তুমি বলোনা। কতদিন আশ্বিকে আমি জিজ্ঞাসা করেছি তিনি বলেন আমি জানি না। আক্কা, আজ তোমাকে বলতেই হবে তুমি কোথায় কি কাজ করো।

বেশ বলবো।

শুধু বলবো নয়, আমরা যাবো সেখানে, কোথায় তুমি কাজ করো দেখবো।

বনহর বিব্রত বোধ করে, কারণ জানে সে নূর বড় জেদী ছেলে হয়েছে। বয়স তার তত পাকা নয় বুদ্ধি তার বড় পাকা। কথাবার্তায় সে বয়সী ব্যক্তিদের হার মানায়। বনহর নূরের কাছে অপরাধীর মত বললো—আচ্ছ।

আক্কা!

বলো?

এ বজরাখানা বুঝি তোমাদের মালিকের?

হাঁ।

খুব বুঝি ধনবান তোমাদের মালিক?

হাঁ।

আক্কা, আমাদের তো কোনো অভাব নেই। প্রচুর অর্থ ঐশ্বর্য সব আছে। সরকার দাদু বলেন যা দেখছি আরও বেশি আছে আমাদের দেশের বাড়িতে। দাদু নাকি মস্তবড় জমিদার ছিলেন?

হাঁ।

শুধু হাঁ আর হাঁ বলছো। ঠিক করে বলোনা আক্কা এত অর্থ, এত ঐশ্বর্য থাকতে তুমি কেন চাকরি করো?

এবার প্রশ্নটা বড় কঠিন লাগলো বনহরের কাছে। কি জবাব দেবে সে পুত্রের কথায় ভেবে পায় না, আমতা-আমতা করে বলে—ও কথা তোমার আশ্বির কাছে জিজ্ঞাসা করো।

কেন, তুমি বলোনা আব্বু?

শোনো নূর, হাজার অর্থ এবং ঐশ্বর্য থাক তবু মানুষ কোনো দিন বসে বসে কাটাতে পারে না, তাই আমি চাকরি করি।

কি চাকরি করো বলবে না?

বলবো।

না, এক্ষুণি তোমায় বলতে হবে।

মহামুন্সিলে পড়লো বনহর, একটু ভেবে নিয়ে বললো—যারা খেতে পায় না, তাদের সন্ধান করে খাবার ব্যবস্থা আমাকে করতে হয়।

যারা দুঃস্থ জনগণ তাদের খাবার ব্যবস্থা তোমাকে করতে হয় বুঝি?

হাঁ বাবা আমাকে সেই কাজ করতে হয়।

কত মাইনে দেয় তোমাকে?

যা আমার প্রয়োজন তাই পাই আমি। চলো নূর, ভিতরে যাই তোমার আশু কি করছেন দেখিগে।

আবু জানো আশু তোমার জন্য কত ভাবেন। তুমি যাওনা বলে আশুর মুখে কোনোদিন হাসিখুশি দেখিনা। আবু তোমার মালিককে বলো তিনি যেন মাসে একটিবার তোমায় ছুটি দেন।

আচ্ছা বলবো।

চলো আবু যাই।

নূর আর বনহর বজরার ছাদ থেকে নেমে আসে নিচে।

সরকার সাহেব আর মনিরা আলাপ-আলোচনা করছিলো। বনহর আর নূর আসতেই সরকার বলেন—নূর, আবুর সঙ্গে খুব গল্প করলে বুঝি?

হাঁ দাদু।

বনহর বললো—এবার তোমরা যাও। বড্ড ক্ষুধা পেয়েছে, তাই না। বনহর বেরিয়ে গেলো, একটু পরে ফিরে এসে বললো—চলো নূর, তোমরা খাবে চলো। চলুন সরকার চাচা, চলো মনিরা।

বনহর সবাইকে সঙ্গে করে বেরিয়ে গেলো কক্ষের বাইরে। ওপাশে বজরার আরও একটি কক্ষ আছে, সেই কক্ষটিতে খাবার জিনিসপত্র থরে থরে সাজানো আছে।

সুন্দর মসৃণ টেবিল।

টেবিলের দু'পাশ দিয়ে সাজানো কয়েকখানা চেয়ার। বনহর বললো—বসো নূর। সরকার চাচা, আপনারা বসুন।

সরকার সাহেব এবং নূর বসে পড়লো।

মনিরা আর বনহর বসলো অপর পাশে।

নূরের দু'চোখে বিস্ময় ঝরে পড়ে, এত সুন্দর বজরা সে দেখেনি কোনোদিন। এত সুন্দর সাজসজ্জাও নূর দেখেনি। খাবার টেবিলে নানাবিধ খাবার থরে থরে সাজানো। যেন কোনো স্বপ্নরাজ্যে এসেছে সে। তার আব্বুকে দেখে মনে হচ্ছে কোনো স্বপ্নরাজ্যের রাজকুমার যেন সে।

নূর খাওয়া ভুলে পিতার মুখের দিকে তাকিয়ে ছিলো নির্বাক নয়নে।

খেতে খেতে হঠাৎ বনহরের দৃষ্টি চলে যায় নূরের মুখের দিকে। মৃদু হেসে বলে বনহর—নূর, তুমি খাচ্ছো না আব্বু?

নূরের সম্বিৎ ফিরে আসে, সে এবার লজ্জা পেয়ে যায় খুব করে, তাড়াতাড়ি খেতে শুরু করে দেয়।

মনিরা নিজে যেন একেবারের বোবা বনে গেছে, সে শুধু চুপচাপ পুত্রের সঙ্গে পিতার অভিনয় দেখে যাচ্ছে একটি কথাও সে বলছে না।

সরকার সাহেব বেশ ক্ষুধাতুর হয়ে পড়েছিলেন তিনি খেতে শুরু করে দিয়েছেন।

বনহর তাকালো মনিরার দিকে, ওর সঙ্গে দৃষ্টি বিনিময় হতেই উভয়ে মৃদু হাসলো। বনহরের চোখেমুখে খেলে গেলো একটা দুষ্টামির আভাস। মনিরা দৃষ্টি নত করে নিলো।

খাবার টেবিলে ছিলো স্থূপাকার ফলমূল।

বনহর অন্যান্য খাবার রেখে শুধু ফলমূল খাচ্ছিলো। সরকার সাহেব এবং মনিরা জানে, ফল ওর প্রিয় খাদ্য, তাই ওর খাবার টেবিলে ফল থাকবেই।

নূর বললো—আব্বু, তুমি শুধু ফল খাচ্ছো?

পুত্রের কথায় চমকে উঠলো বনহর, সে নানাভাবে নিজের আসল রূপ পুত্রের কাছে গোপন রেখে সভ্য নাগরিক রূপে নিজেকে গুছিয়ে নিচ্ছিলো। ফল ভক্ষণ বনহরের নেশা। শিশুকাল থেকে সে জঙ্গলে মানুষ, জঙ্গলের হিংস্র পশু তার ছিলো খেলার সাথী। জঙ্গলের ফল ছিলো প্রিয় খাদ্য। বনহর সব

কিছু সামলে নিতে পেরেছে কিন্তু ফল ভক্ষণ করা সে কমাতে পারেনি। টেবিলে নানারকম খাদ্যসম্ভার সাজানো থাকলেও বনহর ফলটাই তুলে নিতো আগে। ফল পেলে সে ভুলে যেতো অন্যান্য খাবারের কথা।

বনহর অন্যান্য দিনের মত আজও ঘোঁড়াসে ফল ভক্ষণ করছিলো। নূরের প্রশ্নে সে তাড়াতাড়ি নিজকে সামলে নিয়ে খাবারের থালা টেনে নিলো।

মনিরা বললো—ফল পেলে তুমি সব ভুলে যাও।

বনহর হেসে—খেতে শুরু করলো।

খাওয়া শেষ হলে সরকার সাহেব মনিরা ও নূর সহ পুনরায় সেই বড় কক্ষটায় এসে বসলো। এবার নূরকে বিদেশ পাঠানো ব্যাপারে নানারকম আলাপ আলোচনা চললো।

যদিও নূরের বয়স বেশি নয় তবু তাকে বিদেশে রেখে লেখাপড়া শেখানোর ইচ্ছা মনিরার অনেক দিনের, তাই সরকার সাহেবও এ ব্যাপারে আগ্রহশীল ছিলেন।

বনহর নূরকে আদর করে জিজ্ঞাসা করলো তার কি ইচ্ছা।

নূর লেখা পড়ায় মনোযোগী সেই শিশুকাল থেকেই। এখন সে কিশোর তার ইচ্ছা বিদেশে যায় এবং সেখানে ভালভাবে পড়াশোনাদ করে।

বললেকা নূর—আব্বু, তুমি যদি বলো তাহলে আমি নিশ্চয়ই যাবো। আমি এবং সরকার দাদুর ইচ্ছা পূর্ণ করবো।

বনহর নূরের পিঠ চাপড়ে বলে—সাবাস। তারপর সরকার সাহেবকে লক্ষ্য করে বলে—আপনি আর ঝিলম্ব না করে নূরকে বিদেশ পাঠানোর ব্যবস্থা করুন সরকার চাচা।

বেশ, আমি তাই করবো। এতদিন শুধু তোমার মতামতের অপেক্ষায় ছিলাম।

সরকার চাচা, নূরকে বিদেশ পাঠাতে কত টাকা লাগবে জানাবেন আমি দেবো। বিদেশ থাকাকালীন তার কেমন খরচ লাগবে তাও বলবেন, যেন নূরের সেখানে কোনো অসুবিধা না হয়।

আচ্ছা, সব জানাবো।

মনিরার সঙ্গে বনহরের দৃষ্টি বিনিময় হলো, বনহর ওকে কাছে পাবার জন্য ব্যাকুল হয়ে উঠেছে ভিতরে ভিতরে বুঝতে পারে মনিরা, তাই সে মৃদু মৃদু হাসছিলো।

হয়তো সরকার সাহেবও বুঝতে পারেন তার ছোট সাহেব এখন নির্জনতা কামনা করছে। বললেন তিনি—নূর, চলো আমরা বজরার বাইরে গিয়ে বসি।

চলো দাদু, বাইরে সুন্দর জ্যোৎস্না রাত।

বজরা ভেসে চলেছে।

মাঝি ধীরে ধীরে বৈঠা টানছে। ইরামতি নদীর রূপালী পানিতে জ্যোৎস্নার আলো ঝলমল করছে। যেন চাঁদখানা সাঁতার কেটে কেটে এগিয়ে যাচ্ছে বজরার সঙ্গে।

নূর ও সরকার সাহেব এসে বসলো বজরার ছাদে। আজ নূরের মনে সীমাহীন আনন্দোচ্ছ্বাস—কতদিন পর' সে তার আব্বাকে কাছে পেয়েছে।

সরকার সাহেব আর নূর বেরিয়ে আসতেই বনহর একটি সিগারেট বের করে তাতে আগুন ধরালো। একমুখ ধোয়া ত্যাগ করে বললো—মনিরা!

বলো?

জানো তোমাদের কেন ডেকেছি?

জানি বলেই আমি আসতে চাইনি, শুধু নূরের জেদে পড়ে এসেছি।

সত্যি কি তাই?

হঁ।

বনহর মনিরার হাতখানা মুঠায় চেপে ধরে বলে—সত্যি বলছো মনিরা?

হঁ সত্যি।

বড় নিষ্ঠুর তুমি.....কথাটা শেষ না করেই মনিরার কোলে মাথা রেখে শুয়ে পড়ে বনহর, তারপর বলে—জানি অপরাধ আমি তাই বলে.....

মনিরা বনহরের মুখে হাতচাপা দিয়ে বলে—আমার এক বান্ধবী রাতে টেলিফোন করেছিলো, তোমার আগমনবার্তা কান্দাই শহরে সবার কানে গিয়ে পৌছেছে।

তাইতো নির্জন ইরামতি বেছে নিয়েছি মনিরা। কতদিন তোমার কোলে এমনি করে মাথা রেখে শুতে পারিনি। কতদিন তোমাকে.....বনহর মনিরাকে নিবিড় বন্ধনে আবদ্ধ করে।

মনিরা স্বামীর বুকে মাথা রাখে, ভুলে যায় সে সমস্ত অভিমান।

বজরার পাশ কেটে ছুটে চলা ইরামতির পানির ছলছল শব্দ বড় মধুর লাগে মনিরার কানে। বাইরে থেকে শোনা যায় সরকার সাহেবের গলার আওয়াজ। মাঝে মাঝে নূর কথা বলছে।

মাঝির দাঁড় টানার ঝুপঝাপ শব্দ শোনা যাচ্ছে।

মনিরার মুখখানা তুলে ধরে বনহর, নিষ্পলক চোখে তাকিয়ে থাকে কিছুক্ষণ। চুমোয় চুমোয় রাঙা করে দেয় ওর ওষ্ঠদ্বয়।

মনিরা বলে—ছিঃ সরকার চাচা এসে পড়তে পারেন।

তবু ছাড়বো না তোমাকে।

যদি নূর আসে?

এলোই বা। আরও নিবিড় করে ওকে টেনে নেয় বনহর বুকে।

ছিঃ ছিঃ তুমি বড্ড দুষ্টো।

বলো, আরও বলো।

আঃ ছেড়ে দাও বলছি। ছাড়ো.....

ওরা কেউ আসবে না আমি জানি। মনিরা, সত্যি আমি অপরাধী। কতদিন তোমাদের সংবাদ নিতে পারিনি। মনিরা, মা কেমন আছে বললে না তো?

কই, তুমি তো জিজ্ঞাসা করোনি! সত্যি তুমি হৃদয়হীন, নাহলে মাঝে কথাকেউ ভুলে যায়?

হাঁ, ঠিক বলেছো মনিরা! একটা দীর্ঘশ্বাস ত্যাগ করে বলে বনহর—সর্বপ্রথম মায়ের কথা জিজ্ঞাসা করা আমার উচিত ছিলো। জানি, মা আমার কথা কতবার বলেছেন কিন্তু আমি তার অপদার্থ ছেলে.....বাস্পরুদ্ধ হয়ে আসে বনহরের কণ্ঠস্বর।

মনিরা বুঝতে পারে স্বামীর মনে ভীষণ আঘাত লেগেছে। আপনভোলা তার স্বামী। তাদের পেয়ে আনন্দে আত্মহারা হয়ে ভুলেই গেছে সব কথা।

মনিরা স্বামীর বুকে-গলার-চিবুকে হাত বুলিয়ে বলে—জানি তুমি আমাদের পেয়ে এত বেশি খুশি হয়েছিলো যার জন্য ভুলেই গিয়েছিলো তুমি তোমার সব কথা।

হাঁ মনিরা, কতদিন পর তোমাদের পেয়ে আমি আত্মহারা হয়ে পড়েছিলাম। মা কেমন আছে মনিরা?

ভাল আছেন তবে তোমাকে কতদিন হলো দেখেন না, তাই তিনি সব সময় ভাবেন তোমার কথা।

মা, মাগো আমায় তুমি ক্ষমা করো। মনিরা কত সাধ জাগে বাড়ি যাই। মা, নূর এবং তোমাকে নিয়ে মনের আনন্দ পূর্ণ করি কিন্তু পারি না। কান্দাই পৌছানোর সঙ্গে সঙ্গে পুলিশ মহল সজাগ হয়ে উঠেছে। তারা রাস্তায় রাস্তায় কড়া পাহারা নিযুক্ত করেছে, এমনকি আমার বাড়ির চারপাশে পুলিশ গোয়েন্দা সর্বক্ষণ নজর রেখেছে। তারা আমাকে জীবিত কিংবা মৃত অবস্থায় খেঁজার করতে চায়।

আচ্ছা, একটি কথা আমাকে সত্যি করৈ বলবে?

কি কথা তোমায় মিথ্যা বলছি?

আচ্ছা, বলো তো কান্দাই রিলিফ প্রধানকে তুমি আটক করেছো কিনা?

মুহূর্তে বনহরের মুখমণ্ডল কঠিন হয়ে উঠে। অধর দংশন করে কিন্তু কোনো জবাব সে দেয় না।

মনিরা স্বামীকে হঠাৎ ভয়ঙ্কর গম্ভীর হতে দেখে বিব্রত হলো। সে জানে তার স্বামী যখন ভীষণ রাগ করে তখন সে কথা বলে না।

মনিরাও নিশ্চুপ থেকে যায়।

একটু পরে বলে বনহর—শুধু রিলিফ প্রধান নয়, কান্দাইয়ের আরও বহু মহারথী অচিরে সেই নরপশুর সঙ্গ লাভ করবে। কিন্তু হঠাৎ এ প্রশ্ন কেন বলো তো?

শহরময় একথা রাষ্ট্র হয়ে গেছে দস্যু বনহর কান্দাই রিলিফ প্রধানকে টকাও করেছে। সবাই বিশ্বাস করলেও আমি বিশ্বাস করতে পারিনি.....

বনহর সোজা হয়ে বসে বলে—তোমার অবিশ্বাসের কারণ?

• জানি, তুমি বিনা কারণে কাউকে বধ করোনা, তাই।

কে বললো আমি তাকে বধ করেছি?

তুমি তাহলে তাঁকে সত্যি আটক করে নিয়ে গেছে?

হাঁ মনিরা।

কিন্তু কেন? শুনেছিলাম কান্দাই রিলিফ প্রধান অতি সভ্য মহৎ ব্যক্তি, তাঁর ন্যায়নীতির জন্য কান্দাই সরকার তাঁকে পুরস্কৃত করেছিলেন.....

অট্টহাসিতে ফেটে পড়লো বনহর, তারপর হাসি থামিয়ে বললো—
পুরস্কৃত করেছিলেন সরকার বাহাদুর রিলিফ প্রধানকে? চমৎকার! উপযুক্ত লোককেই সরকার খেতাব দান করেন এবং পুরস্কৃত করেন। হাজার হাজার দুঃস্থ জনগণের মুখের গ্রাস নিয়ে যারা ঐশ্বর্যের ইমারত গড়ে তুলেছেন তাঁরাই হলেন সরকার মহলের কর্মকর্তা। পুরস্কৃত না করে এদের কি অবহেলা দেখানো যায়? সর্বদা কত কষ্ট করে বিদেশের পাঠানো সাহায্য দ্রব্যগুলো গুদামজাত করার পর রাতের অন্ধকারে একগাদা কাগজের বিনিময়ে সীমান্তের ওপারে পার করে দিচ্ছে। কত সাধু, কত মহৎ কত মহান এরা। একটু থেমে দাঁতে দাঁত পিষে বললো বনহর—শুধু রিলিফ দ্রব্য নয়, যে খাদ্যশস্য আমাদের দেশে আজকাল উৎপন্ন হচ্ছে তাতে দেশে এমন খাদ্যাভাব মোটেই ঘটতো না। এত ফসল ফলেও আজ চারদিকে শুধু হাহাকার। জানো মনিরা কত অসহায় মানুষ আজ খেতে না পেয়ে আত্মহত্যা করছে, কত পিতামাতা খেতে দিতে না পেরে সন্তান বিক্রি করছে, কত নারী খিদের জ্বালা সহ্য করতে না পেরে ইজ্জত বিক্রি করে ক্ষুধা নিবারণ করছে। খোঁজ রাখো না এতোশত। খোঁজ রাখার তেমন কোনো প্রয়োজনও নেই। মনিরা, শুধু ছাপানো কাগজ... শুধু ছাপানো গাদা গাদা কাগজের বিনিময়ে দেশের সম্পদ পাচার হয়ে যাচ্ছে সীমান্তের বাইরে। কিন্তু করছে কারা তাদের সন্ধান কেউ কোনোদিন পায় না, আর পাবে কি করে তাঁরা হলেন দেশের মহান নেতার দল। মনিরা, চুপ করে আছো কোশ দু' একটা কথার উত্তর দাও। জানি, কথা খুঁজে পাবে না। দিন দিন দেশের যে চরম অবস্থা দাঁড়াচ্ছে তাতে কেউ আর চুপ থাকতে পারবে না, উম্মাদের মত

চিৎকার করবে, তারপর প্রকাশ্যে টেনে হিঁচড়ে নামিয়ে আনবে যারা আজ স্বনামধন্য মহান ব্যক্তি সেজে সাধুতার বুলি আওড়িয়ে নিজেদের সাধুতার ফলাও করছে। যতই সাধুতার মুখোস পরে থাকুক তবু তারা রেহাই পাবে না.....

তাহলে তুমি কি.....

হাঁ, রিলিফ প্রধান মহাশয় আমার স্বর্ণগুহায় আখিত্য বরণ করেছেন। তাঁকে রাশি রাশি স্বর্ণ ভক্ষণ করার জন্য আমি দিয়েছি। শুধু তিনিই নন, অচিরে জম্বুর কয়েকজন অধিনায়ক আমার কান্দাই স্বর্ণগুহায় আমন্ত্রণে আসবেন।

তোমার কথা আমি বুঝতে পারছি না, এসব তুমি কি বলছো?

এসেছো স্ত্রীর অধিকার নিয়ে স্বামীর পাশে, বেশি না বুঝাই ভাল। তবে হ্যাঁ রিলিফ প্রধানকে আমি আটক করে নিয়ে গেলেও তাকে অমান্য করিনি। ঐশ্বর্যের ইমারত থেকে নিয়ে গেছি কিন্তু তাঁকে স্বর্ণ সিংহাসনে, স্বর্ণস্তূপের মধ্যে রেখেছি। ঘুমাবে স্বর্ণস্তূপে, খাবে স্বর্ণস্তূপ। ক্রোটি কোটি দুঃস্থ জনগণের মুখের গ্রাস আত্মসাৎ করে যা চেয়েছিলো ঠিক তাই দিয়েছি.....মনিরা, আমি তাই দিয়েছি। হাঁ, আরও অনেক মহান ব্যক্তি আছেন যাঁরা দেশের মানুষের ভাগ্য নিয়ে লটারি খেলছেন, তামাসা মনে করছেন, ওরা শুধু কুকুরের মত ঘেউ ঘেউ করেই মরবে, করতে পারবে না কিছু, কিন্তু আর বেশিদিন নয়...তাদেরকেও স্বর্ণগুহায় আমন্ত্রণ জানানো হবে, ভক্ষণ করতে দেওয়া হবে স্বর্ণস্তূপ.....ক্ষমা নেই তাদের, ক্ষমা নেই। না, হত্যা আমি কাউকে করবোনা—হত্যা করে তাদের রেহাই দেবো না আমি। ঐ দুঃস্থ জনগণ, যাহা কুকুরের মত ঘেউ ঘেউ করে মরে তাঁদের আমি বারণ করে দেবো যেন এইসব মহারথীকে হত্যা করে পরিভ্রাণ না দেয়।

চুপ করো। চুপ করো কি হয়েছে তোমার বলো তো?

মনিরা, জানি না কেন ওদের নাম শুনলে আমার শরীর জ্বালা করে। আমি পারি না, পারি না নিজেকে সংযত রাখতে।

মনিরা বুঝতে পারে সবকিছু তাই সে স্বামীকে শান্ত করবার চেষ্টা করে।

ওদিকে সরকার সাহেব নূর সহ পাশের কক্ষে চলে যান। ঐ কক্ষটিতে সরকার সাহেব এবং নূরের জন্য ব্যবস্থা করা হয়েছিলো।

সুন্দর সুসজ্জিত কক্ষ।

পাশাপাশি দুটি শয্যা। একটিতে ঘুমালো নূর, অপরটিতে শয়ন করলেন বৃদ্ধ সরকার সাহেব।

মনিরা স্বামীর মাথাটা তুলে নিলো কোলে, তারপর ধীরে ধীরে আংগুল বুলোতে লাগলো তার চুলের মধ্যে।

বজরা তখন এগিয়ে যাচ্ছে গন্তব্য পথে।



সমস্ত রাত বজরা চলেছে।

ভোর হবার পূর্বে বজরা এসে ভিড়লো একটি সুন্দর পরিচ্ছন্ন গ্রামের সান বাঁধানো ঘাটে। আজানের ধ্বনি কানে যেতেই ঘুম ভাঙলো নূরের। সে তাড়াতাড়ি উঠে বসে বিছানায়। প্রথমে মনে হয় সে বুঝি তার শোবার ঘরে নিজের বিছানায় ঘুমিয়ে আছে। উঠে বসার সঙ্গে সঙ্গে মনে পড়ে এ তো তার শোবার ঘর নয় এ যে বজরা। তার বিছানা সহ কক্ষটা দোল খাচ্ছে। বজরার জানালা দিয়ে ভোরের বাতাস তার দেহ স্পর্শ করছে। দেখা যাচ্ছে বজরার পাশেই একটি পাকা মসজিদ। হয়তো বা সেই মসজিদ থেকেই ভেসে আসছে আজানের ধ্বনি।

পাশের বিছানায় তাকিয়ে দেখলো নূর, সরকার সাহেব কখন শয্যা ত্যাগ করে বেরিয়ে গেছেন।

নূর ধীরে ধীরে বেরিয়ে এলো বজরার বাইরে। অপরূপ দৃশ্য, বড় মধুর, বড় মনোরম। নূর কোনোদিন বুঝি এমন সুমধুর আজানের ধ্বনি শোনেনি। কোনোদিন বুঝি দেখেনি এমন পরিচ্ছন্ন সুন্দর গ্রাম।

বজরার পাটাতনে দাঁড়িয়ে নূর মুগ্ধ দৃষ্টি নিয়ে দেখতে লাগলো।

সরকার সাহেব বজরার ছাদে নামাজ পড়ছেন। মাঝিরা বজরাখানা ভালভাবে ঘাটে বাঁধছে। কতকগুলো লোক সাদা টুপি পরা ঘাটে অজু করছেন। এক একজনকে অতি পবিত্রময় মনে হচ্ছে। কতকগুলো গাছপালা ঘাটের আশে পাশে ঘিরে আছে।

গাছের ডালে ভোরের পাখি কিচির-মিচির করে ডাকছে। ঘাটের অদূরে একটি মস্ত বড় বাড়ি নজরে পড়লো। পুরানো হলেও বাড়িখানা আভিজাত্যপূর্ণ।

নূর অবাক হয়ে দেখছে।

এমন সময় তার পিঠে হাত রাখলো কে যেন। সঙ্গে সঙ্গে তার আবুর কণ্ঠস্বর—নূর, কি দেখছো?

আবু আমরা কোথায় এসেছি?

আমি এখানে থাকি।

তুমি এখানে থাকো আবু?

হাঁ,

তাই তো তুমি যেতে চাওনা। বড় সুন্দর এ গ্রাম! ঐ বাড়িখানা কার আবু?

আমাদের।

বাঃ ভারি সুন্দর। আমরা ঐ বাড়িতে যাবো?

হাঁ যাবে বৈকি। ও বাড়িতে আমরা থাকবো কিছুদিন। দাদীমার জন্য মন খারাপ করবে নাতো?

তুমি আছো, আমি আছি, সরকার দাদু আছেন, ক’দিন মাত্র থাকবো, মন খারাপ করবে না।

হাঁ ঠিক বলছো আবু। বললো বনহর।

ততক্ষণে ঘাটে বজরা বাঁধা হয়ে গিয়েছিলো। মাঝিরা এসে বললো—
হজুর, মাল নামাবো কি?

বললো বনহর—হাঁ, নামিয়ে নাও।

সরকার সাহেবের নামাজ পড়া হয়ে গিয়েছিলো, তিনিও এসে দাঁড়িয়েছেন বনহর আর নূরের পাশে।

সরকার সাহেব আর নূর বজরার সিঁড়ি বেয়ে নেমে যায় নিচে।

বনছর ফিরে তাকাতেই দেখতে পায় মনিরা এসে দাঁড়িয়েছে তার পিছনে। বনছর মনিরার কানের কাছে মুখ নিয়ে বলে—সেই বিশ বছর আগে যে গ্রাম থেকে আমরা বিদায় নিয়েছিলাম, মনিরা এ সেই গ্রাম। সেদিন নৌকায় চেপে তুমি আমার দিকে হাত বাড়িয়ে ডেকেছিলে, এসো মনি ভাই.....মনে পড়ে সে কথা।

লজ্জায় মনিরার মুখ রাঙা হয়ে উঠে। যদিও তার মনে নেই কিছু তবু হাসে সে।

বনছর আর মনিরা নেমে যায় বজরা থেকে।

কতদিন পর বনছর আর মনিরা ফিরে এসেছে গ্রামের বুকে। অবশ্য মনিরাকে এর পূর্বে কয়েকবার আসতে হয়েছিলো তার মামীমার সঙ্গে। এ ছাড়া তার দূর সম্পর্কের এক চাচাতো ভাই তাকে নিয়ে এসে জোরপূর্বক বিয়ে করতে গিয়েছিলো।

সেই বিয়ের আসর থেকে বনছর তাকে তুলে নিয়ে গিয়েছিলো, কান্দাই শহরে তার মামীর কাছে, পৌছে দিয়েছিলো তাঁকে।

আজও মনিরা ভুলতে পারেনি সেদিনের কথাগুলো। কপালে চন্দনের আলপনা, গলায় ফুলের মালা। পরনে লাল শাড়ি। সমস্ত শরীরে অলঙ্কার পরে বসেছিলো মনিরা ঘোমটায় মুখ ঢেকে। চোখের পানিতে বুক ভেসে যাচ্ছিলো ওর—হঠাৎ এমন সময় এক দপ্কা দমকা হাওয়ার মত কক্ষ প্রবেশ করেছিলো সে, মনিরার কানে প্রবেশ করেছিলো একটি শান্ত গম্ভীর কণ্ঠস্বর—মনিরা? সঙ্গে সঙ্গে মনিরা ঘোমটা সরিয়ে দাঁড়িয়ে পড়েছিলো। তাকিয়ে দেখেছিলো তারই সম্মুখে দাঁড়িয়ে মনির। ভাববার সময় না দিয়ে মনিরাকে সে তুলে নিয়েছিলো দুটি হাতের উপর, তারপর দ্রুত বেরিয়ে গিয়েছিলো পিছন দরজা দিয়ে।

বাইরে অপেক্ষা করছিলো তাজ, বনছর মনিরাকে নিয়ে তাজের পিঠে চেপে বসেছিলো তারপর আর কে পায় তাকে।

মনিরার বুকে সেদিন সেকি আনন্দোচ্ছ্বাস বয়ে গিয়েছিলো—একটি ঘর্মাক্ত বুক তাকে নিবিড় করে নিয়েছিলো একান্ত আপনজনের মত।

আজও মনিরার মনে শিহরণ জাগায় ঐ দিনটির স্মৃতিগুলো। আজ স্বামীর সঙ্গে বজরা ত্যাগ করবার সময় সেদিনের স্মৃতিগুলো বারবার মনে পড়ছিলো।

সরকার সাহেব আর নূর ততক্ষণে বাড়ির ভিতরে প্রবেশ করেছে। সরকার সাহেবের অতি পরিচিত ঐ বাড়ি। তাই তিনি নূরকে সব ঘুরে ফিরে দেখাতে লাগলেন।

বাড়িতে যারা আত্মীয়স্বজন ছিলেন তারা সরকার সাহেব এবং মনির ও মনিরের বৌকে পেয়ে আনন্দে আত্মহারা হলেন। গ্রামবাসী সবাই এসে ভিড় জমালো চৌধুরীবাড়ির উঠানে।

নূর এত লোক দেখেনি, সে অবাক হয়ে গেছে। কেউ এনেছে চিড়া, গুড়, কেউ এনেছে তাল পিঠা, কেউ এনেছে মধুর হাঁড়ি। কেউ বা পুকুর থেকে বড় মাছ, কেউ বা খাসী-ছাগল, যে যা পারে নিয়ে এসেছে জমিদার পুত্র মনিরকে দেখতে।

বনহুর আর মনিরা অন্তপুরে প্রবেশ করলো। সরকার সাহেবের নির্দেশে পিতার ঘরখানাই বনহুরকে থাকার জন্য খুলে দেওয়া হলো।

বিরাট কক্ষ।

কক্ষমধ্যে পুরোন স্মৃতি জড়ানো বহু আসবাবপত্র থরে থরে সাজানো আছে। একপাশে মেহগনি কাঠের বিরাট খাট। একপাশে মেহগনির আলমারী, চেয়ার, টেবিল আরও কত কি। হাতির দাঁতে তৈরি বড় একটি চেয়ার। এই চেয়ারখানাতে মাহমুদ চৌধুরী নিজে বসতেন।

বনহুর কক্ষমধ্যে প্রবেশ করে কক্ষের চারদিকে তাকালো। দু'চোখ তার ঝাপসা হয়ে এলো। রুমালে চোখ মুছলো বনহুর।

মনিরারও দু'চোখ ছাপিয়ে পানি বেরিয়ে এলো, সে আঁচলে চোখ মুছতে লাগলো।

সরকার সাহেব বললেন—আজ যদি বড় সাহেব থাকতেন তাহলে কত খুশি হতেন তিনি। পুত্র, পুত্রবধু নাতিকে পেয়ে.....বাস্পরুদ্ধ হয়ে আসে তাঁর কণ্ঠস্বর।

নূর অবাক হয়ে দেখছিলো—শহরের দালানকোঠা শান শওকত আর এই পুরোন আমলের দালানকোঠা শান-শওকত কত তফাৎ। দালানে নানা কারুকার্য, দরজায় নানা ধরনের কাজ। খাট-চেয়ার-টেবিলে দক্ষ কারিগরের হাতের ছোঁয়াচ যেন সবই বিস্ময়।

প্রথম দিন কাটলো।

দ্বিতীয় দিন হাজার হাজার মানুষ এসেছে ছোট সাহেবের দর্শন আশায়। তারা ছোট সাহেবকে এক নজর দেখতে চায়।

সকাল থেকে চৌধুরী বাড়ির সামনে লোকে লোকারণ্য! গ্রামের বৃদ্ধ, যুবক বালক, শিশু সবাই এসেছে ছোট সাহেবের দর্শনলাভ আশায়।

ছোট সাহেব বহুদিন পর এদেশে এসেছেন—গরিব দুঃখী সবাইকে তিনি প্রচুর অর্থ দান করবেন, কথাটা জানার সঙ্গে সঙ্গে চৌধুরী বাড়িতে হাজার হাজার দুঃস্থ জনগণ ভিড় জমাতে শুরু করলো।

এক সময় সরকার সাহেব এসে বনহরকে বললেন—মনির, গ্রামবাসী তোমাকে দেখতে চায়। দুঃস্থ জনগণ তোমার কাছে পেতে চায় কিছু.....

হুসে বললো বনহর—বেশ তো, তারা যা চায় পাবে। তাদের ইচ্ছা আমি পূর্ণ করবো সরকার চাচা।

বনহরের কথা শুনে খুশি হলেন সরকার সাহেব, তিনি ফিরে গিয়ে সবাইকে বললেন, ছোট সাহেব তাদের ইচ্ছা পূর্ণ করবেন।

কথাটা শুনে সবাই আনন্দে আত্মহারা হলো। ছোট সাহেবকে এক নজর দেখার জন্য উন্মুখ হয়ে উঠেছে সবাই।

এমন সময় ভীড় ঠেলে এগিয়ে এলো এক বৃদ্ধ—হাতের লাঠি, কাঁধে ভিক্ষার ঝুলি, চোখে কালো চশমা। বৃদ্ধ বহুদূর থেকে এসেছে, তার পায়ে হাঁটু অবধি ধূলো কাঁদা। পরনে একটা ছেড়া এবং তালিযুক্ত পাজামা আর সাট। চুলগুলো রুক্ষ এলোমেলো, চুলের ফাঁকে আটকে আছে খড়খুটো আগাছা। ভিখারি তার লাঠিখানা সম্বল করে নিয়ে হেঁটে-হেঁটে এসেছে। এতদূর।

ভিখারি এসে দাঁড়ালো ভিড়ের সম্মুখ ভাগে। বিপুল আশা আর অগ্রহ নিয়ে তাকিয়ে আছে সে, কখন এসে দাঁড়াবে ছোট সাহেব তাদের সামনে, একনজর দেখবে তাকে সে।

বনহর সহ সরকার সাহেব এসে দাঁড়ালেন চৌধুরীবাড়ির সিঁড়ির প্রথম সোপানে।

পিছনে স্তূপাকার খাদ্যসম্ভার এবং রেকাবির উপরে স্তূপাকার অর্থ। সরকার সাহেব ছোট সাহেবের হাতে তুলে দিচ্ছেন আর ছোট সাহেব তা তুলে দিচ্ছে গরিব বেচারীদের হাতে।

নূর পাশে দাঁড়িয়ে দেখছিলো।

অদূরে পর্দার আড়ালে দাঁড়িয়ে দেখছে মনিরা। এক একজন এগিয়ে আসছে আর হাত বাড়িয়ে নিচ্ছে। এবার এগিয়ে এলো বৃদ্ধ, বনহর ওর হাতে কাপড় এবং অর্থ তুলে দিতে গিয়ে থমকে পড়লো। এক সেকেন্ড ভেবে নিয়ে বললো—নূর তুমি সরকার চাচার সঙ্গে একটু সরে যাও।

সরকার সাহেব অবাক হলেন।

নূরও আশ্চর্য না হয়ে পারলো না। সরকার সাহেব বুঝতে পারলেন যে ভিখারির হাতে মনির অর্থ এবং বস্ত্র তুলে দিতে গিয়ে থেমে পড়েছে নিশ্চয়ই সে স্বাভাবিক ভিখারি নয়। কে সে এসেছে ভিখারির বেশে কে জানে।

সরকার সাহেব আর নূর চলে গেলেন। বনহর ভিখারির দিকে একটু ঝুকে বললেন—মিঃ জাফরী, জানতাম আপনি এখানেও আসবেন কিন্তু এ বেশে আপনাকে মোটেই মানাচ্ছেনা। কথাগুলো বলে বনহর তার হাতে বস্ত্র এবং অর্থ তুলে দেয়।

মিঃ জাফরী ভাবতেও পারেননি তাঁর এ ছদ্মবেশ বনহরের কাছে উদঘাটন হয়ে যাবে। তিনি ধীরে ধীরে সরে এলেন ভীড়ের বাইরে।

বনহর কিন্তু অর্থ এবং বস্ত্রদানকালে লক্ষ্য করছিলো মিঃ জাফরী ভীড় ঠেলে কোনদিকে যান। মিঃ জাফরী সরে যেতেই বনহর আর দু'তিন জন দুঃস্থ ব্যক্তিকে দেওয়ার পর চলে গেলো ভিতরে। সোজা সে অন্তপুরে প্রবেশ করে মনিরাকে বললো—মনিরা পুলিশ এখানেও আমার পিছু নিয়েছে। আমি এক্ষুণি বিদায় নিচ্ছি। তোমরা সরকার চাচার সঙ্গে চলে যেও।

মনিরার মুখে কে যেন এক পৌঁচ কালী মাখিয়ে দিলো, সঙ্গে সঙ্গে অক্ষুটধ্বনি করে উঠলো—পুলিশ এখানেও পিছু নিয়েছে!

হাঁ মনিরা। নূর এবং সরকার সাহেবকে এক্ষুণি ডেকে পাঠাও আমি তাদের কাছে বিদায় নিচ্ছি।

ঐ মুহূর্তে সরকার সাহেব আর নূর অন্তপুরে এসে পড়লেন।

বনহর তাদের দেখে ব্যস্তকণ্ঠে বললেন—সরকার চাচা বিশেষ জরুরি কাজে এক্ষুণি আমাকে যেতে হচ্ছে। আপনি মনিরা এবং নূরকে নিয়ে চলে যাবেন। বাবা নূর তোমরা চলে যেও আমি এক্ষুণি যাচ্ছি।

সেকি আব্বু তুমি এক্ষুণি চলে যাবে?

হাঁ বাবা, কারণ চাকুরি স্থান থেকে ডাক এসেছে।

না গেলেই কি নয়?

যেতেই হবে। কথাটা বলেই বনহর বেরিয়ে যায় কক্ষ থেকে।

সরকার সাহেব আর নূর দাঁড়িয়ে থাকেন।

মনিরার দু'চোখ ছাপিয়ে পানি আসছিলো তবু সে অতি কষ্টে নিজকে সামলে নেয়।

নূর বলে উঠে—চলো দাদু আব্বুকে বিদায় দিয়ে আসি।

আমরা চলো দুঃখী ব্যক্তিদের বিদায় করিণে। তোমার আব্বু যাচ্ছেন তুমি যদিও দুঃখীদের কাছে না যাও তা হলে ওরা অভিশাপ দেবে।

মনিরা—বললো হাঁ তুমি তাই যাও তোমার আব্বুর বাকি কাজটুকু তুমি সমাধা করোগে। নইলে দুঃখী বেচারীরা ক্ষেপ পাবে যে বাবা।

সরকার সাহেব নূর সহ বেরিয়ে গেলেন। অগণিত দুঃস্থ জনগণ দাঁড়িয়েছিলো। তারা সরকার সাহেব ও নূরকে পেয়ে পুনরায় আনন্দে আত্মহারা হয়ে উঠলো। সবাই হাত বাড়িয়ে এগিয়ে আসতে লাগলো তাদের দিকে।

ঐ মুহূর্তে সাধারণ দুঃস্থ বৈশ্যধারী কতকগুলো পুলিশ ফোর্স সহ জাফরী উপস্থিত হলেন সেখানে। সমস্ত বাড়িখানা ওরা ঘেরাও করে ফেললো।

নূর এবং অন্যান্য সবাই অবাক হয়ে গেলো ব্যাপার কি। অবশ্য পুলিশ মহল তাদের পরিচয় জানিয়ে বললো—এ বাড়িতে দস্যু বনহর আছে তাকে গ্রেপ্তার করতে এসেছি।

দস্যু বনহর এ বাড়িতে আছে কথাটা শুনে নূরের মুখমণ্ডল কঠিন হয়ে উঠলো, সে ছুটে গেলো মায়ের কাছে...ব্যস্ত কণ্ঠে বললো—আম্মি আম্মি, সর্বনাশ হয়েছে দস্যু বনহর নাকি আমাদের এখানে এসেছে। সংবাদ পেয়ে পুলিশ ফোর্স সাধারণ দুঃস্থ জনগণের বেশে এসেছে তাকে গ্রেপ্তার করতে। আম্মি তুমি সাবধান থেকো, আমি দেখছি কোথায় দস্যু বনহর লুকিয়ে আছে।

‘মনিরার কণ্ঠ যেন রুদ্ধ হয়ে গেছে সে নির্বাক হয়ে ফ্যাল ফ্যাল করে তাকাচ্ছে পুত্রের মুখের দিকে। নূর পুনরায় বললো—আম্মি আব্বু চলে গেলেন আর এমন একটা বিপদ এলো। নিশ্চয়ই আব্বুর টাকার সন্ধান পেয়েছে সে তাই এসেছে এখানে.....কথাটা বলে নূর প্রবেশ করলো তার শোবার ঘরে।

মনিরাও পিছু পিছু এগিয়ে গেলো।

নূর ড্রয়ার খুলে বের করে নিলো রিভলবারখানা তারপর ছুটে বেরিয়ে গেলো।

ততক্ষণে পুলিশ ফোর্স সমস্ত বাড়িখানা ঘেরাও করে তল্লাশী চালানো শুরু করে দিয়েছে।

দস্যু বনহর এসেছে সংবাদ জানার পর দুঃস্থ জনগণ যে যেদিকে পারছে ছুটে পালাচ্ছে। সবার চোখে মুখে উদ্বিগ্নতার ছাপ ফুটে উঠেছে—সবার মুখে ঐ এক কথা দস্যু বনহর এসেছে, দস্যু বনহর এসেছে.....

নূর যখন রিভলবার নিয়ে ছুটেছে তখন সরকার সাহেব এসে দাঁড়ালেন—নূর কোথায় কাকে তুমি মারতে যাচ্ছে?

দস্যু বনহরকে।

কোথায় দস্যু বনহর?

এ বাড়িতেই আছে।

দস্যু বনহরকে খুঁজে পাওয়া আমাদের কারো সাধ্য নাই।

সরকার সাহেবের কথা নূরের কানে প্রবেশ করলো কিনা কে জানে।

ততক্ষণে বেরিয়ে গেছে নূর।

মিঃ জাফরী দলবল সহ সমস্ত বাড়িখানা তখন চম্বে ফিরছেন।

নূর তখন সিঁড়ি বেয়ে উপরে উঠে যাচ্ছিলো। তার হাতে উদ্যত রিভলবার। পাশ কেটে নেমে আসে একজন ভিখারিবেশী পুলিশ ইন্সপেক্টার। নূরকে আদর করে পিঠ চাপড়ে দেয়।

নূর একবার তাকিয়ে দেখে নেয় ইন্সপেক্টারকে, তারপর উঠে যায় উপরে।

ভিড়ের ফাঁকে পুলিশ ইন্সপেক্টার নিচে নেমে যায়, তারপর অদৃশ্য হয়ে যায় দুঃস্থ জনগণের মধ্যে।

মিঃ জাফরী তখন হস্তদণ্ড হয়ে প্রতিটি কক্ষে সন্ধান করে চলেছেন। মিঃ জাফরী সঙ্গেই রয়েছেন নূর আর সরকার সাহেব।

নূরের চোখেমুখে উদ্ভিগ্নতার ছাপ বিদ্যমান।

হঠাৎ একটি পুলিশ ব্যস্ত সমস্তভাবে ছুটে এলো, মিঃ জাফরী লক্ষ্য করে বললো—স্যার, ঐ দিকের দোতলার একটি চোরা কুঠরির মধ্যে হাত-পা-মুখ বাঁধা অবস্থায় পড়ে আছেন ইন্সপেক্টার রশিদ সাহেব।

বলো কি?

হ্যাঁ স্যার।

সবাই মিলে ছুটলো দোতলার সেই চোরা কুঠরিটার দিকে। পুলিশ মহল তো গেলোই, তাদের সঙ্গে সরকার সাহেব এবং নূরও গিয়ে হাজির হলো।

তারা সবাই বিস্মিত হতবাক হয়ে পড়েছেন। হাত পিছ মোড়া অবস্থায় বাঁধা, পা দু'খানা বাঁধা, চোখে-কানে রুমাল বাঁধা, মুখে রুমাল গোঁজা, চোরা কুঠরি মেঝেতে পড়ে আছেন ইন্সপেক্টার রশিদ সাহেব।

বৃদ্ধ হলেও রশিদ সাহেবের মত বলিষ্ঠ পুরুষ কমই নজরে পড়ে। একমুখ দাড়ি গোঁফ, দুটো উজ্জ্বল দীপ্ত চোখ—ভদ্রলোক পুরোন অফিসার, বয়স অনেক হয়েছে। অবসর মুহূর্ত প্রায় সন্নিহিতে। মিঃ রশিদ মিঃ জাফরীর সঙ্গে ইদানীং দস্যু বনহরকে খেপ্তার ব্যাপারে আগ্রহী এবং এ ব্যাপারেই তিনি এসেছেন কান্দাই শহর ছেড়ে পিয়ারু গ্রামে। অবশ্য এ গ্রামটির আরও

একটি নাম আছে, কেউ বলে মধুপুর, কেউ বলে পিয়ারু গ্রাম। এ গ্রামেই ছিলেন মাহমুদ চৌধুরী দীর্ঘ ত্রিশটা বছর, তারপর তিনি কান্দাই শহরে গিয়ে বসবাস শুরু করেন। মিঃ রশিদ যখন উপরে উঠে গিয়ে একাই একটি কক্ষে দস্যু বনহরের সন্ধান করছিলেন তখন তার পিছন থেকে কে যেন বলিষ্ঠ হাতে ধরে ফেলে এবং তাকে বেঁধে ফেলে তাঁর মুখে রুমাল গুঁজে দেয়।

রশিদ সাহেবের হাত পার বাঁধন মুক্ত করে দিতেই তিনি হাউ মাউ করে কেঁদে উঠলেন, তিনি বললেন দস্যু বনহর হঠাৎ আক্রমণ চালিয়ে তাকে খুব করে কষে বেঁধে রেখে পালিয়ে যেতে সক্ষম হয়েছে।

নূর চমকে উঠলো, তাদের চোরা কুঠরির মধ্যেই তাহলে আত্মগোপন করেছিলো দস্যু বনহর। ছুটে গেলো নূর মায়ের কাছে এবং তাকে সব কথা খুলে বললো। আশ্চি, দস্যু বনহর আমাদের এই বাড়িরই দ্বিতলের একটি চোরা কুঠরির মধ্যে লুকিয়ে ছিলো। পুলিশ ইন্সপেক্টার সেই কুঠরির মধ্যে প্রবেশ করে দস্যু বনহরকে খুঁজছিলেন, ঠিক ঐ সময় তাঁকে পিছন থেকে সে ধরে ফেলে এবং তাঁকে বেঁধে রেখে পালাতে সক্ষম হয়। আশ্চি, কত বড় দুঃসাহস তার দেখেছো?

হাঁ বাবা, সে যে অনেক বড় দুঃসাহসী তা আমি জানি। পুলিশ ইন্সপেক্টার কেন কেউ তাকে গ্রেপ্তার করতে পারবে না। মনিরা কথাগুলো এবং নিশ্বাসে বললো।

নূর বললো—আশ্চি, তুমি সব সময় বলো দস্যু বনহর অনেক বড় দুঃসাহসী বীর পুরুষ, তাকে কেউ কোনোদিন গ্রেপ্তার করতে পারবে না। আশ্চি, দস্যু বনহরের প্রতি তোমার এত বিশ্বাস কেন বুঝতে পারি না।

মনিরা বলে উঠে—লোকমুখে শুনেছি তাই আমার এ বিশ্বাস বাবা।

তুমি যাই বলো আশ্চি, দস্যু বনহর যত বড় বীর পুরুষই হোক না কেন, তাকে আমি বড় হয়ে গ্রেপ্তার করবোই করবো।

মনিরা কোনো জবাব দিলো না।

নূর ব্যস্তভাবে বেরিয়ে গেলো সেখান থেকে। এবার সে বুঝতে পারলো পুলিশ ইন্সপেক্টার রশিদ সাহেবের বেশে যে তাকে আদর জানিয়ে সিঁড়ি বেয়ে

নিচে নেমে গেলো, সেই হলো দস্যু বনহর। একমুখ দাড়ি, গৌফ, মাথায় টুপি, কাঁধে একটি ব্যাগ। নূর ভাবতে থাকে সে যদি জানতে পারতো ঐ লোকটি দস্যু বনহর তাহলে সে কিছুতেই ছাড়তো না, তাকে যেমন করে হোক গ্রেপ্তার করতোই কিন্তু সে জানে না কে ছিলো সে ব্যক্তি।

প্রায় ঘন্টা দুই সন্ধান চালানোর পর বেরিয়ে গেলো পুলিশ বাহিনী। তারা চৌধুরীবাড়ির অনতিদূরে গাড়ি রেখে গোপনে এসেছিলেন বনহরকে গ্রেপ্তার করতে কিন্তু তাঁরা বিফলকাম হয়েছে।

এমন পরাজয় হবে ভাবতে পারেননি মিঃ জাফরী, তিনি মুখ চুন করে ফেলেছেন। অন্যান্য পুলিশ অফিসার সবার মুখমণ্ডলই মলিন বিষণ্ণ। তাঁরা তখনই ফিরে যাবার জন্য ব্যবস্থা করছিলেন কিন্তু সরকার সাহেব ছাড়লেন না, তিনি তাঁদের খাওয়া দাওয়ার ব্যবস্থা করলেন।

পুলিশ মহল এতে খুশি হলেন, কারণ তারা বহুদূর থেকে এসেছেন, ক্ষুধার্ত ছিলেন ভীষণ ভাবে।

খাওয়া দাওয়া চুকিয়ে বিদায় গ্রহণ করতে প্রায় ঘন্টা তিন চার লেগে গেলো, তারপর বিদায় গ্রহণ করলেন।

মিঃ জাফরী দল বল নিয়ে চলে গেলেও একজন ডিটেকটিভ তিনি গোপনে রেখে গেলেন চৌধুরীবাড়ির দিকে লক্ষ্য রাখার জন্য।

ডিটেকটিভ মিঃ সুলতান সেই বাড়ির একজন দারোয়ান হিসেবে আত্মগোপন করে রইলো। বাড়ির কেউ তাকে চিনতে না পারলেও পুরোন চাকর নাসির তাকে চিনতে পারলো। এই দারোয়ান তাদের পুরোন দারোয়ান নয়, তবু সে কারও কাছে কোনো কথা বললো না।

মনিরার সমস্ত আশা-আকাঙ্ক্ষা সব যেন নিমিষে মুছে গেছে। বিষণ্ণ মনে বসেছিলো নিজের ঘরে। আগামীকাল তারা পুনরায় কান্দাই অভিমুখে রওয়ানা দেবে।

সরকার সাহেব এবং নূর বজরায় গেছে, সবকিছু গোছগাছ করে নিচ্ছে তারা।

মনিরা শুয়ে শুয়ে ভাবছে কত কথা। এত দূরে এসেছে তবু স্বস্তি পেতে দিলো না, পুলিশ মহল পেয়ারা গ্রামেও এসে পড়েছিলো তার স্বামীর সন্ধানে। বারবার স্বামীর মুখখানা ভাসছিলো তার চোখের সামনে।

এমন সময় এক গেলাস দুধ নিয়ে কক্ষমধ্যে উপস্থিত হলো পুরোনো ভৃত্য মালিক মিয়া।

পদশব্দে চোখ তুলে তাকালো মনিরা, বললো—কে মালেক?

হাঁ বৌরাণী, আমি মালেক। এই গরম দুধ টুকু খেয়ে নিন।

না, এখন অসময়ে দুধ খাবো না।

ততক্ষণে মালেক মিয়া একেবারে শয্যার পাশে এসে দাঁড়িয়েছে। একটু বৃকে চাপাকণ্ঠে বলে মালেক মিয়া—বৌরাণী.....

কে তুমি!

হাঁ চুপ.....

কিছু.....

কোনো কিছু নয়, আমি তোমাদের পাশে থাকবো কান্দাই পৌছানো অবধি.....

সত্যি তুমি আছো.....মনিরা স্বামীর বৃকে মাথা রাখলো।

মালেক মিয়া বেশি দস্যু বনহর মনিরাকে নিবিড়ভাবে বৃকে টেনে নিয়ে বললো—তবে এখনও আমি নিশ্চিত নই মনিরা, কারণ আমাদের দরজায় এখন যে ব্যক্তি দারোয়ান বেশে পাহারায় রত আছে সে একজন দক্ষ ডিটেকটিভ, নাম তার মিঃ সুলতান হোসেন।

সত্যি বলছো? অবাক কণ্ঠে বললো মনিরা।

বনহর বললো—হাঁ সত্যি এবং সে সর্বক্ষণ এ বাড়ির সবার উপর তীক্ষ্ণ নজর রেখেছে।

মনিরা বললো—আসল মালেক মিয়া তাহলে কোথায় উধাও হলো?

কৌশলে সরিয়ে দিয়েছি, অবশ্য তাকে কোনো অসুবিধা পোয়াতে হয়নি বা হচ্ছে না। আমরা চলে গেলেই সে ফিরে আসবে।

জানো নূর তোমাকে.....

জানি? হেসে বললো বনহর—সব শুনেছি।

তবু হাসছে তুমি?

নিজের সন্তানের কাছে আত্মগোপন এটা আমার জীবনে কম দুঃখের কথা নয় তবু হাসি মনিরা, না হেসে কি করবো বলো?

এমন সময় বাইরে কারও পায়ের শব্দ শোনা যায়।

বনহর মনিরাকে বাহুবন্ধন থেকে মুক্ত করে দিয়ে বলে, নিন বৌরাণী, আপনার দুধটুকু খেয়ে নিন।

মনিরা দুধের গেলাস হাতে নেয়।

এমন সময় কক্ষ প্রবেশ করে নূর এবং সরকার সাহেব। নূর মায়ের পাশে গিয়ে দাঁড়ায়—আম্মি, আমাদের সব তৈরি হয়ে গেছে কাল সকালেই আমরা রওয়ানা হবো।

সরকার সাহেব বললেন—হাঁ মা, তোমার জিনিসপত্র সব গুছিয়ে নাও, সকালে আমরা রওয়ানা দেবো।

মনিরা দুধের গেলাস মালেক মিয়ার হাতে দিয়ে বলে—মালেক ভাই, এবার তুমিও যাবে আমাদের সঙ্গে, কেমন?

মালেক মিয়া দাঁড়িতে হাত কচলিয়ে বলে—বৌরাণী, আপনার যখন ইচ্ছা আমাকে সঙ্গে নিয়ে যাওয়া তখন আপত্তি করতে পারি? যাবো তবে.....

বলো, খামলে কেন মালেক চাচা? বললো নূর।

মালেক মাথা চুলকে বললো—দু' একদিন থেকেই চলে আসবো কিন্তু।

মনিরা হেসে বললো—চিরদিন কি তোমাকে আমরা ধরে রাখতে পারবো মালেক ভাই। বেশ, তুমি যখন আসতে চাও এসো।

নূর খুশি হয়ে বলে—মালেক চাচা কিন্তু সুন্দর গল্প জানে। জানো আম্মি এখানে যেদিন প্রথম এলাম সেদিন মালেক চাচা একটি গল্প বলেছিলো। ভারী অদ্ভুত গল্প, তুমি যদি শুনতে। অবশ্য মালেক চাচা এখনও শেষ করেনি। মজা হবে, গল্পটা বজরায় বসে বসে শুনবো।

মালেক মিয়া বেশি বনহর শুধু হাসলো, কোনো জবাব দিলো না। কারণ আসল মালেক মিয়া নূরকে কোন্ গল্প শুনিয়েছিলো তা সে জানে না।

বেরিয়ে গেলো মালেক মিয়া।

সরকার সাহেব আর নূরও বেরিয়ে গেলো সেখান থেকে।

পরদিন।

চৌধুরী বাড়ি ত্যাগ করে সবাই বেরিয়ে এলো বাইরে। আজ আবার থামবাসীরা একত্রিত হয়েছে বৌরাণীকে বিদায় সম্বাষণ জানাতে। ছোট

সাহেব নেই, তিনি হঠাৎ চলে গেলেন এ দুঃখ গ্রামবাসীগণ ভুলতে পারে না। সবাই নীরবে চোখ মুছতে লাগলো।

সরকার সাহেব সবার সঙ্গে হেসে কথাবার্তা বলে বিদায় নিচ্ছিলেন।

মহিলা মহলে দাদী মামী ফুফু চাচী সবাই এসে ভিড় জমিয়েছে। বহুদিন পর এসেছিলেন ওরা—দু'চার দিন থেকেই চলে যাচ্ছে, এই হলো তাদের দুঃখ, সবার চোখে পানি আঁচলে চোখ মুছছে কেউ কেউ।

যা কিছু জিনিসপত্র মাথায় বয়ে নিয়ে চলেছে বাড়ির চাকর বাকরের দল। মালেক ভাইও মস্ত এক পুঁটলি মাথায় নিয়েছে, তার অর্ধেকটা মুখ ঢাকা পড়ে গেছে পুঁটলির আড়ালে।

সবাই যখন ভিড় করে বিদায় সম্ভাষণ জানাচ্ছিলো তখন অন্য চাকর বাকরের দলের সঙ্গে মালেক মিয়াও এসে উঠলো বজরায়।

এক সময় বজরা ছাড়লো।

ডিটেকটিভ মিঃ সুলতান ওয়্যারলেসে মিঃ জাফরীকে জানালেন, চৌধুরী বাড়ি ত্যাগ করে চলে গেলেন মিসেস মনিরা ও তার ছেলে নূর। সঙ্গে বৃদ্ধ সরকার সাহেব, আর কেউ ছিলো না তাদের সঙ্গে।

মিঃ জাফরী সংবাদ শুনে বুঝতে পারলেন দস্যু বনহরও গ্রাম ছেড়ে ভেগেছে। মিঃ জাফরী সুলতান সাহেবকে ফিরে আসার জন্য নির্দেশ দিলেন।

স্বয়ং দস্যু বনহর যে তারই চোখের সম্মুখ দিয়ে চাকরের বেশে পুঁটলি মাথায় বেরিয়ে গেলো এটা সুলতান সাহেব দক্ষ গোয়েন্দা হয়েও টের পেলেন না।

বজরা ছাড়ার পর তিনিও একটি পানসী নৌকা ধরে অদূরস্থ বন্দর অভিমুখে রওয়ানা দিলেন।

বজরা এগিয়ে গেছে তখন অনেক দূর।



মনিরা মাঝের বড় কামরায় শুয়েছিলো চুপচাপ। যদিও সে ঘুমায়নি তবু তার চোখ দুটো বন্ধ ছিলো, ভাবছিলো এ বজরাখানা তার স্বামীর। এই

বজরার প্রতিটি স্থানে রয়েছে তার স্বামীর স্পর্শের উষ্ণ ছোঁয়াচ। সবচেয়ে তার বড় আনন্দ হচ্ছে তাদের সঙ্গেই রয়েছে তার স্বামী, এ শুধু আনন্দ নয়, পরম খুশির কথা। কিন্তু কেউ জানে না, এমন কি সরকার সাহেবও জানে না। জানে না নূর। যদিও মনিরার পাশে তেমন করে সে আসতে পারেনি কিন্তু দৃষ্টি বিনিময় হয়েছে দূর থেকে দু'জনার।

মনিরা মাঝে মাঝে চোখ দুটো মেলে তাকিয়ে দেখছিলো যদি কান ছিলো বাইরের দিকে কিন্তু দৃষ্টি ছিলো বেলোয়াড়ী ঝাড়ের দিকে।

না তাকালে বাইরের কথাগুলো যেন স্পষ্ট শোনা যাচ্ছে না, তাই মাঝে মাঝে মনিরা সতর্কতার সঙ্গে চোখ মেলে তাকাচ্ছিলো।

বজরা চলার সঙ্গে সঙ্গে বজরার ছাদে লটকানো ঝাড়বাতি দোল খাচ্ছিলো, তার সঙ্গে সঙ্গে মনিরার মনটাও যেন দোল খাচ্ছিলো আনন্দের আবেশে। যা হোক একটিবার তবু ওকে পাশে পাবে সে নিবিড়ভাবে। শোনা যাচ্ছিলো নূরের গলার স্বর—বলোনা মালেক চাচা সেই গল্পটা?

মালেকবেশী বনহর বিব্রত হয়, কারণ সে জানে না কোন্ গল্প বলছিলো সেই মালেক মিয়া। একটু ভেবে নিয়ে বললো সে—গল্পটা সব ভুলে বসে আছি। দেখলে তো কেমন বিপদ আপদ গেলো। তুমি যদি একটু ব্লো তাহলে সব মনে পড়ে যাবে।

মালেক চাচা, যে গল্প তুমি বলছিলে তা তো তোমার ভুলে যাওয়ার কথা নয়, সে তো তোমার জীবন-কাহিনী—চৌধুরী বাড়ির ইতিকথা.....

ও, এবার মনে পড়েছে সেই গল্প মানে আমি এ বাড়িতে কেমন করে এলাম এই তো?

না না, তুমি সব ভুলে বসে আছো।

একেবারে ভুলে বসে আছি বাবা, তুমি যদি একটু বলতে?

আচ্ছা তুমি যতটুকু বলেছিলে আমি সংক্ষেপে তোমাকে বলছি। তুমি যখন চৌধুরী বাড়ি প্রথম এলে তখন সব তোমার কেমন আশ্চর্য লাগছিলো এমন মস্তবড় বাড়ি কোনোদিন দেখোনি, দেখোনি এমন শান শওকত.....

হাঁ, কিছু কিছু মনে পড়েছে, তারপর?

তারপর এ বাড়ির সবকিছু তোমাকে অবাক করে তুললো, সবচেয়ে বেশি অবাক হয়েছিলে তুমি চৌধুরী বাড়ির ছোট সাহেবকে দেখে.....

কেন?

বোকা, তুমি সব ভুলে বসে আছো দেখছি?

হাঁ, বাবা বুড়ো মানুষ সব ভুলে বসে আছি। আর একটু বলো না?

বলছি শোন.....তুমি এসে দেখলে চৌধুরী বাড়ির সবার আদরের ধন নয়নের মনি ছোট সাহেবকে। ছোট্ট কচি ফুলের মত সুন্দর মুখ, সুন্দর নাক, আরও সুন্দর তার চোখ দুটো। নাম ওর মনির.....

মনির!

হাঁ, একেবারে সব ভুলে গেছো দেখছি? মনি বলে সবাই ওকে ডাকতো। মনি মানে আমার আবু বুঝলে?

ও এবার সব মনে পড়েছে—তারপর?

মনিকে কোলে নেবার বড় সখ হচ্ছিলো তোমার কিন্তু মনিকে স্পর্শ করার সাহস ছিলো না দূর থেকে ওকে চেয়ে চেয়ে দেখতে। সমস্ত দিন নানা কাজে ব্যস্ত থাকলেও তোমার একটা চোখ পড়ে থাকতো মনির দিকে। বেগম সাহেব দোলনায় মনিকে গুইয়ে রেখে যখন এদিক ওদিক যেতেন তখন তুমি গিয়ে নাকি চুপিচুপি তাকে আদার করতে.....

হাঁ, এবার সব মনে পড়েছে।

তাহলে বলো।

আচ্ছা বলছি—একদিন কোলে তুলে নিয়ে যেমন আদর করতে গেছি অমনি মনি আমার কোলে পায়খানা করে দিয়েছে...

হেসে উঠলো নূর—দূর তাই নাকি? তুমি মনিকে কোলে তুলে নেবার সাহসই পাওনি। শুধু ওর চিবুক ধরে নাড়া দিয়ে আদর করছিলে, ঠিক এমন সময় আমার দাদু এসে পড়লেন, খুব করে বকা দিলেন তোমাকে। ময়লা হাতে কেন তুমি মনিকে ছুঁতে গেলে। এমন সময় মনির মা মানে আমার দাদীমা এসে পড়লেন সেখানে, তিনি দাদুকে রাগ করতে দেখে সব জিজ্ঞাসা

করলেন। দাদু বললেন দেখেছো মালেকের সাহস মনির চিবুকে হাত দিয়েছিলো। দাদীমা তো দাদুর কথা শুনে হেসেই খুন। বললেন দাদীমা— তোমরা সবাই মনিকে আদর করো আর মালেকের বুঝি ইচ্ছা হয় না ওকে আদর করতে.....দাদু তো রেগে ভূত—তিনি বললেন—বলো কি বেগম সাহেবা, মালেক ময়লা হাতে মনিকে ছোঁবে? এই নিয়ে দাদু আর দাদীমার মধ্যে গুরু হলো ভীষণ ঝগড়া। দাদী বলছেন, একশো বার ছোঁবে আর দাদু বলছেন, না, ময়লা নোংরা হাতে ওকে কিছুতেই ছুঁতে দেবো না।

তারপর?

তুমিই তো ভাল জানো মালেক চাচা?

বললাম তো সব ভুলে গেছি।

বড্ড ভোলা তুমি মালেক চাচা, শোন তবে—দাদু আর দাদীমার যখন মনিকে নিয়ে ভীষণ ঝগড়া তখন তুমি পালিয়ে গেছো সের্থান থেকে। ভয়ে তুমি গিয়ে লুকিয়েছো ধানের গোলার নিচে। না জানি তোমার ভাগ্যে কি আছে তাই গোলার নিচে বসে বসে ভাবছো। হঠাৎ একটা ফোঁস ফোঁস শব্দ কানে যেতেই তুমি চমকে উঠেছিলে, পিছন ফিরে দেখো মস্তবড় একটা সাপ। তুমি না পারছো চিৎকার করতে না পারছো বেরিয়ে আসতে। সাপটা এগিয়ে আসছে তোমার দিকে। তুমি চোখ বন্ধ করে খোদার নাম স্মরণ করছো। তারপর তুমি নাকি দেখতে পাচ্ছো কোথায় সাপ, মনি হামাগুড়ি দিয়ে আসছে তোমার দিকে, তারপর এসে মনি তোমার গলা জড়িয়ে ধরলো দু'হাত দিয়ে। তারপর তোমার যখন হুশ হলো দেখলে সাপটা জড়িয়ে আছে তোমার গলায়.....

সর্বনাশ, তারপর কি হলো?

মালেক চাচা, তারপর কি হলো তুমি বলো? সেই বাকি কাহিনীটুকু শোনার জন্যই তো আমি.....

মালেকবেশী বনহর ভুলেই গিয়েছিলো সে পুত্রের সম্মুখে পুরোন চাকর মালেকের ভূমিকায় অভিনয় করছে। তাড়াতাড়ি নিজকে সামলে নিয়ে বলে বনহর—হাঁ, এবার সব মনে পড়ছে, সাপটা গলায় জড়িয়ে ধরার সঙ্গে সঙ্গে

আমি আবার অজ্ঞান হয়ে পড়েছিলাম। যখন আবার হুশ হলো তখন দেখলাম বাড়ির সবাই আমাকে ঘিরে দাঁড়িয়ে আছে আর মাথায় পানি ঢালছে একজন চাকর। চাকরটা আমাকে বড় ভালবাসতো।

তোমার জ্ঞান ফিরলে সাপটাকে আর বুঝি দেখতে পাওনি?

হাঁ, হাঁ, পেয়েছিলাম, সেকি মস্তবড় সাপ! যেমন কালো তেমনি মোটা।

সাপটাকে ওরা মেরে ফেলেছিলো?

তা তো বটেই, এতবড় সাপটাকে কি জীবন্ত রাখা যায়? চলো নূর, এবার ঘুমাবে চলো।

পাশের কামরা থেকে ভেসে আসছিলো তখন সরকার সাহেবের নামাজ পড়ার শব্দ। তিনি ছুরা পাঠ করছিলেন।

নূর বললো—আচ্ছা চলো মালেক চাচা। উঠে দাঁড়ালো নূর।

মালেক চাচাও উঠে পড়লো।

বজরার সিঁড়ি দিয়ে নামবার সময় মালেক মিয়া নূরের হাত ধরে নামিয়ে নিলো নিচে।

যে কামরায় সরকার সাহেব নামাজ আদায় করছিলেন সেই কামরায় নূরের বিছানা পাতা ছিলো। মালেক মিয়া নূরকে শুইয়ে দিয়ে ওরা পা মাথায় হাত বুলিয়ে দেয়।

অল্পক্ষণে ঘুমিয়ে পড়ে নূর।

সরকার সাহেবের ততক্ষণে নামাজ শেষ হয়ে এসেছিলো, তিনি মোনাজাত করে জায়নামাজ ত্যাগ করলেন।

মালেকবেশী দস্যু বনহর ততক্ষণে নূরের পাশে মেঝেতে শুয়ে পড়লো।

সরকার সাহেব বললেন—বজরা এখন কতদূর রে মালেক?

শুয়ে পড়ে শরীরে চাদরচাপা দিতে দিতে বলে মালেক মিয়া—বজরা এখন রসুলপুর গ্রাম ছেড়ে ঝিদের গ্রামের পাশ দিয়ে চলেছে।

সরকার সাহেব দরজা বন্ধ করে বিছানায় এসে দেহটা এলিয়ে দিলেন, তারপর চললো কিছুক্ষণ সরকার সাহেব আর মালেক মিয়ার মধ্যে কথাবার্তার পালা।

তারপর একসময় সরকার সাহেব ঘুমিয়ে পড়লেন। তিনি বড় ক্লান্ত অবসন্ন হয়ে পড়েছিলেন—বৃদ্ধ মানুষ, সমস্ত দিন এতটুকু বিশ্রাম হয়নি তাঁর। দাঁড় টানার ঝুপঝাপ শব্দ হচ্ছে।

বজরার ছাদের বেলোয়াড়ী ঝারে দুলছে মোমবাতিগুলো।

মনিরা নিশুপ পড়ে রইলেও সে ঘুমায়নি, অবশ্য চোখ দুটো তার যদিও বন্ধ ছিলো। সে যতক্ষণ মালেকবেশী তার স্বামীর কণ্ঠস্বর শুনতে পাচ্ছিলো ততক্ষণ কান পেতে কথাগুলো শোনার চেষ্টা করছিলো। মনিরা কিন্তু জানে, নূরকে কোনোরকমে ভুলিয়ে সময় কাটানোর অবসর খুঁজে নিচ্ছে তার স্বামী।

মনিরার চিন্তা অবশ্য মিথ্যা নয়, মালেকবেশী বনহর চায় ধীরে ধীরে রাত বেড়ে আসুক, সরকার সাহেব শয়্যায় দেহটা এলিয়ে দিক এবং নূর ততক্ষণে গল্প শুনতে শুনতে বার বার হাই তুলুক। সরকার সাহেবের নামাজ পাঠের শব্দ বন্ধ হয়ে যাবার পূর্বেই মালেক মিয়াও নূরের কথাবার্তা খেমে গিয়েছিলো। শোনা গিয়েছিলো সিঁড়ির ধাপে নূর ও মালেকের পায়ের শব্দ। মনিরা বুঝতে পেরেছিলো ওদের গল্প বলা শেষ হয়ে গেছে। মনিরার বুকটা টিপ টিপ করে উঠেছিলো—ভয়ে নয় আনন্দে, একটা দীপ্ত বাসনায়। নূর ও সরকার সাহেব ঘুমিয়ে পড়লেই আসবে ও।

বেশ কিছুক্ষণ কেটে গেলো।

উন্মুখ হৃদয় নিয়ে অপেক্ষা করছে মনিরা। উজ্জ্বল জলরাশির কলকল আওয়াজ চিরে মাঝে মাঝে শোনা যাচ্ছে দূরে নদীতীরস্থ কোনো ধানক্ষেত থেকে খেঁক শিয়ালীর চিৎকার।

হঠাৎ দরজা খুলে গেলো।

মনিরার বুকের মধ্যে এক ঝলক উষ্ণ রক্ত ছাড়া করে ছড়িয়ে পড়লো। আনন্দ উচ্ছলতায় মনটা তার যেন ভরে উঠলো নিমিশে—এবার এসেছে সে।

মনিরা চোখ না মেলে ঘুমের ভান করে পড়ে রইলো চুপচাপ।

পদশব্দ এগিয়ে আসছে।

মনিরার নিঃশ্বাস দ্রুত বইছে, এগিয়ে আসছে ও। ওর নিঃশ্বাসের শব্দ স্পষ্ট শুনতে পাচ্ছে সে। একটা শিহরণ অনুভব করছে ভিতরে ভিতরে

মনিরা। যদিও মনিরা আজ ক'দিন একান্ত পাশেই পেয়ে এসেছে স্বামীকে, তবু তাকে পাশে পাওয়ার অনাবিল উচ্ছ্বাসকে সে দমন করতে পারছে না এ মুহূর্তে।

পাশে এসে বসলো মালেক বেশী বনহর। তার দেহে যদিও মালেকের পোশাক এখনও ছিলো কিন্তু দাঁড়ি ছিলো না তার মুখে, গৌফও নয়। সুন্দর পৌরুষদীপ্ত একটি মুখ।

মুখখানা ধীরে ধীরে নেমে এলো মনিরার মুখের উপর, চাপাকঠে ডাকলো—মনিরা উঠো.....

চোখ মেললো মনিরা—উঁ বলো?

ঘুমিয়ে পড়েছিলে?

না।

সত্যি?

হাঁ, তুমি আছো বজরায় আমি ঘুমোতে পারি? ওগো, এমনি করে কতক্ষণ তুমি থাকবে আমাদের পাশে পাশে?

যতক্ষণ কান্দাই শহরে সন্নিহিত বজরা খানা না পৌছবে।

তুমি নেমে যাবে পথের মাঝে?

তা ছাড়া উপায় কি বলো?

না, তা হবে না।

কিন্তু তুমি তো জানো, হীরাঝিলে, ইরামতি তীরে বজরা নোঙ্গর করার সঙ্গে সঙ্গে পুলিশ মহলের গোয়েন্দা বিভাগ সবার অলক্ষে এসে হাজির হবে, এমন কি তাদের দলে মিঃ জাফরী থাকাটাও কিছু বিস্ময়কর হবে না। তাই আমি চাই হীরাঝিল পৌছবার পূর্ব মুহূর্তে আমি নেমে যাবো।

যত সহজ তুমি ভাবছো তত সহজ হবে কি তোমার নেমে যাওয়াটা?

কেন হবে না, নূর এবং সরকার সাহেবকে বলে আমি নেমে যাবো।

তারা যদি তখন আপত্তি করে বসে?

জানি আপত্তি তারা করবে কিন্তু আমাকে একটা পথ বেছে নিতে হবে। অবশ্য মালেক মিয়ার কোনো এক আত্মীয়ের বাড়িছিলো হীরাঝিলের সন্নিহিত হাজারা গ্রামে। বাস্ আমি হাজারায় নেমে যাবো, কেমন?

তারপর কবে আবার দেখা পাবো তোমার?

যেদিন তুমি স্বরণ করবে।

মনিরা স্বামীর জামার আস্তিন চেপে ধরে দু'হাতের মুঠায়—সত্যি চলছে আমি যখন তোমাকে স্বরণ করবো তখনই আসবে তো?

হাঁ, নিশ্চয়ই আসবে।

যদি না আসো?

শাস্তি দিও।

মনে থাকে যেন।

থাকবে।

ওগো, ভেবেছিলাম ক'দিন তোমাকে নিয়ে গ্রামের বাড়িতে নিশ্চিন্তে কাটাবো। শহরের আকাশে চাঁদ কোনোদিন নজরে পড়ে না, তাই প্রাণভরে জ্যোৎস্নার আলো দেখবো। মুক্ত বাতাস পাই না শহরে, শুধু ফ্যানের হাওয়া—উঃ একেবারে প্রাণভরে আমরা নিশ্বাস নেবো, কিন্তু.....একটা দীর্ঘশ্বাস ত্যাগ করে আবার বলে মনিরা—সব আশা আমার ব্যর্থ হয়ে গেলো।

বনহর ওকে নিবিড় আলিঙ্গনে আবদ্ধ করে বলে—কোনো দুঃখ করো না, সব আশা তোমার পূর্ণ হবে মনিরা।

কিন্তু কবে? কবে সেদিন আসবে আমার জীবনে বলতে পারো তুমি? কবে কোনদিন আমরা দু'জন সুন্দর এক সংসার গড়ে তুলবো?

ধীরে ধীরে বনহর আনমনা হয়ে যায়।

মনিরা বলে—কি ভাবছো?

ভাবছি কোনোদিন তোমার এ সাধ পূর্ণ হবে কি না তাই...

এমন সময় হঠাৎ মাঝিদের তীব্র চিৎকার শোনা গেলো। সঙ্গে সঙ্গে বজরাখানা দুলে উঠলো ভীষণভাবে।

মনিরা ব্যস্তকণ্ঠে বললো—সর্বনাশ, নিশ্চয়ই কোনো বিপদ ঘটেছে.....

বনহর মুহূর্ত বিলম্ব না করে উঠে দাঁড়ালো। ওদিকে টেবিলে দাড়ি-গোঁফ খুলে রেখেছিলো, সে দ্রুত হস্তে পরে নিলো, তারপর ক্ষিপ্ৰগতিতে বেরিয়ে গেলো।

দাড়ি-গোঁফ ঠিক মত করে নিতে বনহরের সামান্য একটু বিলম্ব হয়ে গিয়েছিলো, বাইরে বেরিয়ে আসতেই সে দেখতে পেলো একদল ডাকাত লাঠিসোটা হাতে তাদের বজরায় হামলা চালিয়েছে। একবার বনহর তাকিয়ে দেখে নিলো তার সরকার সাহেবকে আটক করে করে তার কাছে টাকাকড়ি চাইছে, পাশে নূর দাঁড়িয়ে আছে, তার চোখে মুখে বিস্ময় আর উত্তেজনার ছাপ।

মালেক মিয়াকে আসতে দেখে নূর চিৎকার করে বললো—মালেক চাচা ডাকাত.....ডাকাত.....।

মালেক মিয়া পিছন থেকে একজনকে চেপে ধরে এবং সঙ্গে সঙ্গে প্রচণ্ড একটা ঘুষি বসিয়ে দেয় তার চোয়ালে। বলিষ্ঠ লোকটা হুমড়ি খেয়ে পড়ে গেলো। অপর একজন ডাকাত মালেক মিয়াকে আক্রমণ করলে একটা বিরাট শক্ত লাঠি তুলে ধরলো সে মালেক মিয়ার মাথায়।

বিদ্যুৎ গতিতে মালেক মিয়া ফিরে দাঁড়ালো এবং ধরে ফেললো লাঠিখানা। ডাকাতটা কিছুতেই তার লাঠিখানা মালেক মিয়ার হাত থেকে কেড়ে নিতে সক্ষম হলো না।

মালেক মিয়া লাঠিখানা এক ঝটকায় কেড়ে নিয়ে ভীষণভাবে আক্রমণ করলো ডাকাতদলকে। এক এক আঘাতে এক একজন ডাকাত ঘায়েল হলো—কারও মাথা ফেটে রক্ত ঝরলো, কারও হাত ভাঙলো কারও পা ভাঙলো যে যেদিকে পারলো ইরামতির বুকে ঝাঁপিয়ে পড়লো।

কয়েক মিনিটের মধ্যেই ডাকাতদল বজরা থেকে উধাও হলো। মালেক মিয়াকে জড়িয়ে ধরলো নূর—মালেক চাচা, তুমি এতবড় শক্তিশালী! সত্যি, তুমি না থাকলে কি যে হতো মালেক চাচা.....

সরকার সাহেবের কিন্তু দু'চোখে বিস্ময় ঝরে পড়ছে, তিনি অবাক হয়ে তাকিয়ে আছেন মালেক মিয়ার দিকে। কি করে এ সম্ভব হলো? মালেক কি করে এতগুলো ডাকাতকে এক একটিমাত্র লাঠির দ্বারা কাবু করে ফেললো। হঠাৎ সরকার সাহেবের মুখমণ্ডল দীপ্তময় হলো, তিনি মৃদু হাসলেন।

ততক্ষণে নূর মালেককে জড়িয়ে ধরেছে—মালেক চাচা, তুমি যদি এ সময় না থাকতে তাহলে আমাদের কি অবস্থা হতো। ছুটে যায় সে মায়ের পাশে—আম্মি আম্মি, তুমি এখনও এ কামরায় বসে আছো! জানো আম্মি, মালেক চাচা একাই দশ বারো জন ডাকাতকে কাবু করে বিদায় করেছে.....

মনিরা কিন্তু কামরার দরজায় দাঁড়িয়ে এতক্ষণ সব দেখছিলো, সে যখন দেখলো নূর তার কামরার দিকে আসছে তখন সে বিছানায় এসে বসেছিলো।

নূরের কথায় মনিরা অবাক কণ্ঠে বললো—সত্যি তোমার মালেক চাচা ডাকাত গুলোকে একাই কাবু করে ফেলেছিলো?

হাঁ আম্মি, তুমি যদি মালেক চাচার অসীম বীরত্ব দেখতে তাহলে স্তম্ভিত হয়ে যেতে।

তাই তো, ভাগ্যিস তোমার মালেক চাচা বজরায় ছিলো। এ আমাদের পরম সৌভাগ্য বলতে হবে.....

এসো আম্মি, মালেক চাচার কাছে যাই।

চলো।

নূর আর মনিরা বেরিয়ে এলো কামরার ভিতর থেকে।

মালেক তখন মাঝিদের বলছে তাঁড়াতাড়ি বজরাখানাকে স্রোতের দিকে এগিয়ে নিতে। ঐ দিকে গেলে বজরাখানা আপনা আপনি স্রোতের টানে দ্রুত ভেসে চলবে। তখন ডাকাতদল তাদের বজরার আর কোনো ক্ষতি সাধন করতে পারবে না।

মালেক মিয়া নিজে গিয়ে হাল ধরলো।

নূরের বিশ্বাস যেন বাড়ছে, তার মালেক চাচার কত দক্ষতা।

অল্পক্ষণেই স্রোতের মুখে এসে পড়লো বজরাখানা। ভীষণ এক চঞ দিয়ে সা সা করে ছুটলো। এবার মাঝিরা দ্রুতহস্তে দাঁড় তুলে বেঁধে ফেললো।

সরকার সাহেব বললেন—নূর ইনশাআল্লাহ আর কোনো ভয় নেই, বিপদ কেটে গেছে। চলো এবার ঘুমাতে চলো।

মনিরা বললো—হাঁ বাবা, যাও ঘুমাতে যাও। নিজে ও মনিরা কামরায় প্রবেশ করলো।

মনিরা কখন ঘুমিয়ে পড়েছে সে নিজেই বুঝতে পারে নি।

পাশের কামরায় সরকার সাহেব আর নূর অঘোরে ঘুমাচ্ছে।

মালেক মিয়া নিজে হাল ধরে বসে আছে, কারণ এখানে পানির স্রোত এত বেশি যে মাঝিদের হাতে বজরা দায়িত্বভার ছেড়ে দেবার সাহস হয়নি। ঘন্টায় তাদের বজরা পাঁচ মাইল বেগে ভেসে চলেছে। তীরবেগে ছুটছে বজরা খানা।

এক সময় ভোর হয়ে এলো।

মালিক মিয়া বজরাখানাকে স্রোত ছেড়ে শান্ত নদীপথে নিয়ে এলো। এখন আর সেই ডাকাডাকল বা অন্য কোনো দৃষ্টিকারী হামলা চালাতে সক্ষম হবে না। বিপদ কেটে গেছে, আর কোনো ভয় নেই। মালেক মিয়া মাঝিদের হাতে হাল ধরার দায়িত্বভার তুলে দিয়ে নেমে এলো বজরায়, আলগোছে সে প্রবেশ করলো মনিরার কামরায়।

পাশের জানালা দিয়ে ভোরের ঝিরঝিরে বাতাস এসে মনিরার এলোমেলো চুলগুলোকে আরও এলোমেলো করে দিচ্ছিলো। কয়েক গাছা চুল লুটোপুটি খাচ্ছিলো ওর কপালে।

বনহর কামরায় প্রবেশ করে ধীর মন্তর পদক্ষেপে এগিয়ে গেলো শয্যার পাশে। কিছুক্ষণ নির্নিমেষ নয়নে তাকিয়ে রইলো সে মনিরার মুখের দিকে, তারপর ঝুঁকে পড়ে ছোটো একটি চুম্বনরেখা ঐকে দিলো ওর চোঁটে। ঘুম ভেঙে যায় মনিরার। ভীষণভাবে চমকে উঠে চোখ মেলতেই স্বামীর সুন্দর দীপ্ত মুখখানার উপর নজর পড়ে। চোখ রগড়ে বলে মনিরা—ভারি দুষ্ট তুমি!

বনহর বসে পড়ে ওর পাশে। 'কপাল থেকে চুলগুলো সরিয়ে দিয়ে বলে—আর দুষ্টামি করবো না প্রিয়া, এবার বিদায় চাই.....

মনিরার চোখ দুটো ছলছল করে উঠে, বাষ্পরুদ্ধ কণ্ঠে বলে সে—না না, ও কথা বলো না।

কিন্তু হাজরা যে সে এসে গেছে?

তা আসুক.....মনিরা স্বামীর জামার কিছু অংশ হাতের মুঠায় চেপে ধরে।

বনহর বলে—ভোর হয়ে গেছে। অল্পক্ষণের মধ্যেই বজরা হীরামিলের অদূরে ইরামতি ঘাটে পৌছে যাবে। সেখানে ছদ্মবেশে অপেক্ষা করেছে গোয়েন্দা পুলিশ বিভাগের লোক, কাজেই আমাকে যেতে হবে এবার।

মনিরার দু'চোখ ছাপিয়ে পানি এসে যায়, মলিন বিমর্ষ হয়ে উঠে তার মুখমণ্ডল, ব্যথাকাতর চোখে তাকায় সে বনহরের মুখের দিকে।

বনহর বুঝতে পারে তাকে বিদায় জানাতে মনিরার কত কষ্ট হচ্ছে তবু তাকে যেতে হবে, না গিয়ে কোনো উপায় নেই। বনহর মনিরার চিবুকটা তুলে ধরে বলে—রাগ করোনা লক্ষ্মীটি ঠিক আবার আসবো।

মনিরা বাষ্পরুদ্ধ কণ্ঠে বললো—এসো.....

বনহর ড্রেসিং টেবিলের সম্মুখে দাঁড়িয়ে দ্রুত দাঁড়ি-গোঁফ পরে নিলো তারপর ফিরে তাকালো মনিরার দিকে। মনিরার গভ্র বেয়ে গড়িয়ে পড়ছিলো অশ্রুধারা। অশ্রুট কণ্ঠে বললো—খোদা হাফেজ!

বনহর ততক্ষণে কামরার বাইরে বেরিয়ে গেছে। সরকার সাহেব আর নূর সবে বাইরে এসে দাঁড়িয়েছে। মালেক মিয়া বললো—সরকার সাহেব, এখানে হাজরায় আমার বাড়ি, আমি নেমে যেতে চাই? কয়েকদিন দেশের বাড়িতে কাটিয়ে ফিরে যাবো মধুপুর গ্রামে।

সরকার সাহেব একটা দীর্ঘশ্বাস ত্যাগ করে বললেন—এখানেই নেমে যাবে তুমি?

হাঁ, অনেক দিন বাড়ি আসিনি কিনা।

নূর বললো—মালেক চাচা, তুমি কান্দাই আমাদের বাড়ি যাবেনা?

এবার নয়, এরপর আর একবার যাবো। নূর, চলি বাবা।

আচ্ছা, এসো মালেক চাচা।

বজরা হাজরা গ্রামের একটি ঘাটে এসে লাগলো।

মালেক মিয়া তার ছোট্ট পুঁটলিটা নিয়ে নেমে গেলো সেখানে।

নূর আর সরকার সাহেব হাত নাড়তে লাগলো। মালেকের চোখ দুটো চলে গেলো বজরার পাশের জানালায়, সে দেখলো অশ্রু ছলছল দুটি চোখ তাকিয়ে আছে তার দিকে।

বজরাখানা যতক্ষণ দেখা গেলো মালেক মিয়া একদৃষ্টে তাকিয়ে রইলো সেদিকে।

বজরার কিনারে দাঁড়িয়ে আছে নূর আর সরকার সাহেব। ধীরে ধীরে দূরে অনেক দূরে চলে গেলো বজরাখানা। তখনও মালেক মিয়া তাকিয়ে আছে সেদিকে।

হঠাৎ কে যেন কথা বললো—ওরা তোমাকে নামিয়ে দিয়ে গেলো কেন?

চমকে ফিরে তাকালো বনহর, দেখলো একটি গ্রাম্য বধু কলসী কাঁখে দাঁড়িয়ে আছে তার পিছনে। ওর পা থেকে মাথা পর্যন্ত দৃষ্টি বুলিয়ে নিয়ে বললো—ওরা আমাকে নামিয়ে দিয়ে গেলো, সঙ্গে নিলে বিপদের সম্ভাবনা আছে তাই।

তোমার কেউ নেই বুঝি?

না, হাজরায় আমার কেউ নেই।

তবে কোথায় যাবে?

জানি না।

তুমি জানো কোথায় যাবে?

না?

বুড়ো মানুষ, আহা বড় কষ্ট হবে তোমার! ওরা বড় নিষ্ঠুর তাই তোমাকে ওরা নামিয়ে দিলো। শোন, তুমি যাবে আমার সঙ্গে?

নিয়ে যাবে আমাকে?

হাঁ কিন্তু.....বধুর মুখখানা ম্লান হয়ে আসে। একটু ভেবে বলে—
আমার শ্বশুর খুব রাগী মানুষ, তাই ভাবছি.....

কিছু ভাবতে হবে না, আমি তাকে ঠিক করে নেবো। আপাতত একটু আশ্রয় আমার প্রয়োজন।

বেশ, চলো তোমাকে আমি নিয়ে যাবো। একটু দাঁড়াও, কলসীটায় পানি ভরে আনি।

তুমি আমাকে কলসী দাও, আমি পানি ভরে আনছি। বললো মালেকবেশী বনহর।

বধু বললো—তুমি বুড়ো মানুষ, পারবে না। আমার অভ্যাস আছে, রোজ ঘাট থেকে পানি আমাকেই বয়ে নিয়ে যেতে হয়।

মালেক মিয়া বলে উঠলো—রোজ তুমি পানি বয়ে নিয়ে যাও, আজ না হয় আমিই বইলাম। দাও, কলসীটা আমাকে দাও।

বধু কলসীটা মালেক মিয়ার হাতে দিলো।

মালেক মিয়া কলসীটা নদী থেকে ভরে নিয়ে ফিরে এলো, তারপর বললো—চলো।

বধু ওকে পথ দেখিয়ে নিয়ে চললো। দু'পাশে ধান আর গমের ক্ষেত। সোনালী ফসলে চারদিকে যেন সোনা ছড়িয়ে আছে। আলপথ ধরে এগুচ্ছে ওরা।

ভোরের বাতাসে ধান আর গমশিষগুলো দুলে দুলে যেন তাদের অভিনন্দন জানাচ্ছে।

পাশ কেটে চলে গেলো দু'একজন চাষী, তারা লাঙ্গল যোয়াল কাঁদে নিয়ে মাঠে যাচ্ছে জমি চাষ করতে। গরুগুলোকে সাবধানে ওরা তাড়িয়ে নিয়ে যাচ্ছিলো যেন পাকা ধানে মুখ না লাগায়।

এগিয়ে এলো কয়েকজন পল্লীবধু, তাদের কাঁখেও কলসী। মালেক মিয়া আর বধুটিকে দেখে ওরা থেমে পড়লো অবাক কণ্ঠে বললো একজন—হাবলুর বৌ তোমার সঙ্গে ওটা কে?

বধু বললো—নদীর ঘাটে ওকে কুড়িয়ে পেয়েছি। এ গ্রামে ওর কেউ নেই কিনা তাই নিয়ে যাচ্ছি.....

বধুর দল কেমন যেন চিন্তিত হলো।

একজন বধু বললো—নিয়ে তো যাচ্ছে কিন্তু তোমার স্বস্তর যা মানুষ, ওকে যেতে দেবে কি?

আর একজন বললো—আছে অনেক কিন্তু একটা চাকর পর্যন্ত রাখবে না ঘরে, যা হাড় কিপ্টে মানুষ।

পাশ কেটে চলে গেলো ওরা।

হাবলুর বৌ আবার অগ্রসর হলো।

মালেক মিয়া কলসী কাঁধে তাকে অনুসরণ করলো।

আর কিছুটা এগুতেই নজরে পড়লো কিছুদূরে একটি বিরাট বাড়ির চালা।

হাবলুর বৌ ঘোমটা ঠিকমত মাথায় টেনে দিয়ে বললো—ঐ যে দেখা যাচ্ছে, ওটা আমার স্বস্তরবাড়ি।

মালেক মিয়া বললো—তোমার স্বস্তর বুঝি খুব বড়লোক?

হাঁ খুব বড়লোক মানে অনেক টাকা পয়সা আছে আমার স্বস্তরের। অনেক ধনদৌলত আছে কিন্তু.....

থামলে কেন?

কিন্তু বড় কৃপণ হাড়কিপ্টে তা ছাড়া আরও কিছু আছে যা কার কাছে বলা যায় না।

মালেক মিয়ার চোখ দুটো জ্বলে উঠলো, বললো সে— কি এমন কথা যা বলা যায় না? আমি বুড়ো মানুষ, তা ছাড়া বিদেশী, আমাকে বললে কিছু হবে না। আমি তো আর কাউকে বলবো না।

তা ঠিক, তুমি আর কাকে বলতে যাবে, এ গ্রামে তোমার তো আর কেউ নেই।

না, আমার কেউ নেই, কোনো কথা আমি কাউকে বলবো না।

হাবলুর বৌ বললো—আমার স্বস্তর শত গ্রামের প্রধান, তা ছাড়া সরকারের লোকের সঙ্গে তার খুব খাতির আছে।

সে তো খুব ভাল কথা।

হাঁ, সরকারের লোক মাঝে মাঝে গ্রামে আসে, আমার শ্বশুরের সঙ্গে কি সব কথাবার্তা হয়। তারপর ট্রাক বোঝাই হয়ে জিনিসপত্র আসে, সেই সব জিনিস ট্রাকের ড্রাইভার লোক জন দিয়ে নামিয়ে দিয়ে যায়।

তারপর?

ঘরভর্তি হয়ে যায় জিনিস দিয়ে। শ্বশুর তালাবন্ধ করে রাখেন, তারপর আবার ট্রাক আসে লোকও আসে ট্রাকের সঙ্গে। বৈঠকখানা ঘরে বসে চাপাগলায় কি সব কথা-বার্তা হয় তাদের মধ্যে, তারপর অনেক রাতে মালগুলো আবার ট্রাকভর্তি হয় এবং কোথায় চলে যায় কে জানে। শ্বশুর সবাইকে বলে দিয়েছে, বাড়ির এ সব কথা যেন কেউ কাউকে না বলে দেয়।

ঠিক কথাই বলেছেন তোমার শ্বশুর সাহেব, বাড়ির কথা কাউকে বলতে নেই! আমি বুড়ো মানুষ, তা হাজারি গ্রামে আমার কেইবা আছে।

হাঁ, তাইতো তোমাকে এসব কথা বললাম। তুমি তো বলবে না জানি। দেখো তোমাকে দেখলে ঠিক আমার দাদুর কথা মনে হয়। আমার দাদু খুব ভাল মানুষ ছিলেন। তিনি সাত গাঁয়ের মাতব্বর ছিলেন না, বটে, তবু সাত গাঁয়ের মানুষ তাকে ভালবাসতো। আমার দাদু গ্রামের লোকদের উপকার করতো। নিজের যা কিছু থাকতো তাই দিয়ে গরিব মানুষদের বাঁচাতো। একবার দেশে দুর্ভিক্ষ দেখা দিয়েছিলো, গ্রামের মানুষ না খেয়ে মরছে। চারিদিকে হাহাকার, দাদু গ্রামের মানুষের কষ্ট সহ্য করতে না পেরে পাশের গ্রাম হাজারি মাতব্বর এখন যিনি আমার শ্বশুর তার কাছে কিছু টাকা কর্জ করে নিয়ে গিয়ে গ্রামের লোকদের দিয়েছিলেন। একটা দীর্ঘশ্বাস ত্যাগ করলো হাবলুর বৌ, তারপর আবার বলতে শুরু করলো—সেই ঋণ দাদু শোধ করতে না পেরে পা পর্যন্ত ধরে ছিলেন হাজারি মাতব্বরের কিন্তু তিনি সেই টাকা মাফ করেননি। টাকার পরিবর্তে হাজারি মাতব্বরের তার পাগল ছেলের সঙ্গে আমার বিয়ে দেওয়ার প্রস্তাব দিয়েছিলেন। দাদু অসহায়, কাজেই অমত করতে পারেন নি...

বলো কি, তোমার স্বামী পাগল?

মালেক মিয়ার কথায় চোক দুটো ছলছল করে উঠে হাবলুর বৌয়ের, চাপা গলায় বলে—হাঁ! শুধু পাগল নয়, সে বোবা.....বাপ্পরুদ্ধ হয়ে আসে তার কণ্ঠ ।

মালেক মিয়া চলতে চলতে থেমে গিয়েছিলো । ফিরে তাকালো সে হাবলুর বৌয়ের দিকে । গ্রাম্য বধু হলেও হাবলুর বৌয়ের সৌন্দর্য কম ছিলো না । কাজল কালো ডাগর-ডাগর দুটি চোখ, একজোড়া সুন্দর ভ্রু উন্নত নাসিকা ফিকা গোলাপী দুটি ওষ্ঠদ্বয় । দেহের কানায় কানায় যৌবন যেন তার উছলে পড়ছে । সাধারণ অল্প পয়সার শাড়িখানা যেন তার রূপরাশিকে আরও অপরূপ করে তুলেছে । অস্ফুট কণ্ঠে বললো মালেক মিয়া—সামান্য ক'টা টাকার বিনিময়ে তোমাকে তোমার দাদু একটা বদ্ধ পাংগলের হাতে সঁপে দিয়েছিলো, বলো কি?

এ ছাড়া দাদুর কোনো উপায় ছিলো না ।

মালেক মিয়া চলতে শুরু করলো ।

নীরবে এগুচ্ছে ওরা দু'জন ।

মালেক মিয়া ভাবছে হাবলুর বৌয়ের ভবিষ্যৎ নিয়ে । এই মেয়েটির জীবন কি সত্যি ব্যর্থ হয়ে যাবে? এমন সুন্দর একটি জীবন.....কিন্তু এখন বেশি ভাববার সময় নেই, প্রায় তারা বিরাট বাড়িখানার সন্নিহিতে পৌঁছে গেছে । এবার মালেক মিয়া বললো—তোমার স্বশুর সাহেবের নামটাতো বললে না বাছা, তার নাম কি?

স্বশুরের নাম ধরতে নেই তা বুঝি জানোনা? চলো তার নাম আপনা আপনি জানতে পারবে ।

মালেক মিয়া বুঝতে পারলো বধু কিছুতেই স্বশুরের নাম মুখে আনবে না, কাজেই বধুর মুখে স্বশুরের নাম শোনার আশা ত্যাগ করলো সে ।

বিরাট বাড়িখানার উঁচু প্রাঙ্গণ । একটা বড় গাছের ছায়ায় চেয়ার নিয়ে বসে আছে একটি ভুড়িওয়ালা লোক । মুখে একমুখ চাপদাড়ি । মাথায় তেল চকচকে বাব্রী চুল, তার উপরে তাল আঁশের টুপি । চোখে সুরমা, পানের

রসে দাঁতগুলো লাল টকটকে। পরনে পাজামা, গায়ে মাতব্বর লোকদের মত শেরোয়ানী।

মালেক মিয়া একনজর দেখে নিলো হাবলুর বৌয়ের স্বস্তর সাহেবকে।

স্বস্তর সাহেব তামাক সেবন করছিলেন। হঠাৎ বৌমা ও তার সঙ্গীটির উপর নজর পড়ে, হুকোটা রেখে উঠে দাঁড়ালেন, দু'চোখে বিশ্বয় আর ত্রুদ ভাব নিয়ে বললেন—তোমার সঙ্গে ও লোকটা কে? এর পূর্বে তো ওকে কোনো দিন দেখিনি? কথা বলার সঙ্গে অকুণ্ঠিত হয়ে উঠে ছিলো তার।

হাবলুর বৌ ভয়কম্পিত কণ্ঠে বললো—এর কেউ নেই তাই...

তাই ওকে দরদ দেখিয়ে সঙ্গে নিয়ে এসেছো?

হাঁ বাবা, ও আমাদের বাড়িতে কাজ করতে চায়, বড় ভাল মানুষ। আমাকে পানির কলসীটা বয়ে আনতে দিলো না।

হয়েছে থামো। নিজের বাড়ির মানুষকেই খাওয়াতে পারছি না, আবার কাজের লোক! কি কাজ আছে আমার বাড়িতে? গরু আছে মাত্র দুই কুড়ি—তার গোবর তোলা, খড় খাওয়ানো, গোয়েলে গরু তোলা—এসব তো হাবলুই করে, তবে মাঝে মাঝে যা দু'চার দিন তোমাকে করতে হয়। অবশ্য ওর যখন মতলব ঠিক থাকে না তখন। লোক দিয়ে কি হবে শুনি, একরাশ ভাত গিলবে তারপর আবার মাইনে চাইবে।

এবার বলে উঠে মালেক মিয়া—মাইনে লাগবে না, শুধু চারটি খেতে দেবেন।

হাবলুর বৌ বলে—দেখেছেন বাবা, ও মাইনে নেবে না বড় ভাল মানুষ। চারটি খাবে আর কাজ করবে।

চশমার ফাঁকে দৃষ্টি নিষ্ক্ষেপ করেন আবার মাতব্বর সাহেব। মালেক মিয়ার পা থেকে মাথা পর্যন্ত দেখে নিয়ে বলেন—বুড়ো হয়েছে, পারবে তো কাজ করতে?

পারবো।

তবে যাও, কিন্তু মনে রেখো কিছু যেন চুরি করো না। যদি চুরি করেছে তো মরেছে। সব সময় আমার বাড়িতে পুলিশের লোক আসা-যাওয়া করে। আমি নিজেও কম নই, আমার নাম ইকরাম আলী মিয়া।

মালেক মিয়া আপন মনে নামটা একবার উচ্চারণ করে নিলো—
ইকরাম আলী মিয়া.....

হাবলুর বৌ বললো—এসো।

মালেক মিয়া তাকে অনুসরণ করলো।

অন্তঃপুরে প্রবেশ করতেই খেঁকিয়ে উঠলো এক নারীমূর্তি। নারীমূর্তি নয়, যেন একটি হস্তিনী, বিশাল বপু নিয়ে এলো। মুখে তার এক গাল পান, আংগুলের ডগায় চুন, ঝঙ্কার দিয়ে বললো—সঙ্গে ওটা কে? নিজে পারো না আর একজনকে দিয়ে পানি বয়ে এনেছো, বলি পয়সা টয়সা নেবে না তো?

হাবলুর বৌ ঢোক গিলে বললো—লোকটা বড় ভাল, ও আমাদের বাড়িতে কাজ করবে কোনো পয়সা নেবে না। শুধু চারটি খাবে এই যা।

বুঝেছি নিজের আরাম আয়েশের জন্যই ওকে ধরে এনেছো। তা হবে না, রোজ তোমাকে ঘাট থেকে পানি আনতেই হবে। তারপর মালেক মিয়ার দিকে তাকিয়ে বলে ইকরাম গৃহিনী—যাও, পানির কলসী ওখানে নামিয়ে রাখো। তোমাকে কোন্ কোন্ কাজ করতে হবে আমিই তা দেখিয়ে দিবো। এসো আমার সঙ্গে।

বিশাল বপু নিয়ে এগুলেন ইকরাম গৃহিনী, যেন একটি হস্তিনী এগিয়ে চলেছে। তাকে অনুসরণ করতে বাধ্য হয়েছে মালেক মিয়া।

হাবলুর বৌ ফ্যাল ফ্যাল করে তাকিয়ে রইলো।

চলতে চলতে পিছন ফিরে বললো ইকরাম গৃহিনী—বৌ, তোমার যা কাজ তুমি করোগে, আমি ওকে গোয়াল বাড়ি দেখিয়ে দিয়ে আসি। আজ হাবলুর শরীর ভাল নেই।

মালেক মিয়া এবার বুঝতে পারলো তাকে নিয়ে যাওয়া হচ্ছে গোয়ালবাড়িতে গোয়ালঘরগুলো পরিষ্কার করার জন্য। মনে মনে প্রমাদ গুলেও ঘাবড়ালোনা মালেক মিয়া।

গোয়ালে এসে মালেক মিয়ার চক্ষুস্থির। প্রায় চল্লিশটি গরু বাধা আছে সারিবদ্ধভাবে। স্থূপাকার গোবর আর খড়-কুটো। অনেক দিন অনেক কাজ করেছে মালেক মিয়া কিন্তু এমন কাজ তার ভাগ্যে জোটেনি এখনও। আজ সাত সকালে তার ভাগ্যে এই কাজ ছিলো.....

চিন্তাধারা বিচ্ছিন্ন হয়ে যায় ইকরাম গৃহিনীর কথায়, তিনি বলছেন— দেখো এসেছো যখন তখন ভাল করে কাজকর্ম করবে, নাহলে ঝেঁটিয়ে বিদায় করবো। এই যে গোয়ালঘর দেখছো, সব পরিষ্কার করে গোয়াল থেকে গরুগুলো উঠানে ঝুঁটিতে বাঁধবে, তারপর খড়ের পালা থেকে খড় খুলে খেতে দেবে, তারপর তুমি খেতে পাবে।

মালেক মিয়া শুধু ঘাড় কাৎ করে সম্মতি জানালো।

ইকরাম গৃহিনী চলে গেলেন অন্তঃপুরে।

হাঁফ ছেড়ে বাঁচলো মালেক মিয়া কিন্তু এত বড় গোয়াল বাড়ি সে কি করে পরিষ্কার করবে! এর চেয়ে তাকে মাটি কাটার কাজ দিলেও সে পুকুর খনন করতে পারতো। কিন্তু ভেবে তো আর কোনো উপায় হবে না, বিশালদেহী ইকরাম গৃহিনী এক্ষুণি এসে হাজির হবে।

মালেক মিয়া গোয়াল পরিষ্কারে মনোনিবেশ করলো। কোদাল দিয়ে ঝুড়িতে গোবর তুলে নিয়ে নির্দিষ্ট জায়গায় ফেলতে লাগলো সে। সমস্ত দেহ ওর ঘামে ভিজে চুপসে উঠলো। প্রায় ঘন্টা দুই লেগে গেলো গোয়াল বাড়ি পরিষ্কার করতে। এবার সে গরুগুলো উঠানে বাঁধতে গেলো, অমনি একটা অদ্ভুত শব্দ কানে এলো মালেক মিয়ার। ফিরে তাকিয়ে দেখে একটা এবড়ো থেবড়ো লোক এগিয়ে আসছে তার দিকে। পরনে লুঙ্গি কাঁধে গামছা লুঙ্গিটা একপাশে কিছু গুঁজে রেখেছে তাতে ওর হাঁটু পর্যন্ত নজরে আসছে। কেমন যেন একটু ঝুঁড়িয়ে ঝুঁড়িয়ে হাটছে, মুখ দিয়ে লালা গড়িয়ে পড়ছে। লোকটা গোষ্ঠানির মত অদ্ভুত শব্দ করে তাকে কি যেন সব বলছে।

মালেক মিয়া তখন শেষ গরুটা এনে ঝুঁটিতে বাঁধতে যাবে, ও এসে দড়ি সহ হাত চেপে ধরলো, তারপর বিকট শব্দে চিৎকার করতে লাগলো।

মালেক মিয়া তো অবাক, সে দড়ি সহ গরুটা ছেড়ে দিলো।

ততক্ষণে বিশাল বপু নিয়ে বেরিয়ে এসেছেন ইকরাম গৃহিনী? তিনি বলে উঠেন—হাবলু বাপ আমার সরে আয়। তোর শরীর খারাপ, আজ থেকে ঐ লোকই গোয়াল পরিষ্কার করবে।

জননীর কোমল বাক্য কানে গেলো কিনা হাবলুর বোঝা গেলো না তবে মা ইশারায় বুঝিয়ে দিলো আজ থেকে তাকে আর গোয়াল পরিষ্কার করতে হবে না। হাবলু মায়ের কথা বুঝলো, তারপর শান্ত হয়ে এঁ্যা এঁ্যা একটা অদ্ভুত শব্দ করতে করতে চলে গেলো।

মালেক মিয়া বুঝতে পারলো ঐ লোকটা অন্য কেউ নয়, হাবলু। এঁ্যা এঁ্যা শব্দটা তার খুশি হবার আয়োজন। হাবলু ভীষণ রেগে গিয়েছিলো তখন সে একটা গৌঁ গৌঁ আওয়াজ করছিলো। মালেক মিয়া ভাবছে ঐ বধুটির স্বামী দেবতাই হলো ঐ হাবাচাঁদ হাবলু মিয়া। হায় অদৃষ্ট বধুটির পাশে ওকে চিন্তা করা মানে আকাশ আর পাতাল যেমন নরক আর স্বর্গ.....আপন মনে হাসলো মালেক মিয়া, ব্যথাকরুণ সে হাসি।

সমস্ত দিন পরিশ্রম করে শরীরটা মালেক মিয়ার ক্লান্ত হয়ে পড়েছিলো। বিছানায় দেহটা এলিয়ে দেবার সঙ্গে সঙ্গে ঘুমে জড়িয়ে এসেছিলো তার চোখ দুটো। হঠাৎ মোটরের আওয়াজ কানে যেতেই চোখ মেললো সে কিছু ঘরখানা জমাট অন্ধকারে ভরা থাকায় ঘরের ভিতরে কিছু নজরে পড়লো না। ধীরে ধীরে শয্যা ত্যাগ করে উঠে দাঁড়ালো। যে ঘরখানায় মালেক মিয়াকে থাকতে দেওয়া হয়েছিলো সেই ঘরখানার পিছনে একটি ছোট জানালা ছিলো, ঐ জানালাপথে দৃষ্টি নিক্ষেপ করলো মালেক মিয়া বাইরের দিকে।

প্রথম নজরেই পড়লো লষ্ঠন হাতে দাঁড়িয়ে আছেন ইকরাম আলী মিয়া। লষ্ঠনটা তিনি বাম হস্তে উঁচু করে রেখে ডান হস্তের আংগুলে কিছু নির্দেশ দিচ্ছেন। বৈঠখানা ঘরের সম্মুখে একটি ট্রাক দাঁড়িয়ে আছে। ট্রাকখানা তখনও ত্রিপলে ঢাকা রয়েছে।

দু'জন লোক ট্রাকের উপরে বসে ত্রিপলের বাঁধন খুলে দিচ্ছে। দু'জন দাঁড়িয়ে আছে নিচে, তারা প্রতীক্ষা করছে মালগুলো নামিয়ে নেবে এবং এ কারণেই তারা অপেক্ষা করছে উদগ্রীব হয়ে।

মালেক মিয়ার চোখ দুটিতে শুধু বিষয় নয়, বিপুল জ্ঞানার বাসনা—ওতে কি আছে, কি মাল নামানো হবে এবং মালগুলো কোথা থেকে এসেছে। স্তব্ধ নিশ্বাসে প্রতীক্ষা করতে লাগলো সে।

ত্রিপল খুলে ফেলা হলো, দেখা গেলো এক একটা প্যাকেট রয়েছে, প্যাকেটগুলি বেশ বড় এবং তার এক একটি যে ভীষণ ভার তা নামানো কালেই স্পষ্ট বুঝা যাচ্ছে।

মালগুলো নামানোর সঙ্গে সঙ্গে বৈঠকখানা ঘরের ভিতরে নিয়ে যাওয়া হচ্ছে। কিন্তু যারা বৈঠকখানায় মাল বা বিরাট আকার প্যাকেট নিয়ে প্রবেশ করছে তারা চটপট বেরিয়ে আসছে না, বেশ সময় নিচ্ছে মালগুলো ভিতরে রেখে ফিরে আসতে।

প্রায় ঘন্টাকানেক লাগলো মালগুলো নামিয়ে রাখা শেষ হতে।

মালেক মিয়া দেখলো মাল নামানো শেষ হলে ইকরাম আলী মিয়া একটা কাগজে বোধ হয় কিছু লিখে নাম সহি করলো তারপর, কাগজটা ট্রাকের পাশে দাঁড়ানো একটি লোককে দিলেন।

লোকটা কাগজখানা লঠনের সম্মুখে নিয়ে দেখলো, তারপর ভাঁজ করে পকেটে রাখলো। ড্রাইভার গাড়িতে স্টার্ট দিতেই লোকটা উঠে বসলো ড্রাইভ আসনের পাশে।

গাড়ি চলে গেলো।

ইকরাম আলী মিয়া লঠন হাতে প্রবেশ করলো অন্তঃপুরে।

মালেক মিয়া ভাবতে লাগলো, হাবলুর বৌ বলেছিলো তার স্বপ্তরের সঙ্গে সরকারের লোকের যোগাযোগ আছে, গাড়ি আসে, গাড়িভর্তি মাল আসে। সে সব মাল আবার কোথায় চলে যায় কেউ জানে না। বাড়ির সবাই সাবধান আছে, এ কথা কাউকে তারা বলে না, বললে বিপদ আছে জানে তারা। এ সব গাড়ি রাতের অন্ধকার আসে, আবার রাতের অন্ধকারেই চলে

যায়। গ্রামের মানুষ বুঝতেই পারে না, আর পারলেই বা কি, কারও কোনো কথা বলার উপায় নেই।

গ্রামের মানুষ গভীর রাতে গাড়ির শব্দ শুনে পায়। ভোরে সবাই মোটরের চাকার দাগ লক্ষ্য করে কিন্তু কেউ কোনো কথা বলতে পারে না। তারা জানে—বুঝে সব তবু নীরব থাকে, কারণ ইকরাম আলী সম্বন্ধে কোনো কথা বলতে সাহসী নয় তারা।

মালেক মিয়া শয্যা গ্রহণ করে কিন্তু চোখে তার ঘুম আসে না। ইকরাম আলী মিয়ার কাজ তাকে ভীষণভাবে ভাবিয়ে তুলেছে। নিশ্চয়ই এমন কোনো জিনিস গাড়িতে এসেছে যা দিনের আলোতে প্রকাশ্যভাবে করা যায় না।

পর দিন ঘুম ভাঙতে একটু দেরী হয়ে গেছে, ইকরাম আলী মিয়ার কর্কশ কণ্ঠের আহ্বানে ঘুম ভেঙ্গে যায় মালেক মিয়ার। সে ধড় মড় উঠে বসে চোখ রগড়াতে শুরু করে। সমস্ত রাত তার ঘুম হয়নি, প্রথম রাতেই যা ঘুমিয়ে নিয়েছিলো সে। চোখ দুটো জ্বালা করছে তার। আরও কিছু ঘুমাতে পারলে শরীরটা অনেকখানি হাল্কা মনে হতো।

কিন্তু ঘুমাবার উপায় নেই, ইকরাম আলী মিয়া যা বক বক শুরু করেছেন—এত বেলা ধরে ঘুমালে কাজ হবে কখন? বৌয়ের কাজ ছিলো না, তাই সে ওকে সঙ্গে এনেছে, যত আলসে অপদার্থ ইত্যাদি নানা কথা।

মালেক মিয়া বেরিয়ে আসতেই ক্রুদ্ধ কণ্ঠে বললেন—ইকরাম আলী মিয়া বুড়ো হয়েছো তবু আক্কেল হয়নি? দুপুর বেলা গোয়াল থেকে গরু বের করবে নাকি। গোয়াল পরিষ্কার করবে কখন? আজ জমিতে লাঙ্গল নিতে যেতে হবে। এক নিঃশ্বাসে বললেন ইকরাম আলী মিয়া কথাগুলো।

মালেক মিয়া কোনো জবাব না দিয়ে চলে গেলো গোয়ালের দিকে। কাল থেকে আর একটিবার হাবলু বৌয়ের উপর তার নজর পড়েনি। বেচারী হাবলুর বৌ, ওর মুখখানা মনে পড়তেই মালেক মিয়ার বুকটা ব্যথায় টন টন করে উঠলো। নিজের অজ্ঞাতে চোখ দুটো তার চলে গেলো অন্তঃপুরের দিকে।

হঠাৎ মালেকের কানে এলো, ভিতর বাড়ি থেকে ভেসে আসছে ইকরাম গৃহিনীর গলার কঠিন কণ্ঠস্বর—এতোক্ষণ ঘাটে পানি আনতে যাওনি রান্নাবান্নার সময় হলে তখন তুমি ঘাটে যাবে। ও হবে না, আজও ভাবছো ঐ বুড়ো তোমাকে ঘাট থেকে পানি বয়ে এনে দেবে। ওকে আজ লাঙ্গল নিয়ে জমিতে পাঠানো হচ্ছে। শুধু গোয়াল পরিষ্কার করলেই ভাত পাওয়া যায় না। যতসব ঝঞ্ঝাট বয়ে এনেছে ঘরে। যাও কলসী নিয়ে ঘাটে পানি আনতে যাও, দশ কলসী পানি আনতে সময় লাগবে দশ ঘণ্টা, আজ তা হবে না বলে দিচ্ছি.....

মালেক মিয়া এরপর আর দাঁড়ালো না, সে চলে গেলো নিজের কাজে।

গোয়াল পরিষ্কার করবে বলে যেমন সে গরুর দড়িতে হাত দিয়েছে অমনি কোথা থেকে হস্তদন্ত হয়ে ছুটে এলো হাবলু। রাগে সে ফোঁস ফোঁস করছে, এক ঝটকায় মালেক মিয়ার হাত থেকে গরুর দড়ি কেড়ে নিয়ে দিলো এক ধাক্কা।

মালেক মিয়ার রাগ হলো, সেও এক ধাক্কা দিলো ওকে। সঙ্গে সঙ্গে হুমড়ি খেয়ে পড়ে গেলো হাবলু চাঁদ। তারপর গৌঁ গৌঁ করে কিছু গালমন্দ করতে লাগলো। মালেক মিয়া ভাবলো এখন যদি ওর স্নেহময়ী জননীর আর্বিভাব ঘটে তা হলে ভিষণ বিপদের সম্ভাবনা আছে, কাজেই মালেক মিয়া ওর হাত ধরে ওকে তুলে দাঁড় করিয়ে দিয়ে দড়িটা গুঁজে দিলো ওর হাতে, তারপর ইশারা করে দেখালো ওদিকের পিয়ারা গাছটা।

গাছে অনেকগুলো পাকা পিয়ারা দুলছে। হাবলু চাঁদের পেয়ারা গাছে নজর পড়তেই চুপ হয়ে গেলো। কাল মালেক মিয়া লক্ষ্য করেছিলো। হাবলু পেয়ারা গাছ থেকে পেয়ারা পাড়ার জন্য উঠেপড়ে চেষ্টা করছে কিন্তু কিছুতেই পেয়ারা পাড়তে পারছে না।

আজ মালেক মিয়া পেয়ারা গাছের দিকে আংগুল দিয়ে দেখিয়ে দিতেই হাবলু চুপ হয়ে গেলো। ইশারা করলো সে মালেক মিয়াকে পেয়ারা পেড়ে দেবার জন্য।

মালেক মিয়া বললো—দাঁড়াও আগে গোয়াল পরিষ্কার করে নেই তখন পেয়ারা পেড়ে দেবো।

হাবলু মালেক মিয়ার গরু বের করায় সাহায্য করতে লাগলো। মালেক মিয়া গোয়াল ঘর পরিষ্কারে লেগে গেলো।

এমন সময় নজরে পড়লো কলসী কাঁখে হাবলুর বৌ বেরিয়ে গেলো। মালেক মিয়া তখন কোদালে গোবর তুলছিলো, তার দৃষ্টির সঙ্গে দৃষ্টি বিনিময় হলো মালেক মিয়ার। বড় অসহায় করুণ লাগলো হাবলুর বৌকে।

হাবলুর বৌ চলে যেতেই ফিরে তাকালো মালেক মিয়া হাবলুর দিকে। হাবলু বৌকে দেখে দাঁত বের করে হাসছে। বিশ্রী কুৎসিত সে হাসি। দাঁতগুলো যেন শেওলা ধরা কোদাল। মালেক মিয়ার শরীরে যেন জ্বালা ধরে গেলো ও হাসি দেখে, তবু নীরব রইলো কোনো কথা না বলে।

তাড়াতাড়ি কাজ শেষ করে লাঙ্গল কাঁধে ছুটলো মালেক মিয়া জমি চাষ করতে। উদ্দেশ্য তার হাবলুর বৌয়ের সঙ্গে নদীতীরে কিছু কথা বলা।

গরু আর লাঙ্গল রেখে এগিয়ে গেলো মালেক মিয়া। কলসী কাঁখে তীরে এসে দাঁড়িয়েছে হাবলুর বৌ, ঠিক ঐ সময় মালেক মিয়া এসে দাঁড়ায় তার পাশে।

হাবলুর বৌ ওকে দেখে খুশি হয়ে বলে—এসেছো এখানে? দেখো তোমার কষ্ট দেখে আমার বড় দুঃখ হয় কিন্তু কি করবো আমার স্বস্তর-শাশুড়ী বড় নির্দয়। তুমি বুড়ো মানুষ তবু তোমাকে কেমন খাটিয়ে নেয়।

মালেক মিয়া হেসে বলে—তাতে দুঃখ করার কিছু নেই। কাজ, ও আমার গা সওয়া হয়ে গেছে। কিন্তু আমার দুঃখ হয় তোমার জন্য।

হাবলুর বৌ হাসে, ম্লান করুণ সে হাসি। তারপর বলে—আমার জন্য কেন দুঃখ হয় তোমার?

জানিনা, তবু দুঃখ হয়।

তুমি আমার দাদুর মত কিনা তাই আমার জন্য এত ভাবছে। শুনলাম তোমার নাম মালেক মিয়া কিন্তু আমি তোমাকে নাম ধরে ডাকবো না, তোমাকে আমি দাদু বলে ডাকবো।

বেশ, তাই ডেকো।

কিন্তু সবার সামনে মালেক ভাই বলবো, কেমন?

মন্দ নয়, তাই বলো। দাও এবার কলসীটা আমাকে দাও, আমি বাড়ির কাছাকাছি তোমাকে পৌছে দিয়ে আসবো। দশ কলসী পানি মাত্র এক ঘন্টায় আমি তোমায় দিয়ে আসবো। তুমি দাঁড়িয়ে থাকবে আমি.....

না, তা হয় না। বুড়ো মানুষ তোমার কষ্ট হবে না বুঝি?

তা হোক আমার কাজ করে অভ্যাস আছে।

আমারও আছে।

তবু তুমি মেয়েমানুষ কাজেই.....দাও কলসী আমাকে দাও।

মালেক মিয়া হাবলুর বৌয়ের হাত থেকে কলসী নিয়ে নেয়। তারপর চলতে চলতে বলে—আচ্ছা, তোমার নাম কি তা তো বললে না?

একটা দীর্ঘশ্বাস ত্যাগ করে বলে হাবলুর বৌ—আমার নাম দাদুই রেখেছিলেন গোলাপী। ছোটবেলায় নাকি গোলাপ ফুলের মত সুন্দর ছিলাম, তাই.....

মালেক মিয়া তাকালো ওর মুখের দিকে। মিথ্যা বলেনি, সত্যি হাবলুর বৌ গোলাপের মতই সুন্দর।

কি দেখছো মালেক ভাই?

না কিছু না, চলো।

চলতে চলতে বলে মালেক মিয়া—আমি কিন্তু তোমাকে গোলাপী বলেই ডাকবো।

বেশ, তাই হবে। আমাকে তুমি গোলাপী বলেই ডেকো মালেক ভাই।

আবার পথ চলতে লাগলো ওরা।

বললো মালেক মিয়া—আচ্ছা গোলাপী, একটা কথা জিজ্ঞাসা করবো, বলবে?

বলবো বলো?

আচ্ছা, কাল রাতে মোটর গাড়ি এসেছিলো কেন? ওতে কি এসেছিলো বলতে পারো?

গোলাপী এদিক ওদিক তাকিয়ে দেখে নিয়ে বললো—অনেক রাতে গাড়ি এসেছিলো জানি কিন্তু গাড়িতে কি এসেছিলো তা জানি না।

ও, তোমাকে বুঝি তোমার স্বপ্নের কিছু বলে না?

না। আমাকে তো বলেনই না, কাউকে না। আচ্ছা মালেক ভাই।

বলো?

তোমাকে ওরা যা খেতে দেয় তাতে তোমার পেট ভরে না, তাই না? সত্যি করে বলবে কিন্তু?

হঠাৎ মালেক মিয়ার চিন্তাধারা অন্যদিকে মোড় ফিরে, বলে—তাতে কি এসে যায়! চিরদিন পেটভর্তি করে খেয়েছি, দু'চার দিন না হয় একটু কমই খেলাম।

মালেক ভাই, রাতে যখন তোমাকে খেতে দিলো তখন আড়াল থেকে আমি সব লক্ষ্য করেছি। দিনের ঠান্ডা ভাত, তবু শুধু ডাল আর শাকভাজি—তুমি চারটি মাত্র মুখে দিয়ে সরিয়ে রাখলে। তখন আমার যা দুঃখ হলো কিন্তু কি করবো.....একটা দীর্ঘশ্বাস চেপে গেলো গোলাপী।



সমস্ত দিনটা কেটে গেলো।

মালেক মিয়ার সঙ্গে আর দেখা হয়নি গোলাপীর। রাতে বাড়ির ছোট্ট চাকরটা যখন ভাত নিয়ে এলো তখন মালেক মিয়া বসেছিলো জানালার পাশে মুক্ত বাতাসে। ভাবছিলো সে মনিরা আর নূরের কথা। ওরা নিশ্চয়ই শহরে ভালভাবে পৌঁছে গেছে। সরকার সাহেব সঙ্গে আছেন, কাজেই চিন্তার কোনো কারণ নেই। নূর হয়তো মনিরাকে বারবার প্রশ্ন করছে তার আবু কবে আসবে। তিনি হঠাৎ এভাবে চলে গেলেন কেন...এমনি কত কি! নূরের কাছে মনিরাকে অনেক সময় নানারকম মিথ্যা কথা বলতে হচ্ছে।

আজ দু'দিন দু'রাত গত হয়ে গেছে, সে ফিরে যেতে পারতো কান্দাই আস্তানায় কিন্তু যাওয়া তার হলো না। একটা অন্যায় অনাচারের সন্ধান সে পেয়েছে, তাই ছদ্মবেশ পরিত্যাগ করতে পারেনি। তাকে এর সমাধান করে তবেই ফিরে যেতে হবে.....

হঠাৎ চিন্তাজাল বিচ্ছিন্ন হয়ে যায়, চাকর ছোকরা বলে উঠে—এই বুড়ো, তোমার ভাত-ডাল রইলো, খেয়ে নিও। ভাতের থালা আর ডালের বাটি রেখে চলে গেলো সে।

মালেক মিয়া মুক্ত জনালার পাশ থেকে উঠে এলো ভাতের থালার পাশে। কিন্তু ভাতে হাত দিয়েই আঁতকে উঠলো, সকালের ভাত হয়তো, একেবারে পচে গলে গেছে। মালেক মিয়ার বড় ক্ষুধা পেয়েছিলো কিন্তু খাওয়া আর হলো না, ভাতের থালা সরিয়ে রেখে উঠে দাঁড়তেই কে যেন বললো—জানি, ও ভাত তুমি খেতে পারবে না।

কে?

আমি গোলাপী।

তুমি!

হাঁ মালেক ভাই, আমি.....সামনে এসে দাঁড়ায় গোলাপী, আঁচলের তলা থেকে বের করে আনে একখালা ভাত আর কিছু তরকারি। থালা সহ ভাত মালেকের হাতে গুঁজে দিয়ে বলে—তুমি খাও মালেক ভাই।

তারপর দ্রুত পচা ভাতের খালটো তুলে নিয়ে আঁচলে ঢেকে বেরিয়ে যায় গোলাপী।

মালেক মিয়া কিছুক্ষণ স্তব্ধ হয়ে দাঁড়িয়ে থাকে, তারপর খালাটার দিকে ফিরে তাকায়, কৃতজ্ঞতায় ভরে ওঠে ওর মন

পরদিন।

মালেক মিয়া গোয়ালে কাজ করছে, এমন সময় ইকরাম আলীর কাছে দু'জন লোক এলো। শহর থেকে এসেছে তাদের চেহারা দেখেই স্পষ্ট বুঝা যাচ্ছে।

ইকরাম আলী তাদের বৈঠখানা ঘরে নিয়ে বসলেন। মালেককে ডাকলেন তামাক দেবার জন্য।

মালেক মিয়া সুযোগ খুঁজছিলো, দরবড় হাতের কাজ রেখে ছুটে এলো—মালিক, আমাকে ডাকছেন?

হাঁ, তামাক নিয়ে আয়।

মালেক মিয়া চলে যায় এবং তামাক সাজিয়ে কলকেসহ হুকোটা নিয়ে আসে।

ততক্ষণে কথাবার্তা শুরু হয়ে গেছে ইকরাম আলী ও তার সঙ্গীদের মধ্যে।

মালেক মিয়া আসায় চুপ হয়ে গেলেন তাঁরা। ইকরাম আলী বললেন— ও আমাদের কথাবার্তা বুঝতে পারবে না, বড় বোকা লোক। তা ছাড়া নতুন এসেছে, আমাদের বাড়ির সঙ্গে ওর কোনো যোগাযোগ নেই।

মালেক মিয়া ততক্ষণে হুকোটা রেখে নলটা তুলে দিয়েছে ইকরাম আলীর হাতে। ইকরাম আলী আবার তুলে ধরলেন তার অতিথিদের দিকে।

কিন্তু অতিথিগণ গ্রাম্য সাধারণ ব্যক্তি নন। তাঁরা হুকো সেবন করতে সম্মত নন। তাঁরা নিজ নিজ পকেট থেকে সিগারেট কেস বের করে সিগারেট ধরালেন।

গোপন আলোচনা চললো।

কাগজে লিখা হলো দলিল বা বন্ড জাতীয় কিছু।

তারপর ওরা বিদায় গ্রহণ করলো।

মালেক মিয়া কিন্তু ওদের কথাবার্তা সব শুনে নিলো। সে বুঝতে পারলো, দেশের দুঃস্থ জনসাধারণের জন্য রিলিফ এসেছিলো মূল্যবান কোনো সামগ্রি সেই রিলিফ বস্তু শহরের কালোবাজারী দলের কাছে হস্তান্তর করা হলো। আজকের কথাবার্তা বা লেখালেখি তারই চুক্তিপত্র।

মালেক মিয়ার ধমনির রক্ত উষ্ণ হয়ে উঠলো, তবু নিজেকে সংযত করে রাখলো সে সুযোগের প্রতীক্ষায়। রিলিফের মাল এসেছে গ্রামের জনগণ টেরও পেলো না। তৃতীয় রাতে সমস্ত গ্রাম যখন নিশুতির কোলে ঢলে

পড়লো তখন আবার ট্রাক এলো ট্রাক বোঝাই হলো। রাতের অন্ধকারে মাল সহ ট্রাক উধাও হলো, জানলো না কেউ।

পরদিন।

মালেক মিয়া কাজ শেষ করে ঘরে এসে দাঁড়িয়েছে, এমন সময় শোনা গেলো অন্তঃপুর থেকে ইকরাম গৃহিনীর ঝাঁঝালো কণ্ঠস্বর—হাবলুর জ্বর হয়েছে, ওর শরীরে তেল মালিশ করে দেবে যাও। আজ আর ঘাটে পানি আনতে যেতে হবে না, পানি আনবে মালেক মিয়া।

মালেক মিয়া কান পেতে রইলো, হয়তো গোলাপীর কণ্ঠ শোনার প্রতীক্ষায়, কিন্তু কোনো সাড়া এলো না অপর পক্ষের।

পুনরায় সেই ঝাঁঝালো কণ্ঠ—তবু কলসী কাঁখে নিচ্ছে? যাও তেলের বাটিতে তেল নিয়ে হাবলুর ঘরে যাও, বাহার আমার শরীরে নাকি বড় ব্যথা হয়েছে।

এবার গোলাপীর কণ্ঠস্বর—আমি পারবো না।

সঙ্গে সঙ্গে খঁকিয়ে উঠলেন ইকরাম গৃহিনী—কি বললে, পারবে না? স্বামীর শরীরে তেল মালিশ করে দেবে তাই পারবে না? স্বামীর সেবা মেয়েদের ধর্ম, এটা মেয়ে হয়ে তুমি বুঝোনা? যাও, যাও বলছি.....

না, আমি পারবো না।

তবে আজ তোমার খাওয়া বন্ধ, দেখি কি খাও—আর কে তোমাকে খেতে দেয়।

এরপর আর কোনো কথা শোনা গেলো না। মালেক মিয়া কাজে বেরিয়ে গেলো, ফিরে এলো সন্ধ্যার পূর্বে।

হাতমুখ ধুয়ে ঘরে এসে বসলো। ক্লান্ত অবসন্ন দেহটা এলিয়ে দিলো বিছানায়। ছোট্ট চাকর ছেলেটা এসে ভাতের থালা আর তরকারির বাটি রেখে গেলো।

মালেক মিয়া একটা লঘু পদশব্দ শোনার প্রতীক্ষায় আছে কিন্তু কই, ছেলেটা ভাত-তরকারি রেখে যাবার পর কেউ তো এলো না। রোজ

গোলাপী আসে আঁচলের তলায় ভাত তরকারি নিয়ে। গরম ভাত-তরকারি রেখে বাসিগুলো নিয়ে যায়। আজ আসছে না ব্যাপার কি?

মালেক মিয়া উঠে এলো ভাতের থালার পাশে। ভাতে হাত দিতেই হাতখানা তার বসে গেলো ভাতের মধ্যে। পচা গলে যাওয়া ভাত। তরকারিটা নাকে ধরতেই বুঝতে পারলো টক হয়ে কেমন যেন আম্লা গন্ধ বের হচ্ছে বাটি থেকে। মালেক মিয়া রেখে দিলো ভাত-তরকারি, তারপর গেলাস থেকে পানি গুলো ঢক্‌ঢক্ করে এক নিঃশ্বাসে খেয়ে বিছানায় এসে শুয়ে পড়লো।

কেরোসিনের কুপিটা তখন দপ দপ করে জ্বলছে।

সমস্ত কক্ষটা নীরব।

দ্বিতীয় কোনো প্রাণী নেই সে কক্ষে। ছোট মেটে ঘর, তার একটিমাত্র জানালা। সেই কক্ষে শুধুমাত্র শোয় মালেক মিয়া। এ কক্ষে বড় একটা কেউ আসে না।

মালেক মিয়া তাই নিশ্চিন্তে ঘুমতে পারে।

রাতে ঘুমাবার পূর্ব মুহূর্তে মালেক মিয়া তার মুখ থেকে খুলে ফেলে দাঁড়ি-গোঁফ। ছোট্ট পুঁটলি থেকে আয়না আর সেভ করার সরঞ্জাম বের করে নিয়ে পরিস্কারভাবে দাঁড়ি-গোঁফ কামিয়ে ফেলে। তারপর ঘুমায়।

অবশ্য ভোর হবার পূর্বে দরজা বন্ধ অবস্থায় দাঁড়ি-গোঁফ পরে নেয় নিখুঁতভাবে। মালেক মিয়ার পুঁটলির মধ্যেই আছে তার প্রয়োজনীয় জিনিসপত্র।

মালেক মিয়া ঘুমাবার পূর্বে দরজা বন্ধ করে ঘুমাতো। আজও ঘুমাবার পূর্বে যেমনি সে উঠতে যাবে, এমন সময় গোলাপী এসে দাঁড়ালো।

বললো মালেক—কে, গোলাপী?

হঁ।

মালেক দেখলো তার আঁচলের নিচে আজ ভাতের থালা বা তরকারির বাটি নেই। কুপির আলোতে মুখখানা বড় শুকনো লাগছে। বড় মান, বড় বিষণ্ণ ওর মুখখানা।

মালেক মিয়া শুয়ে ছিলো উঠে বসলো, বললো সে—গোলাপী, কি হয়েছে তোমার?

মালেক মিয়ার কথায় গোলাপীর চোখ দুটো ছলছল করে উঠলো, কোনো জবাব সে দিলো না।

মালেক মিয়া বললো—জানি, সব আমি শুনেছি।

গোলাপী চোখ দুটো তুলে ধরলো মালেক মিয়ার মুখে, ঠোট একটু নড়ে উঠলো, হয়তো বা কিছু বলতে যাচ্ছিলো কিন্তু বলতে পারলো না।

মালেক মিয়ার মনটা ব্যাথায় টন টন করে উঠলো। কুপির আলোটা যেন ওর মুখখানাকে আরও করুণ করে তুলেছে, বললো—জানি আজ সারাদিন তোমাকে ওরা খেতে দেয়নি...

তুমি.....তুমি কেমন করে জানলে ওরা আমাকে আজ খেতে দেয় নি?

জানি! গোলাপী, তোমার যে কি ব্যাথা, কি যন্ত্রণা আমি বুঝতে পেরেছি। গোলাপী, তোমার দাদুকে তুমি খুব ভালবাসতে না?

হাঁ, দাদু আমাকে খুব ভালবাসতো তাই.....

তাই তুমিও তাকে খুব ভালবাসতে?

হ্যাঁ।

কিন্তু তোমার দাদু তোমাকে যদি ভালই বাসতেন তাহলে তোমার সুন্দর ফুলের মত জীবনটাকে এভাবে নষ্ট করে দিতেন না, তোমাকে এভাবে তিনি হত্যা করতেন না। গোলাপী, তোমার দাদু...তোমার দাদু তোমাকে হত্যা করেছেন। একটু থেমে বলে মালেক মিয়া—হাবলুর সঙ্গে বিয়ে দিয়ে তোমাকে গলা টিপে হত্যা করে গেছেন তোমার দাদু.....

মালেক ভাই!

হ্যাঁ, আমি জানি হাবলুর সঙ্গে বিয়ে হলেও তুমি হাবলুকে স্বামী বলে মেনে নিতে পারোনি।

মালেক ভাই, তুমি কি করে জানলে আমার মনের কথা? কে বললো তোমাকে এ সব?

কেউ আমাকে বলেনি, তোমার মুখ দেখলেই আমি সব বুঝতে পারি।

মালেক ভাই, তোমাকে দেখলে সত্যি মনে হয় তুমি যেন আমার কত আপনজন। আমাকে তুমি ভালবাসো, স্নেহ করো.....মালেক ভাই, রোজ তোমাকে রাতে পচা ভাত আর বাসি তরকারি খেতে দেয়। আমি জানি তুমি ওসব খেতে পারবে না, তাই রোজ আমার খাবার তোমাকে এনে দেই...

বলো কি গোলাপী!

আজ আমাকে ওরা খেতে দেয়নি—দিনেও না রাতেও দেয়নি, তাই তোমাকে আজ উপবাস থাকতে হলো.....চাপা কান্নায় কণ্ঠ ধরে আসে গোলাপীর।

মালেক মিয়ার দু চোখে বিশ্বয় ঝরে পড়ে, সে যেন স্তব্ধ হয়ে যায়। রোজ তাহলে গোলাপী নিজে না খেয়ে তাকে খাওয়াতো, রোজ উপবাসে থাকতো সে, বললো মালেক মিয়া—তুমি না খেয়ে প্রতিদিন আমাকে তোমার ভাতগুলো দিয়ে যেতে আর তুমি উপবাসে থাকতে, তাই না?

আমি সব খেতে পারি মালেক ভাই। তোমার এখান থেকে যে ভাত আমি নিয়ে যেতাম ঐ ভাত আমি পেট পুরে খেতাম।

তুমি ঐ পচা ভাত খেতে?

আমরা মেয়েমানুষ, সব সহ্য করতে পারি।

যেমন মুখ বুঁজে সহ্য করছো তোমার পিশাচ শ্বশুর-শাশুড়ির নিষ্ঠুর নির্মম হৃদয়হীন আচরণ?

মালেক ভাই, তুমি কত সুন্দর করে কথা বলতে পারো। এমন কথা তুমি কোথায় শিখেছো মালেক ভাই?

গোলাপী, তোমার মন সুন্দর তাই তুমি আমার কথাগুলোকে সুন্দর বলছো। একটা কথা মনে রেখো, তোমার দাদু নিজেকে ঋণমুক্ত করবার জন্য তোমাকে এক বদ্ধ পাগলের হাতে সঁপে দিয়ে গেলেও তিনি আসলে ঋণমুক্ত হতে পারেননি বরং তাঁর আত্মার দারুণ অশান্তি ভোগ করছে। বানরের গলায় মুক্তার মালার মতই হয়েছে তোমার অবস্থা।

গোলাপীর গণ্ড বেয়ে গড়িয়ে পড়ে দু'ফোঁটা অশ্রু। মালেক মিয়া বললো—হাবলুর বুঝি অসুখ হয়েছে?

হাঁ, সারাদিন বাড়ির পিছনে পচা পুকুরে মাছ ধরেছিলো।

গরু-মহিষের মতই ওর স্বভাব, কাজেই জ্বর হয়েছে।

হাঁ, জ্বর হয়েছে। আমাকে বলে ওর সেবাযত্ন করতে। আমি প্রাণ গেলেও পারবো না, পারবো না ওর সেবাযত্ন করতে.....কথাটা এক নিঃশ্বাসে বলে গোলাপী, তারপর একটু থেমে বললো আবার—মালেক ভাই, আমার আপনজন বলতে কেউ নেই। যদি কেউ থাকতো আমি পালিয়ে যেতাম; এই দোযখে আমি থাকতাম না।

নীরবে শুনে যায় মালেক মিয়া।

গোলাপী বলে—মালেক ভাই, তোমার যদি কোনো বাড়ি থাকতো আমি চলে যেতাম তোমাদের ওখানে। তুমি সারাদিন কাজ করে সন্ধ্যায় বাড়ি ফিরতে, আমি তোমার পথ চেয়ে বসে থাকতাম ভাতের থালা আগলে নিয়ে। তবু আমি শান্তি পেতাম মালেক ভাই।

মালেক মিয়ার ইচ্ছা হলো কিছু সান্তনা বাক্য শোনায় কিন্তু পারলো না সে কোনো কথা বলতে, কে যেন তার কণ্ঠ রোধ করে দিয়েছে।

গোলাপীর ব্যথা তাকে ব্যথিত করে কিন্তু ঐ মুহূর্তে কোনো পথ নেই তাকে এ দুর্বিষহ অবস্থা থেকে উদ্ধার করার। বলে মালেক মিয়া—যাও, এবার ঘরে যাও।

গোলাপী কোনো কথা উচ্চারণ না করে নীরবে মস্তুর গতিতে বেরিয়ে গেলো।

মালেক মিয়া নিস্তব্ধ প্রাণহীন পাথরের মূর্তির মত দাঁড়িয়ে রইলো দরজার পাশে।

অন্ধকারে গা ঢাকা দিয়ে চলে গেলো গোলাপী। সমস্ত দিনটা ওর উপবাসে কেটেছে, এবার কাটবে সমস্ত রাতটা। বেচারী তরুণী গোলাপী—কিই বা এখন ওর বয়স হয়েছে, তার উপরে চলেছে কি নির্মম আচরণ!

বিছানায় শুয়ে শুয়ে ভাবলো কিছুক্ষণ, তারপর শয্যা ত্যাগ করে উঠে দাঁড়ালো। পুঁটলি খুলে বের করলো তার জমকালো দস্যুড্রেস। দাঁড়ি-গোফ খুলে রেখে পরে নিলো তার পোশাক। মাথার পাগড়ির আঁচলে ঢেকে

ফেললো মুখের নিচের অংশ। বেরিয়ে এলো দরজা খুলে ঘরের বাইরে দস্যু বনহর।

সমস্ত গ্রামখানা তখন নিস্তব্ধ। গ্রামের ঘরে ঘরে আলো নিভিয়ে শুয়ে পড়েছে সবাই। গোয়ালে গরুগুলো এখন আর দাঁড়িয়ে দাঁড়িয়ে জাবর কাটছে না, কাঁধের উপর মাথাটা কাৎ করে শুয়ে আছে চোখ দুটো মূঁদে। মাঝে মাঝে অবশ্য লেজ নেড়ে মশা তাড়াচ্ছিলো। গোয়ালে ধুঁয়ো দিয়েছে খেরস্থ, যাতে মশার উপদ্রব কিছু হ্রাস পায়। এখন অবশ্য আগুন নিভে ছাই হয়ে গেছে, সামান্য একটু ধুঁয়ো ঘুরপাক খেয়ে খেয়ে উঠে যাচ্ছে উপরের দিকে।

গোয়ালের পাশে একটি নেংটি কুকুর জড়সড় হয়ে আছে। কখনও বা একটু আওয়াজ পেলেই ঘেউ ঘেউ করে উঠছে কিন্তু জায়গাটা ছেড়ে নড়ছে না, যদি তার শরীরের গরমে উষ্ণ জায়গাটা আবার ঠান্ডা হয়ে যায়। অবশ্য ঠান্ডার দিন নয় যদিও, তবু নেংটি কুকুরটা নিজের জায়গায় হয়তো নড়চড় করতে চায় না।

অন্ধকারে বনহর এগিয়ে গেলো অন্তঃপুরের দিকে।

তার বুটের শব্দে নেংটি কুকুরের সজাগ কান খাড়া হয়ে উঠলো, সঙ্গে সঙ্গে মাথাটা তুলে আওয়াজ করলো ঘেউ ঘেউ ঘেউ.....কিন্তু জায়গা ত্যাগ করলো না সে।

ততক্ষণে অন্তঃপুরে প্রবেশ করেছে বনহর।

ও ঘর থেকে ভেসে এলো হাবলুর গোঙানির শব্দ, জ্বরের ঘোরে গোঙাচ্ছে হাবলু। শোনা গেলো মায়ের কণ্ঠ—কি হলো, ঘুমিয়ে পড়লে নাকি? ঠিকমত বাতাস করো, নইলে কালকেও তোমার ভাত বন্ধ মনে রেখো.....

বেড়ার ফাঁকে দৃষ্টি নিক্ষেপ করলো বনহর। ভিতরে নজর পড়তেই দেখতে পেলো হাবলু বিছানায় শুয়ে আছে একটা গরিলারাজের মত। নেড়ে মাথাটার কাছে পাখা হাতে বসে আছে গোলাপী। গোলাপীর একখানা হাত স্পষ্ট দেখা যাচ্ছিলো। কয়েকগাছা লাল চুড়িতে হাতখানাকে আরও সুন্দর দেখাচ্ছিলো। লষ্ঠনের আলোতে আরও দেখা গেলো তালপাখা নিয়ে স্বামীর

মাথায় বাতাস করছে গোলাপী। মাঝে মাঝে তন্দ্রাচ্ছন্ন হয়ে পাখাটা থেমে যাচ্ছিলো, তখনই খঁকিয়ে উঠছিলেন ইকরাম গৃহিনী। তিনি পুত্রের পাশেই অপর এক বিছানায় শুয়ে নাক ডাকাছিলেন।

পাখার শব্দ থেমে গেলেই হাবলুর জননীর নিদ্রাঘোর ছুটে যাচ্ছিলো, তিনি খঁকিয়ে উঠে সাবধান করে দিচ্ছিলেন, যাতে বাতাস করা বন্ধ না নয়।

বেচারী গোলাপী বাতাস করছিলো আর কিমুচ্ছিলো। লণ্ঠনটা মেঝের একপাশে জ্বলছে, তারই আলোতে পাখাটার ছায়া দেয়ালে দুলছিলো। কেমন যেন একটা থমথমে ভাব বিরাজ করছিলো কক্ষটার মধ্যে।

বনহর সরে গেলো সেখান থেকে, প্রবেশ করলো বৈঠকখানা কক্ষে। এ কক্ষে শুধুমাত্র কয়েকটা চেয়ার, একটা টেবিল ছাড়া যদিও কিছু ছিলো না তবুও বনহর এ কক্ষে এলো কেন? ছোট্ট টর্চলাইটের আলো ফেললো, দেখতে লাগলো সে দেয়ালের চারপাশে। ছোট্ট একটা দরজার গায়ে বিরাট একটি তালা ঝুলছে।

বনহরের মুখে ফুটে উঠলো একটা মৃদু হাসির রেখা। আলগোছে তালাটা সে খুলে ফেললো, তারপর চাবির গোছা রেখে দিলো পকেটে। তালা খুলে প্রবেশ করলো চোরা কুঠরির মধ্যে। টর্চের আলো ফেলে সে দেখতে লাগলো, চোরা কুঠরির মেঝে থেকে ছাদ অবধি স্তূপাকার করে রাখা হয়েছে বস্তা বোঝাই কোনো সামগ্রি। বনহরের চোখ দুটো চকচক করে উঠলো, সে বস্তায় হাত রেখেই বুঝতে পারলো চাল ছাড়া সেগুলো কিছু নয়।

এত চাল জমা করে রেখে দিয়েছে ইকরাম আলী। সব যে তার জমির ধানের চাল তা নয়, প্রতি হাটবার বিশ মণ করে চাল কিনে রাখেন সে। এই মজুত চাল কি করবে সেই জানে। বাড়ির কোনো লোক এই চোরা কুঠরির মধ্যে প্রবেশে সক্ষম নয়।

বনহর চোরা কুঠরি থেকে বেরিয়ে এলো বাইরে।

ইকরাম আলীর শয়নকক্ষে প্রবেশ করলো সে অতি সন্তর্পণে। শয্যার পাশে এসে দাঁড়িয়ে পিস্তলের আগা দিয়ে ইকরাম আলীর গায়ের চাদর

সরিয়ে দিতেই সুখনিদ্রা ছুটে গেলো তার। চোখ মেলতেই আঁতকে উঠে বললো—কে? এঁ্যা এঁ্যা কে তুমি?

বনহর চাপাকণ্ঠে বললো—তোমার বন্ধু।

বন্ধু!

হ্যাঁ, বলো তোমার চোরা কুঠরিতে কত মণ চাল মজুত আছে?

কেন.....কেন তুমি এ কথা জানতে চাইছো?

জানতে চাইছি কাল তোমার দরজায় এসেছিলো যারা তারা কারা?

তারা.....তারা ধামের গরিব মানুষ, চাল কিনবে বলে এসেছিলো.....

কেন তাদের কাছে চাল নেই বলেছিলে, কেন তুমি অস্বীকার করেছিলে তোমার চোরা কুঠরির মজুত চালের কথা?

ওরা কি আমার চালের মূল্য দিতে পারবে? এখন যে চালের অনেক দাম।

তুমি কত মূল্যে কিনে মজুত করেছো?

কোনো জবাব দেয় না ইকরাম আলী মিয়া। বনহর পিস্তল চেপে ধরে—জবাব দাও?

ইকরাম আলী সহজে ভয় পাবার লোক নয়, সে ঝানু মজুতদার, বললো—তুমি জবাব দাও কোন্ অধিকারে আমার বাড়িতে প্রবেশ করেছো?

অট্টহাসিতে ফেটে পড়লো বনহর, পিস্তল তখনও ইকরাম আলীর বুকে ঠেকে আছে।

হঠাৎ সেই মুহূর্তে দরজায় এসে দাঁড়ায় গোলাপী। শ্বশুরের বুকে পিস্তল চেপে ধরে একটি জমকালো মূর্তিকে দাঁড়িয়ে থাকতে দেখে চিৎকার করে উঠলো গোলাপী—উঃ মা গো.....টলে পড়ে যাচ্ছিলো সে।

এ মুহূর্তে বনহর স্থির থাকতে পারলো না, তাড়াতাড়ি গোলাপীর সংজ্ঞাহীন দেহটা ধরে ফেলে এবং দ্রুত তাকে গুইয়ে দেয় ইকরামের বিছানায়, তারপর ক্ষিপ্ৰগতিতে বেরিয়ে যায় কক্ষের বাইরে।

ইকরাম আলী ততক্ষণে চিৎকার শুরু করে দিয়েছে—ডাকাত.....ডাকাত.....ডাকাত পড়েছে.....কে কোথায় আছো বাঁচাও.....বাঁচাও.....

ইকরাম আলীর চিৎকার শুনে চারদিক থেকে ছুটে আসে সবাই। ইকরাম গৃহিনী, চাকর-বাকর, আত্মীয়স্বজন সবাই, এমন কি মালেক মিয়াও ছুটে আসে তার ঘর থেকে চোখ রগড়াতে রগড়াতে।

সবাই বলে—ব্যাপার কি, ব্যাপার কি?

ইকরাম আলীর পাশের বাড়ি থেকে ছুটে এসেছেন পরমানিক মিয়া। বুড়ো মানুষ চোখে ভাল দেখেন না, তিনিও উদগ্রীবভাবে প্রশ্ন করলেন—কি হয়েছে?

ইকরাম আলী শুধু বলে চলেছে—ডাকাত এসেছিলো...আমার বাড়িতে ডাকাত এসেছিলো..... সর্বনাশ, আর একটু হলে আমাকে খুন করে করে বৌমাকে ধরে নিয়ে যেতো সে...বৌকে নিয়ে যাওয়ার জন্যই এসেছিলো.....

কেউ কেউ গোলাপীর মাথায় পানি ঢালতে শুরু করে দিয়েছে। এক সময় জ্ঞান ফিরে এলো গোলাপীর! সে কোনোদিন চোর-ডাকাত বা এ ধরনের লোক দেখেনি। হঠাৎ সে স্বপ্নের ঘরে অদ্ভুত শব্দ শুনে দ্রুত গিয়ে হাজির হয়েছিলো এবং দেখতে পেয়েছিলো জমকালো একটি মূর্তি। দেখেই সে ভীষণ আতঙ্কগ্রস্ত হয়ে পড়েছিলো আর সঙ্গে সঙ্গে জ্ঞান হারিয়ে ফেলেছিলো।

বাড়িতে মানুষ ভরে গেছে, সবার মুখেই আতঙ্কের ছায়া।

সবাই ব্যস্তভাবে ইকরাম আলীকে প্রশ্নের পর প্রশ্ন করে চলেছে।

মালেক মিয়া এসে দাঁড়াতেই বললেন ইকরাম আলী— নাকে তেল দিয়ে খুব ঘুমিয়েছিলে বুঝি? এদিকে বাড়িতে ডাকাত পড়েছিলো জানিস্ না তুই?

মালেক মিয়া ভীতকণ্ঠে ঢোক গিলে বললো—ডাকাত! বলেন কি মালিক?

হাঁ, ডাকাত এসেছিলো, আমার টাকা-পয়সা সব ছিনিয়ে নিয়ে গেছে। বৌমাকেও নিয়ে যাবার জন্য চেষ্টা করছিলো কিন্তু বৌমা অজ্ঞান হয়ে পড়ায় তাকে ছেড়েই পালিয়ে গেছে...

মালেক মিয়া দু'চোখ কপালে তুলে বলে উঠে—বলেন কি মালিক, সব টাকা-পয়সা ডাকাত ছিনিয়ে নিয়ে গেছে! সর্বনাশ, বৌমাকেও ডাকাত নিয়ে যাবার জন্য.....

হাঁ, দেখছো না তাই সে অজ্ঞান হয়ে পড়েছে। যাও, ওর মাথায় পানি ঢালো গে। ইকরাম আলী কথাগুলো বলে গোলাপীকে দেখিয়ে দিলো।

ততক্ষণে কতকগুলো গ্রাম্য মহিলা গোলাপীকে ঘিরে ধরে ব্যতিব্যস্ত হয়ে নানা রকম উক্তি উচ্চারণ করতে শুরু করে দিয়েছিলো। কেউ বলছে, গোলাপীর রূপ দেখেই ডাকাত এসেছিলো তাকে নিয়ে যাবার জন্য। কেউ বলছে, এত রূপ ভাল নয়। কেউ বলছে, গোলাপী বৌ বড় কুলক্ষুণে, নাহলে এমন তাজা ছেলের অমন অসুখ হবে কেন? কেউ বলছে, ওর নিঃশ্বাস ভাল নয়.....এমনি নানা জনের নানা কথা।

গোলাপীর মাথায় ছোট্ট চাকর ছেলেটা পানি ঢালছিলো, মালেক মিয়া তাকে সাহায্য করতে এগিয়ে গেলো।

চোখ মেলে তাকাচ্ছে গোলাপী।

মালেক মিয়া বললো—ভয় নেই গোলাপী—ডাকাত চলে গেছে।

গোলাপীর চোখেমুখে তখনও উৎকৃষ্টার ছাপ ফুটে আছে। সমস্ত রাতটা নানা রকম হই হুল্লোড়ের মধ্য দিয়ে কেটে যায়।

পরদিন হাবলুর অসুখ অনেক কমে গেছে।

ইকরাম গৃহিণী ছেলেকে নিয়ে ব্যস্তসমস্ত হয়ে উঠেছেন। তাকে পথ্যপথ্য দিতে হবে। গোলাপী ঘাটে পানি আনতে যায়নি বলে তাকে গালমন্দ করছেন তিনি খুব করে।

গোলাপী নীরবে পানি আনতে চলে গেলো। যদিও তার মনে এখনও রাতের সেই জমকালো মূর্তির ভয় দাগ কেটে বসে আছে, তবু তাকে যেতে হলো নদীর ঘাটে।

মালেক মিয়ার সাহায্য আজ সে নিলো না।

মালেক মিয়া অবশ্য ঘাটে না গেলেও যাবার সময় কলসী চেয়েছিলো—
গোলাপী বৌ, আমাকে কলসী দাও, আমি পানি এনে দেই।

গোলাপী বলেছিলো—তা হয় না, মালেক ভাই, রোজ তুমি আমার জন্য
কষ্ট করবে? আমি নিজেই যাবো ঘাটে পানি আনতে।

মালেক মিয়া চলে গেলো অন্য কাজে। যখন সে ফিরে এলো তখন
দেখলো কতকগুলো কঙ্কালসার অর্ধ উলঙ্গ লোক বৈঠকখানার সম্মুখে ভিড়
করে দাঁড়িয়ে আছে।

মালেক মিয়া নিকটে পৌঁছে বুঝতে পারলো তারা চাল কিনতে এসেছে,
সবার হাতে ছেড়া থলে, কারও বা হাতে গামছা রয়েছে।

বারান্দায় জলচৌকির উপর বসে হুকো টানছেন ইকরাম আলী মিয়া।
তার পাশে বসে আছে গ্রামের আরও দু'জন মাতব্বর গোছের লোক।

মালেক মিয়া নিকটে আসতেই গুনতে পেলো বলছে ইকরাম আলী—
পাঁচ টাকার কম এক সের চাল বিক্রি করবো না, যদি নিতে চাও নেবে না
হয় বিদায় হয়ে যাও।

ইকরাম আলীর পাশে যিনি ছিলেন তিনি পান চিবুতে চিবুতে বললেন—
ইকরাম, আমার কথা শোনো, আর কয়েকটা দিন যদি রাখতে পারো চালের
দাম দশ টাকা সের না হয়ে যাবে না।

কিন্তু আজ রাতে ডাকাত এসেছিলো, হাতে তার পিস্তল...

রেখে দাও তোমার ডাকাত। গ্রামের চৌকিদারকে বলে রেখো সে যেন
রোজ তোমার বাড়িতে মোতায়ন থেকে পাহারা দেয়।

ইকরাম আলী বললো—চৌকিদার ছাড়াও মালেক মিয়া আছে। বুড়ো
হল্লুও সে জোয়ান মানুষের মত শক্তি রাখে। তাকেও একগাছা মোটা লাঠি
নিয়ে পাহারায় রাখবো। বাস্ তা হলেই ডাকাত তো দূরের কাথা, ডাকাতির
বাবা আসতে পারবে না।

হাঁ তাই করো। ডাকাতের ভয়ে যদি এখনই সব চাল বিক্রি করে দাও তাহলে মস্ত লোকসান হবে, কাজেই এসব লোককে ভাগিয়ে দাও এখন থেকে.....

ইকরাম আলী হুকো রেখে উঠে দাঁড়ালো, তাঁরপর দাঁত মুখ খিঁচিয়ে সবাইকে বললেন—যাও তোমরা, আমি চাল বিক্রি করবো না।

সবার মধ্য থেকে এক বৃদ্ধ বলে উঠলো—তাহলে আমরা কি মরে যাবো?

মরো! তোমাদের মত মানুষ মরে যাওয়াই ভাল। যাও, চাল বিক্রি করবো না। ইকরাম আলী সবাইকে তাড়িয়ে দেয়।

গ্রামের দুঃস্থ জনগণ চোখ মুছতে মুছতে ফিরে যায় যে যার ঘরের দিকে।

মালেক মিয়া তখন দাঁড়িয়ে ছিলো একপাশে, সব সে লক্ষ্য করছিলো। ইকরাম আলী মালেক মিয়াকে বললো—যাও, এখানে দাঁড়িয়ে কি করলো, কামলারা জমি থেকে ধান কেটে আনছে, তাদের সব দেখিয়ে দাও কোথায় ওরা ধান রাখবে। আর শোনো যে ধান উঠানে স্তুপাকার করে রাখা হয়েছে, ঐ ধান রোদে মেলে দাও। শুকিয়ে গেলে গোলায় তুলে রাখবে।

আচ্ছা মলিক।

চলে যায় মালেক মিয়া।

ইকরাম আলী তার সঙ্গী সহ গোপন আলোচনায় বসে।

মালেক মিয়া উঠানে ধান বিছিয়ে দিতে দিতে ভাবে এত ধান দেশে তবু এত অভাব কেন শুধু ইকরাম আলীর ঘরে নয়, গ্রামে অনেকের ঘরেই প্রচুর ধান এসেছে। জমি ভরা ধান। তবু ধান চালের এত মূল্য কেন বৃদ্ধি হলো? মন তার জবাব দিলো, ইকরাম আলীর মত মানুষদের জন্যই দেশে এত ফসল ফলেও ফসলের মূল্য এত বেশি। যতদিন এইসব মুনাফাকারী দলকে শায়েস্তা করা না হবে, ততদিন দেশের মহাসঙ্কট কাটবে না। এরা অর্থলোভী স্বাপদের দল, নরপশুর দল, দেশের এই মহা বিপর্যয়ের জন্য দায়ী এইসব জানোয়ার.....দাঁতে দাঁত পিষে মালেক মিয়া।

কাজ শেষ করে সোজা সে চলে যায় নদীর ধারে যেখানে নির্জন জায়গা সেখানে সে একটি গাছের ছায়ায় এসে দাঁড়ায়।

আশেপাশে কোনো লোক নেই, খুলে ফেলে সে তার হৃদবেশী দাড়ি গোঁফ। নদী থেকে পরিষ্কার করে হাতমুখ ধুয়ে ফিরে আসে সে গাছের তলায়। স্নিগ্ধ শীতল বাতাসে তার সমস্ত শরীর শান্ত হয়ে আসে।

গাছে হেলান দিয়ে ভাবছিলো দেশের এই চরম অবস্থার কথা। গ্রামে এমন অনেক লোক আছে যারা তিন সন্ধ্যাই না খেয়ে আছে। হয়তো একমুঠো চাল কোনো রকমে জোগাড় করে একগাদা কচুপাতার সঙ্গে মিশিয়ে সেক্ষ করে কোনো রকমে উদর পূর্ণ করছে। কত জনের ভাগ্যে এক মুঠো চালও জুটছে না, শুধু কচুপাতা সেক্ষ আর কলাগাছ সেক্ষ খেয়ে জীবন রক্ষা করছে। এদের অবস্থা সে নিজের চোখে দেখেছে। ক্ষুধার জ্বালা সহ্য করতে না পেরে সেদিন এক চাষী তার বাড়ির উঠানে গভীর কুয়ার মধ্যে লাফিয়ে পড়ে আত্মহত্যা করেছিলো। তার লাশ যখন কুয়া থেকে উঠানো হলো তখন ভিড় করেছিলো সেখানে অনেক ছেলে, পুরুষ এবং মহিলা। সবাই নির্বাক চোখে দেখছিলো। কেউ কেউ বলেছিলো মরে কলিম শেখ বেঁচেছে, আজ সাতদিন তার ঘরে কোনো খাবার ছিলো না। ছেলে মেয়েরা না খেয়ে সারাদিন কাঁদলেও সে আর দেখতে আসবে না। বেচারী কলিম শেখের অবস্থা আজ সবার ঘরে ঘরে.....কিন্তু কেন কেন আজ দেশের এই চরম অবস্থা.....

হঠাৎ চিন্তাধারা বিচ্ছিন্ন হয়ে যায় বনহরের, পিছনে কে যেন এসে দাঁড়িয়েছে। ঘাড় ফেরাতই চমকে উঠলো, গোলাপী দাঁড়িয়ে আছে। তাকে দেখেই তাড়াতাড়ি গোলাপী চলে যাবার জন্য পা বাড়ালো।

বনহর বুঝতে পারলো গোলাপী তাকে এই পথে আসতে দেখেছিলো; তাই হয়তো সে এসেছে তার মালেক ভাইয়ের সন্ধানে। বললো বনহর— শোনো!

থামলো গোলাপী, চোখেমুখে তার একরাশ লজ্জার দ্বিধা।

বনহর বললো—কাউকে খুঁজছো বুঝি?

বললো গোলাপী,—হাঁ! আপনি কে? আপনাকে তো কোনোদিন এ গ্রামে দেখিনি?

বনহর বললো—আমি পথিক, এই পথে যাচ্ছিলাম, বড় রৌদ্র, তাই এই গাছের ছায়ায় বসে বিশ্রাম করছি। কই, আমি যা জিজ্ঞাসা করলাম তার কোনো উত্তর দিলে না তো—কাউকে খুঁজছো তুমি, না?

হাঁ, আপনি কি করে জানলেন আমি কাউকে খুঁজছি?

তোমার চোখমুখ দেখেই বুঝা যাচ্ছে তুমি কারও সন্ধান করছো।

হাঁ, আপনি ঠিক বলেছেন। জানি না আপনি কতক্ষণ হলো এখানে এসেছেন। এইদিকে আমার মালেক ভাই এসেছিলো একটু আগে, তাই.....

কেমন চেহারা তার?

বুড়ো মানুষ, কিন্তু বড় সুন্দর তার ব্যবহার.....

হাঁ, একটু পূর্বে এক বৃদ্ধ এখানে বসেছিলো, আমি আসার পর সে চলে গেলো। সেই বৃদ্ধ তোমার আত্মীয় হয় বুঝি?

আত্মীয় ঠিক নয়, কিন্তু আমার দাদুর মত, তাই আমি তাকে দাদু বলে ডাকি, তবে সবার সামনে মালেক ভাই বলি। লজ্জাজড়িতভাবে কথাগুলো বলে চলে যাচ্ছিলো গোলাপী।

বনহর বললো—শুনে যাও, সে যদি আসে তাকে কি বলবো?

আমার মালেক ভাই কিছু খায়নি কিনা, আমি তার ঘরে খাবার রেখে খুঁজতে এসেছিলাম।

তুমি বুঝি তাকে ভালবাসো?

হাঁ, আমি তাকে খুব ভালবাসি, আমাকেও সে অনেক ভালবাসে, স্নেহ করে। এই হাজরা গ্রামে তার কেউ নেই আমি ছাড়া.....

আচ্ছা এলে বলবো।

আপনি এক্ষুণি চলে যাবেন বুঝি?

হঁ।

আপনি আর আসবেন না হাজরা গ্রামে?

এখানে আমার আত্মীয়স্বজন কেউ নেই তাই কার কাছে আসবো।

আপনার বাড়ি কোথায়?

আমি বিদেশী। যখন যেখানে যাই সেখানেই আমার দেশ। যখন যে গ্রামে বাস করি সেই গ্রামের মানুষ আমার আপন জন.....

এসব আপনি কি বলছেন?

হাঁ, যা সত্য তাই বলছি।

সত্যি আমার কোনো উপায় নেই, নাহলে আপনাকে আমি নিয়ে যেতাম আমাদের বাড়িতে, কিন্তু.....

কেন, কি অসুবিধা তোমার?

সে অনেক কথা, আপনি বুঝবেন না। যদি আমার দাদুর সঙ্গে আপনার দেখা হয় তার কাছেরই আপনি জিজ্ঞাসা করে নেবেন, গোলাপী কে এবং তার বাড়ি আছে কিনা? আচ্ছা চলি?

বনহর বললো—তোমার দাদু এলেই পাঠিয়ে দেবো।

গোলাপী চলে গেলো।

বনহর দ্রুতহস্তে পরে নিলো তার দাড়ি-গোঁফ। দাড়ি-গোঁফ ভাগিস সে গামছার নিচে ঢাকা দিয়ে রেখেছিলো, নাহলে গোলাপী ঠিকই দেখে ফেলতো বনহর মালেক মিয়ায় পরিণত হলো।

ঘরে ফিরে দেখলো খাবার থালা ঢাকা দেওয়া রয়েছে। গরম ভাত আর কিছু তরকারি। পেট পুরে খেলো মালেক মিয়া।

এমন সময় এলো গোলাপী, দাদু তুমি এসেছো?

হাঁ এলাম।

খেয়েছো?

খেয়েছি! সত্যি তুমি আমার জন্য কত করো। বসো গোলাপী, একটু বসো না।

বসছি কিন্তু হঠাৎ যদি কেউ এসে পড়ে?

এই বুড়ো মালেকের কাছে বসলে কেউ কিছু বলবে না, তুমি বসো!

গোলাপী বসে পড়লো।

মালেক মিয়া বললো—কাউকে তুমি আমার কথা বলেছিলে?

হাঁ, ঐ বটতলায় ঐকটা লোক বসেছিলো, তোমাকে খুঁজতে গিয়ে তাকে সেখানে দেখে বলেছিলাম, আমার দাদু এলে তাকে পাঠিয়ে দিবেন। জানো দাদু লোকটা ভারী সুন্দর।

ভারী সুন্দর।

হাঁ তুমি নিজেও তো দেখেছো তাকে?

দেখেছি কিন্তু কই তেমন সুন্দর বলে তো মনে হলো না।

তুমি বুড়ো মানুষ, তাই চোখে কম দেখো। এমন সুন্দর পুরুষ আমি কোনোদিন দেখিনি দাদু। আমার বড় লজ্জা করছিলো, নাহলে আমি প্রাণভরে ওকে দেখতাম, বড় ভাল লাগছিলো.....

সত্যি বলছো?

হাঁ দাদু। একটা দীর্ঘশ্বাস গোপনে ত্যাগ করে বলে গোলাপী—ও বলেছিলো হাজরা গ্রামে ওর কেউ নেই তাই নদীধারে বটতলায় বসে বিশ্রাম করছিলো। যদি আমার এ বাড়িতে অধিকার থাকতো তাহলে ওকে আমি আমার বাড়িতে আসার জন্য অনুরোধ করতাম।

গোলাপী, তোমার হৃদয় অতি মহৎ, তাই তুমি এমন কথা ভাবো। আমাকে এ বাড়িতে নিয়ে আসার জন্য তোমাকে কত তিরস্কার সহ্য করতে হয়েছে এবং আজও হচ্ছে.....

তবু আমার মনে শান্তি পেয়েছি দাদু। একজন নিরাশ্রয়কে ঠিক আশ্রয় দিতে না পারলেও একটু থাকার মত জায়গার সংস্থান করে দিতে পেরেছি। তোমার খুব কষ্ট হয় দাদু তবু এতটুকু স্বস্তি পাই এই হাজরা গ্রামে আমি যেমন অসহায়, তেমনি তুমিও। আমরা দু'জনই অসহায়, তাই.....

মালেক মিয়া গামছায় হাওয়া খেতে খেতে বলে—সেদিন যদি তুমি আমাকে না নিয়ে আসতে তাহলে হয়তো এই হাজরা গ্রামে একটি দিনও আমার থাকা সম্ভব হতো না গোলাপী তাই আমি কৃতজ্ঞ তোমার কাছে।

এমন সময় শোনা গেলো হাবলু কণ্ঠের অদ্ভুত শব্দ, হঠাৎ সে তার জননী সহ উপস্থিত হলো সেখানে। হাবলু কখন চুপি চুপ দেখে গিয়েছিলো

মালেকের ঘরে গোলাপীকে । সে তার জননীকে ডেকে এনেছিলো । কক্ষমধ্যে প্রবেশ করে আঙুল দিয়ে দেখিয়ে হাবলু অদ্ভুত শব্দ উচ্চারণ করলো ।

দাঁতে দাঁত পিষে বলে উঠলেন ইকরাম গৃহিণী—হতভাগী মেয়ে, তুমি এখানে এসে বুড়োর কাছে বসে আছো, ওদিকে কত কাজ পড়ে আছে । বসে বসে ভাত গেলো আর কাজের বেলায় সব ফাঁকি । বুড়োলোকটা এনে বাড়িতে ঢুকিয়েছো, তাকে যে গাদা গাদা খেতে দিতে হয় এ সব আসে কোথা থেকে? হাবলু ওর চুল ধরে টেনে নিয়ে চল্—আজ সব তোর বাপকে বলবো.....

হাবলু জননীর কথা হয়তো বুঝতে পারলো, সে লাফ মেরে গিয়ে দু'হাতে গোলাপীর চুল টেনে ধরলো, তারপর হিড় হিড় করে টেনে নিয়ে চললো ।

অসহায় গোলাপী মুখে কোনোরকম শব্দ করলো না, নীরবে সে বেরিয়ে গেলো । গুণধর স্বামীর হাতের মুঠায় তার চুলের গোছা ।

মালেক মিয়া অতি কষ্টে নিজেকে সংযত করে রাখলো । হাবলু জননী তখন ভীষণভাবে গালমন্দ শুরু করে দিয়েছেন ।

সমস্ত দিন আর গোলাপীর সাক্ষাৎ মিললো না । রাতেও মালেক মিয়ার পঁচা ভাতের পরিবর্তে টাটকা ভাত এলো না । মালেক মিয়া বুঝতে পারলো হাবলু ও তার জননী বেচারী গোলাপীর উপর নানা রকম উৎপীড়ন চালিয়ে চলেছে ।

রাতে শুয়ে ভাবছে গোলাপীর কথা । ইকরাম আলীকে শায়েস্তা করতে তার বেশি সময় লাগবে না । বেশি সময় লাগবে না ওদামে মজুদ মালগুলোর ব্যবস্থা করতে । কিন্তু গোলাপী, ওর কি করবে সে, সত্যি! ওর কথা ভাবলে মালেক মিয়ার দু'চোখ ভরে উঠে পানিতে । ঘুম আসছে না তার চোখে ।

হঠাৎ একটা শব্দ মালেক মিয়ার কানে ভেসে এলো । কতকগুলো লোকের পদশব্দ, যেন তারা কোনো ভারী জিনিস বহন করে নিয়ে যাচ্ছে বলে মনে হলো । মালেক মিয়া দ্রুত পিছন জানালাপথে দৃষ্টি নিক্ষেপ করলো

বাইরে। দেখতে পেলো চারজন লোক একটি বস্তা বহন করে নিয়ে যাচ্ছে। ইকরাম আলী লঠন হাতে তাদের পথ দেখিয়ে দিচ্ছে। মালেক মিয়া বুঝতে পারলো ইকরাম আলী তার চালগুলো নৌপথে কোথাও পাচার করছে।

মালেক মিয়া মুহূর্তে ভেবে নিলো কি করা যায়। যেমন করে হোক জানতে হবে তাকে এ চালগুলো কোথায় পাঠানো হচ্ছে।

মালেক মিয়া বেরিয়ে এলো বাইরে, চোখ রগড়াতে রগড়াতে বললো— মালিক, এরা কোথায় বস্তাগুলো নিয়ে যাচ্ছে?

ইকরাম আলী তখন ব্যস্ত ছিলো, মালেকের কথায় জবাব দিলো—তুই বুঝবি না।

তবে আমার হাতে লঠন দেন মালিক, আমি থাকতে আপনি এত কষ্ট করে...লঠন হাতে ওদের পথ দেখাবেন, তা হয় না। দিন মালিক, লঠন আমার হাতে দিন।

নে, আলো নিয়ে ওদের পথ দেখা। দেখিস, এ চালের কথা যেন কাউকে বলিস না।

না না, আমি তেমন লোক নই মালিক। নুন খাই আপনার, নেমকহারামি করতে পারবো না। আপনি হলেন কিনা গ্রামবাসীদের হিতৈষী বন্ধু.....

মালেক মিয়া লঠন হাতে লোকদের চলার পথ দেখিয়ে দিতে থাকে। সন্ধ্যায় এক পশলা বৃষ্টি হয়ে গেছে, তাই পথঘাট পিচ্ছিল। লোকগুলো চালের ভারী বস্তা নিয়ে চলতে খুব অসুবিধা বোধ করছিলো, তবু ওরা পা টিপে টিপে এগিয়ে যাচ্ছিলো।

সমস্ত চাল বয়ে নিয়ে যেতে প্রায় রাত দুটো হয়ে আসে।

কখন যে মালেক মিয়া সরে পড়েছিলো কেউ খেয়াল করেনি।

নৌকার মহাজন যখন বৈঠকখানা ঘরের মধ্যে টাকার গাদা গুণে দিচ্ছেলো ইকরাম আলীর হাতে, তখন হঠাৎ পিছনে পিস্তল হাতে জমকালো মূর্তি এসে দাঁড়ালো।

পিস্তলের দিকে নজর পড়তেই শিউরে উঠলো ইকরাম আলী ও নৌকার মহাজন। মহাজন সবেমাত্র টাকার গাদা ইকরাম আলীর হাতে দিতে যাচ্ছিলো, থেমে গেলো টাকা সহ তার হাতখানা।

ইকরাম আলী অস্ফুট কণ্ঠে বললো—তুমি, তুমি...আবার এসেছো.....

হাঁ, আমি এসেছি। ইকরাম আলী, তোমাকে সেদিন যা বলেছিলাম তা করোনি। আজ পুনরায় বলছি, যে চাল তুমি এইমাত্র নৌকায় পাঠালে ঐ চাল বিক্রি তুমি বন্ধ করে দাও নচেৎ তোমার মৃত্যু অনিবার্য। ভোর হবার সঙ্গে সঙ্গে দুঃস্থ গ্রামবাসী যারা আজ সকালে তোমার কাছে টাকা নিয়ে চাল কিনবে বলে এসেছিলো তাদের ডেকে বিতরণ করে দাও.....আর তুমি—ফিরে তাকায় বনহর নৌকার মহাজনটির দিকে—চোরাকারবারী হিসেবে তোমাকেও আমি হত্যা করবো। যদি বাঁচতে চাও তবে তোমার অর্থ সব এই ইকরাম আলীর চাল বিতরণের সঙ্গে সবার হাতে হাতে তুলে দিয়ে খালি নৌকা নিয়ে চলে যাও। দাঁতে দাঁত পিষে কথাগুলো বললো ছায়ামূর্তি।

পিস্তলের সম্মুখে দাঁড়িয়ে কারও মুখে কোনো কথা সরলো না। ফ্যাকাশে বিবর্ণ হয়ে উঠেছে তাদের মুখমণ্ডল। ঢোক গিলে বললো নৌকার মহাজন—আমি চাল কিনতে চাই না, আমাকে মাফ করে দাও।

মাফ। চোরাচালানী হিসেবে তোমাকে এই মুহূর্তে গুলী করে হত্যা করা দরকার কিন্তু করবো না যদি তুমি আমার কথামত কাল সকালে এই টাকা গরিব দুঃস্থ ব্যক্তিদের মধ্যে বিলিয়ে দাও.....

নিশ্চয়ই দেবো। জীবনে আর কোরোদিন চোরা ব্যবসা করবো না।

হাঁ, মনে রেখো, আমার নির্দেশ অমান্য করলে নিস্তার পাবে না। ইকরাম আলী.....

আমি—আমিও শপথ করছি।

মনে রেখো কোনোরকম চাতুরি করেছো তাহলেই মরেছো। পিছু হটে বেরিয়ে যায় বনহর। বেরিয়ে গিয়েই দরজায় শিকল টেনে বন্ধ করে দেয়।

কয়েক মিনিটের জন্য ওরা স্তব্ধ হয়ে গিয়েছিলো, তারপর নিজেদের সত্ত্বা ফিরে পায়, এবার তারা চিৎকার শুরু করে দেয়—কে কোথায় আছো ডাকাত পড়েছে...ডাকাত পড়েছে...মালেক, ওরে মালেক ছুটে আয়...ছুটে আয়.....

চিৎকার শুনে বাড়ির লোকজন জেগে উঠলো, এমন কি আশেপাশের বাড়ি থেকে ছুটে এলো লোকজন, পাড়া প্রতিবেশী। সকলের হাতেই লাঠি-সোটা দা' কুড়াল। সবাই জানে, ক'দিন আগেই আকরাম আলীর বাড়িতে ডাকাত পড়েছিলো। সেদিন কিছু নিয়ে যাবার সুযোগ পায়নি হয়তো তাই আজ আবার এসেছে। কেউ কেউ বল্লম নিয়ে ছুটে এলো।

ততক্ষণে একটা লাঠি হাতে মালেক মিয়াও এসে দাঁড়িয়েছে সবার সঙ্গে।

তখন দরজা খোলা হয়ে গেছে।

ইকরাম আলী ও নৌকার মহাজন বেরিয়ে এসেছে বাইরে, তারা হস্তদত্ত হয়ে ডাকাতে বর্ণনা দিচ্ছে।

ইকরাম আলী বলছে—ভাগ্যিস তোমরা ঠিক সময়মত এসে পড়েছিলে, নাহলে আজ কিছুতেই ডাকাত বেটা আমাদের ধনমাল টাকাকড়ি কিছু রেহাই দিয়ে যেতো না। তোমরা এসে পড়ায় ডাকাত কিছু না নিয়েই পালিয়েছে।

মহাজনকে দেখে গ্রামবাসীরা প্রথমে তাকেই ডাকাত মনে করে মারপিট করতে যাচ্ছিলো, কিন্তু ইকরাম আলী বুঝিয়ে বললো, ইনি ডাকাত বা চোর বদমাইশ নন, ভদ্রলোক এসেছে কিছু চাল খরিদ করতে, তাই রাত হওয়ায় আমার বৈঠকখানায় বসেছিলেন। কথাবর্তা বলছিলেন আমার সঙ্গে, ঠিক ঐ সময় ডাকাত আসে.....

সবাই শুনে বিশ্বাস করলো ইকরাম আলীর কথা। ডাকাত যে এসে মহাজনের টাকাপয়সা নিতে পারেনি, সেজন্য সবাই খুশি হলো এবং ডাকাতে উদ্দেশ্যে গালমন্দ করতে লাগলো।

ইকরাম আলী মালেককে ভীষণ গালাগালি করতে লাগলো-বেটা নাকে তেল দিয়ে ঘুমাচ্ছিলি, এদিকে ডাকাত এসে সবকিছু নিয়ে যাবার আয়োজন করেছিলো। কালকেই তোকে বলে দিয়েছিলাম লাঠি হাতে বাড়ির সদর দরজায় বসে থাকবি। শয়তান শুধু থালা থালা ভাত গিলতে পারিস্, না?

ইকরাম গৃহিনী তো ঝঙ্কার দিয়ে গালাগাল শুরু করে দিলেন। গভীর রাত্রির নিশ্চিন্ত অন্ধকার ভেদ করে গ্রাম হতে গ্রামান্তরে ছড়িয়ে পড়লো সেই কণ্ঠস্বর।

সবাই মিলে আক্রমণ করলো মালেক মিয়াকে। কেন সে রাত জেগে পাহারা না দিয়ে নাক ডাকিয়ে ঘুমায়। ডাকাত যদি সব নিয়ে পালাতো তখন কি হতো! তাছাড়া মেহমান এসেছেন তাদের টাকা কড়ি যদি লুটে নিতো তাহলেই বা কি উপায় হতো—মান-সম্মান সব খোয়া যেতো.....এমনি নানা ধরনের নানা কথার বিষবাণ নিক্ষেপ করতে লাগলো সবাই মালেক মিয়াকে।

মালেক মিয়া নিশুপ, মাথা নিচু করে সে দাঁড়িয়ে রইলো একপাশে।

**পরবর্তী বই
প্রাবন**